

MÙSÀNJEELÀ WA

KU ÌBAAMULÒÒLÒ



Twasàkidilaayi, wabùngì. Mukalenge ànùbènèshè.

Nudi mwà kusòmba.

² Mwanàànyì wa balùme ùwà mulwè apa leelù ewu, e kwambayè ne: “Papa, mwà njinga ne tuvwa mwà kwikala bamònekù èkèleeziyà wàwa kumpàla kwà twètù kutwàdija kwibaka wetù, mmwaba mulenga wà dikemà.” Ki kwakulayè bwà . . . Yèyè ne: “Kacya ncìtukù mwanjì kutwilangana ne mwambi awu to, kàdi pìikalàye muntu mwìmpè bu mukàjèndè, cyà bushùwà menemene yèyè mmuntu mwìmpè.” Pa nànkù tudi ne disànkà dyà kwikala kaaba aka.

³ Nènku ndi—ndi mwindìle di—disangisha edi dilòòlò edi, bwà Nzambi wàpòngololakù mabènesha Endè pambidi pèètù ne wàtùkwàcishakù.

⁴ Mpindyewu tudi . . . Ndi mfùma ku dibwela, ne ndi mutèèlèje Mwanèètù Williams, Ngèèla meeji ne, ùwà wàmba cintu kampànda pa bìdì bitàngila kwikala ku Ramada. Nènku ndi ncinka ne mamanyisha àkaadi mamane kufidiibwa, bwà pa bìdì bitàngila bwalu abu. Pa ciibidilu bàdi bàtàbaleela bwalu abu kumpàla kwà mèmè kubwela. Nènku mu bushùwà menemene tudi bindile ne myoyi kuulukuulu cikondo cinène ku mpungilu awu. Kàdi cyànyì cyà kwenza mwab’ewu nkunyunguluka ne kutuutakeena ne bàna bèètù ne kubwela mu bwobùmwe munkaci mwà bantu, ne nsambila bwà Nzambi wàtùpèèshakù di—disaluka dyà mùshindù mwìmpè, nènku dîbà adi tudi mwà kuya buludìludì kabwela mu Ramada mu disangisha dinène. Nànku awu tudi munkaci mwà kuteeta bwà kakùmbula èkèleeziyà yònsò yitùdì mwà kukùmbula ayi, too ne dîbà adi. Nènku tudi munkaci mwà kucyònkomoka. Ncyà bushùwà menemene ne tudi munkaci mwà kupìcila mu cikondo cilengèle cyà bwobùmwe munkaci mwà bàna bèètù.

⁵ Nènku pa ciibidilu ntu . . . Muntu kanà yònsò ewu mmumanyè ne mèmè ncyènà muyiishi menemene to, ndi ànu ndundu wa diseelèfù. Kàdi mèmè—mèmè . . . Wànyì mudimu wà bwambi ngwà kusambidila babèèdì. Nènku ndi . . . Tuvwa batàmbe kupeta malòòlò à bantu bààbùngì, ne bikwàbò, mu mùshindù wà ne bìvwa bikolè bwà kupeta mwaba wà kwenzela nànkù. Nènku netùteetè ní tudi mwà . . . dîbà ditùdì tubwela mu myaba yitùdì mwà kufùdisha, mwòmù emu, bwà kufila twartà ne kubweja bantu bwà kubàsambidila. Kàdi kwikala ne dilòòlò dimwè dyà masangisha ku musangu, banwikalà

kanùyi bafwànyine kusambidila dilòòlò edi to nènku pashiishe mbafwànyine kuya naabò mwaba mukwàbò kampànda dilòòlò dyàlondà, nènku kuya kàbidì mukwàbò mwaba, pa nànkù ndi ànu ngènzà kaa—kaamuyiiki kakesè—kakesè dilòòlò dyònsò bwà bantu, ne mwànyì mwònsò mùndì mwà kwenza bwà...bwà luumù ne butùmbì bwà Yesù Kilistò, Utùdi twètù bònsò banange ne biitàbùuje, ne utùdi tubwela nendè bònsò mu bwobùmwe.

⁶ Ngèèla meeji nuvwa buumvwe bwà njiwù yà mu ditumba emu, ànu mu katancì kakesè emu. Ncyèna mumanyè ne muntu awu ùvwa mushipiibwe anyì, anyì ne ùvwa nganyì mwìnè awu, kàshinyì nkamutuutè. Twètù e kwimana ànu cyanàànà, kwenza ànu mwàkù mukesè wà disambila, kùkaadi katancì. Bu mu ntàntà wà milongo yìbìdì yà nzùbu kùvwa muntu kampànda uvwabò batuutè mu luseke lwà kàshinyì kèndè ne kumukupabò mu mùsèèsù. Nènku muntu munène wa katankù ùvwa mubwikidija lwà muntwamu. Nènku bampùlushì bàvwa mwaba awu, kàdi ncyèna ngèèla meeji ne màshinyì à cyambula babèèdì àkaadi mafike mwaba awu to. Bàdi ne cyà... Piikalàye kàyi mushipiibwe to, civwa bushùwà menemene... Mbamutuucile mu luseke *emu* ne kumukupilabo lwà ku ciibi cyà mu luseke lukwàbò, pa nànkù cìdi ne cyà kwikala mukùmù mubyamùbyalè. Nudi bamanyè's, cìdi ànu...

⁷ Tudi ne cyà kukwàcila Nzambì mudimu mu kasunsa kònsò. Katwèna bamanyè ne ndìbà kaayi—katwèna bamanyè ne ndìbà kaayi didì bintu abi mwà kwenzeka to. Pàmwàpa tudi twela meeji ne kabyàkutwènzekela twètù to, kàdi nudi bamanyè ne cìdi mwà kutwènzekela, nudi bamanyè's. Pa nànkù, ndi ngiitabuujà ne Yesù mmwambe ne: “Dilongòlòlaayi,” bwalu katwèna bamanyè ne mmu kasunsa kaayi anyì dìbà kaayi ditùdì mwà kubiikidiibwa to. Nènku dìbà adi netùye mu mwaba ùdìbo kabàyi bàpetakana ne njiwù to, ne kawùyi ne ntàtu nànsha. Tudi ne disànka bwà mùdiku mwaba wà bwena awu mu mulayi.

⁸ Nudi bamanyè's, meeji miine, dilòòlò edi, àà—àà kumòna ne tudi mwà kujinga mwaba wà mùshindù bu nànkù, aci cìdi cìleeja ne kùdi mwaba wà mùshindù awu. Nwamònu anyì? Nènku tudi bamanyè biibùlòji byònsò, mindidimbì yònsò, kùdi ne cyà kwikala cintu kampànda bwà kwenza mundidimbì. Mundidimbì ndidileeja. Nànkù piikalàku mwoyi kampànda wà mùshindù ewu, bìdì bileeja ne ùdi mmundidimbì, dìbà adi kùdi mwoyi mulelèlè mwaba kampànda ùdì ewu ùleeja. Nwamònu anyì? Nudi numòna mucì, mùshindù ùdì mucì mulenga. Nènku nudi bamanyè cìdiwu anyì? Ncimfwànyì cyà ciibùlòji cyà, mmundidimbì, wà Mucì wà Mwoyi ùdì mu Dyulu.

⁹ Mpindyewu, nudi bamanyè's, pàakalwà Nzambì pa buloba, pàvwàYe ùlààdila pa buloba ku cibangidilu apu, ne pàmwàpa cintu cyà kumpàla cyàkajuukà civwa nci—civuba, mùdì beena maalù à mamanya, bàteeta kwamba. Cintu cyàkalondà civwa cifwànyine kwikala cintu kampànda...Ndi ngiitabuujà

dishintuluka dilelèlè dya bwena Kilistò, kàdi ncyênà ngiitabuuja ne didi difumina dyònsò ku kabùlu kàà mashi kàmwè to. Ndi ngiitabuuja ne cidi ànu . . . Nzambi wàkenza civuba, ne pashiishe kwenzàYe mushipa, ke pashiishe kwenzaYe cintu kampànda cikwàbò. Nènku ànu . . . Ndi ngiitabuuja dyenda dibànda, kadiyi dya ku kabùlu kàmwè kàà mashi nànsha, kàdi cifukiiibwà cishiilàngàne misangu yònsò.

¹⁰ Ne ndekeelu wa byònsò Wakatungùnuka ne kufùka, too ne ku mùshindù mutùmbùke, nènku paanyimà pàà katancì cyàkaleeja Ewu uvwa munkaci mwà kulààdila, mwinè awu ùvwa Nzambi. Mpindyewu, bwà kujaadika ne ncyà bushùwà, pàakavwijiibwa Nzambi mubidi ùvwa n'Yesù Kilistò, muntu. Nwamònu anyi? Pa nàнку, kàyi Mwanjèlò to, muntu. Pa nàнку bidi bileeja ne civwa cimuleeja Yèyè.

¹¹ Nènku, kaa, Bible wa kale ewu's mmùlè tètè ne bimpòkòtò byà kale byà ngàsà abi. Ntu ànu . . . Ntu muswè ànu kukalakasa (kàdi nwènù?) ne kubwela ànu muntwamu ne kutuutulaPù lupwishi lwònsò, ne kuCitàngila bwà kumòna CìdiCi. Mùshindù ùdi bilengà, nwènù's nudi bamanyè mùnwemu mu Arizona emu, bilengà binène bidi bifumina mu lupwishi lwà buloba. Ki mùdìbi bifumina. Ne bilengà byà Nzambi bidi bifumina, pààbi, mu lupwishi. Nènku Yèyè . . . Tudi ne disànka dyàbùngì bwà mùdìYe ùtùpa dyèsè dya kuya mu cyengulwidi Cyèndè cinène, ne dimòmà dyònsò dipàtùdiiibwè.

¹² Nudi bamanyè mùvwàbo ne ciibidilu cyà kwenza kale wàwa anyi? Mu bushùwà bwà bwalu, nwènù beena Arizona nudi bamanyè mùvwàbo . . . kumpàla kwà kwikalabò ne cyengulwidi, mùshindù ùvwàbo bàtaata ngòlò. Mbatwambile ne bàvwa bàngata ngòlò bàmutuuta. Beena Inde bàà kale bàvwa ne ciibidilu cyà kwenza nàнку, bàmutuuta. Ne bènda ànu bàmkùdimuna, ne bàmutuuta bàmutuuta, too ne mùvwà dimòmà dyònsò adi dipàtukamù. Nènku mùshindù ùvwàbo bàmanya ne divwa dipàtùke (bisòta byònsò abi ne bintàkanyà bìvwà munda amu, byònsò abi), bàvwa bàmanya, dībà divwà mutuuci ùmòna mpàla wendè mwòmò amu, ùvwa mwà kudimònamù yèyè mwinè. Dībà adi ùvwa ùmanya ne ùvwa wènda ùtòoka, padiye ùleeja cimfwànyi cyèndè yèyè mwine.

¹³ Nènku, nudi bamanyè's, ngèèla meeji ne Nzambi mmuswè kwenza Èkéleeziyà Wendè mùshindù awu, kutuuta kupàtula ànu maalu à pa buloba ònsò too ne pàdi didileeja dya Yesù Kilistò disòmbela mu yònsò wa kutùdi ne tumwènesha Mwoyi Wendè. Pashiishe tudi pabwìpì dībà adi bwà Wendè . . . Ùdi ùDileeji Yèyè mu twètù dībà adi, patùdi tufika ku . . . tutèeka bujitu bwònsò ku luseke ne mpèkaatù udi utùnyungùlùkila bipeepèle menemene, bwà twamòna mwà kunyeema ne lutùlù lubilu lùdi lutùtèekela kumpàla kwètù, biikàle batàngile ku Cileejilu, Mubangi ne Mujikiji wa Diitabuuja dyètù, Yesù Kilistò. Tudi ne disànka dyàbùngì bwà Cyòci aci!

14 Mpindyewu, pa ciibidilu ntu ngàmba dilòlò dyònsò... Mémè kwambila Mwanèètù Carl Williams, mémè kwamba ne: “Mwanèètù Carl, bantu abu kî mbaswè kuntèeleja kàbìdì to, bàbànda bàpweka ne bibandabanda abi, kubàlama too ne ku mèbà àbìdì anyì àsàtù à butùkù.”

Yèyè ne: “Èè, èè, lwàku’s.”

15 Pa nàнку ndi ngàanyisha lutùlù lwèbè mu—mu dimbiikila dyà cyàkàbìdì. Nènku mpindyewu dilòlò dyònsò. . .

16 Ndi mfùma ku dyakula ne mukàjàànyì mu katancì kakesè emu, kuntu kwàka. . . Ùdi ku Tucson mpindyewu, ki mémè kwamba ne: “Kuulu kùdì bishi?”

17 Yèyè kwamba ne: “Luuyà lùkaadi lwènda lùbànda.” Nènku yèyè kwamba ne: “Udi ujikija ànu pa dìbà anyì?”

Mémè ne: “Mmwómò menemene, pa dìbà diipacila ku dikumi anyì dikumi ne òmwè dilòlò dyònsò.”

18 Mvwa mumwambile ne: “Nengàngatèku ndambù wa diikisha pangààya ku Arizona musangu ewu bwà tuumasangisha tukesè etu. Nèngìikalè mwà kuya kùdì maèkèleeziyà awu, bàna bèètù abu. Ncyàkunyooka bantu abu to, nembwelè ànu mwómù amu ne kubàlekela bìmba misambu, cyanga’s. Mémè nenkèlebejè dìbà dyànyì, nkèlebeja mifùndù yànyì pa tusunsa dikumi ne tùtaanu, makumi àbìdì, kwamba ne ‘Amen’ ne kuya kumbèlu.”

Yèyè kwamba ne: “Udi uneemeka ndongamu awu anyì?”

19 Mémè ne: “Èyowà, munanga wanyì, ndi nneemeka; ndongamu wa ciibidilu, ùya too ne ku mèbà àsàtù.” Mbantu balenga bàà dikèma; lutùlù lwàbùngì.

20 Èè, twìnyikààyi mitù yètù bwà katancì kakesè cyanààna mpindyewu patùdì tuseemena Nendè pabwìpì apa. Mpindyewu, ndi mutwìshìibwe ne mu batèeleji balenga bàà mùshìndù ewu bàdì bìitabuujà, ne nangananga. . . Ndi mmòna tulààlu túbìdì twà kwambwila babèèdì tutèeka mwab’ewu, babèèdì ne bakèngeledi, ndi mumanyè ne bàdì ne milòmbò yà pabwàyì. Kakùyì mpatà to bwà ne kùdì bakwàbò bààbùngì bàdì ne malòmba aa. Byòbì nàнку, elààyi ànu byanza byènu muulu ne nùcimanyìshè ku dyela dyà cyanza cyènu kuulu. Nènku mpindyewu mu disambila nensambukè ne nkasambidile bantu bàdì mu tulààlù twà babèèdì abu, patùdì—patùdì mwab’ewu apa, bwà twètù kwikala batwìshìibwe ne twacìpeci. Bu cintu kampànda mwà kwenzeka. . . Bàvwa ne diitabuuja dikùmbàne bwà kutwàdìwbabò mwaba ewu, ndi muswè bwà nwènu bwònsò kusambila naanyì.

21 Taatù Wetù wa mu Dyulu, nyèwù tutèeka ku luseke mpindyewu meeji makwàbò wònsò, tusukula meeji ètù, ne tudi tulwa mu Bwikadi Bwèbè bwà dikezudiibwa dyà musùkà wètù. Nènku tudi tulwa kumpàlà kwètù ne Mashì à Mukalenge Yesù. Tudi munkacì mwà kutonda ne katwèna bakùmbànyine

dibènesha nànsha dimwè dyŪdi mufwànyine kutùpèesha to, kàdi bwalu bwà ne Yèyè wàkafwà bwà twamòna mwà kupeta mabènesha aa, ne mutwàmbile bwà kulwa ne dikima dyònsò kumpàla kwà Nkwasa wa butùmbi, bwà twamòna mwà kufika ku mabènesha aa ku ngàsà wa Mukalenge wetù Yesù, Wakalwa pa buloba awu, Emanùwèlè, ne kwangata kaaba kàà ngènzàmpèkààtù. Wàkalwa *twètù*, kaa, bwà twamòna mwà kulwa *Yèyè*.

²² Ndishintakaja kaayi adi's, Mukalenge! Nsòmbelu wa mpèkaatù, uvwa mu njila mutàngile ku ifernò utùvwà nendè awu, ne pa kumanya ne Kampànda ùvwidile ne kwambula mwoyi awu pambidi Pèndè, ne kukezula mpèkaatù yètù ku Mashì meela panshi à Mwoyi Wèndè Sungasunga. Mbipite too ne mùvwà myoyi yètù mwà kwela meeji pa bwalu abu, Mukalenge. Ne pashiishe, pa kuumusha byònsò abi, Yèyè wàkaseba njila bwà kuumusha bubì bwètù ne kutòndopa ku mibùndàbùndà Yèndè. Tudi ne kusàkidila menemene bwà mùdìYe mulayè ne Ûvwa mwà kutùlama bîmpè patùdi tumusadila Yèyè.

²³ Nènku mpindyewu dilòòlò edi, Taatù, kùdi malomba àbùngì àvwà. . . ne byanza byàbò byela muulu. Tudi bamanyè ne Wèwè neùtangilè muntu ne muntu wa kùdìbo, mumanyè cìdì mwinshì mwà cyanza aci, mu mwoyi.

²⁴ Nènku ndi ndòmba, Mukalenge, bwà Wèwè kuvùluka Dìyi dilòòlò edi patùdi tuDibala apa; ne twelanganaPù meeji bu kaadileesònà kakesè, bu kàà kàlaasà kàà Dyàlumingu, bwà twamònakù mwà kuumuka kaaba aka dilòòlò edi ne—ne kwikala ne dyòdi edi mu myoyi yètù, bwà twadyùmvwa bu bàdi bafwànyine kwikala Neebè pabwìpì, mu dipàtuka dyètù, kutàmba patùvwà babwelè. Ki citùdi bavwile mwab'ewu, bwà cyàmòna mwà kutwàla ditàbuluja mu ditùnga, katuyi ànu bamanyè ne neditwadije dìbà kaayi to, kàdi ne myoyi kuulukuulu badindile, Mukalenge. Tudi tufileeja diditàcisha dyònsò dyà buntu ditùdi bamanyè bwà kutwàla ditàbuluja didì ditwàlà balùme ne bakàjì, bânà bàà balùme ne bàà bakàjì, ku dimanya dyà Kilistò bu musùngidi.

²⁵ Tudi baswè kuKusàkidila bwà èkèleeziyà ewu, bwà mpaasàtà wèndè mulenga ne dīkù dyèndè, ne bwà balami bònsò, balubuludi, ne bwà byònsò bidìye ùleejà abi. Tudi tuKusàkidila bwà aba bàdi ne dikima dyà kwimana ku luseke lwèndè. Nènku, Mukalenge, tudì tulòmba ànu bwà mabènesha à Nzambì ikalè pambidi pààbò. Bèneshàku diditàcisha dyònsò. Mwàb'ewu wikale mùlembà wà ciikishilu, Mukalenge, mwaba wikalà cibandabanda cyònsò eci mwà kubwela ne kupeta diikisha.ENZÀKU NÀNKU, Taatù. Swàkù bwà masambila à mpaasàtà àndamunyiibwè bwà babèèdi. Swàkù bwà masambila èndè àndamunyiibwè bwà lupàndu, bwà bònsò bàdi bàbwela—mu nyùngulukulilu wa Èvànjeeliyò ewu. Swàkù bwà mabènesha Èbè yikale pambidi pèndè. Nènku swàkù bwà èkèleeziyà kapangidi

mapà à nyumà to, swàkù bwà ikalè mwaba, èkèleeziyà wa citeumbu mu bantu bônso bàà múnwemu. Enzàku nàнку, Mukalenge.

²⁶ Mpindyewu, Taatù, bàdi balàale pa tulàalù twà kwambwila babèèdi mwab'ewu dilòòlò edi, bàdi kabàyi mwà kujuukila kuulu ne kusànkidila disangisha, ki bôbò bàdi kabàyi ne dyèsè edi. Nènku mbabambule balwe naabù mwab'ewu mu mùshindù kampànda, dilòòlò edi. Éyi Nzambi, fwàkukù luse! Ndi ngèela meeji ne: “Ambà tũng bu yêyè awu mwikàle mukàjàànyì anyì mwanèètù wa balùmè, anyì muntu kampànda uvwa cilongo cyànyì kampànda, ùmvwà mumanyè bímpè menemene?” Bidi nàнку bwà muntu kampànda, ne ndi ndòmba, Taatù, bwà ngàsà wa Nzambi, ne bukolè Bwèndè, wàpweka ne bupikudi bwà Nzambi bwàbò dilòòlò edi, ne kubàsungila mu tulàalù twà kwambwila babèèdi atu. Swàkù bwà kabiiikadi mu tulàalù twà babèèdi atu ntàntà mule kupita pa disangisha dyà dilòòlò edi nànsha. Swàkukù, bwà puumukàbo, tulàalù twà kwambwila babèèdi twàshiyiibwa paanyimà. Swàkù bwà bukolè, bwà kabiiishà Yesù ku bafwè abu, búfulululè mibidi yàbò yipetè bukolè bwà mubidi bupyabùpyà ne dikàndà kàbidì. Enzàku nàнку, Taatù wetù. Mpindyewu, tudi bamanyè ne Wèwè ngwàkalaya bwà kucyènza.

²⁷ Ki bwà cinyì, mbafùnda mu Mifùndu ne: “Bimanyinu ebi nebifilè aba bàdi biitabuuja. Bôbò batentèkèle babèèdi byanza, babèèdi nebàsangalè.”

²⁸ Mpindyewu, Taatù, bwà kakwikadi muntu nànsha umwe pabwìpì naabò, pàdi bakwàbò mwà kuseemena pabwìpì ne bakwàbò, Ndi mpweka mu civulukilu cyà dīyì ditùma edi. Nènku, Nzambi, nèntèkemene bwà kupeta mukàndà mumfùndila ùumukila kùdibo, ùleeja ne mbyenzèke, bwalu ndi nya mu Dìnà dyà Yesù Kilistò.

²⁹ [Mwanèètù Branham ùdi ùmuka ku cibùmbà cyà ku cyambilu bwà tusunsà túsàtù ne citùpà bwà kusambidila aba bàvwà pa tulàalù twà kwambwila babèèdi abu, mèyi èndè kí mmuwike to—Muf.]

Mukalenge, ndi ngiitabuuja, Éyi Mukalenge,
ngiitabuuja,
Bintu byònsò bidi mwà kwenzeka, Mukalenge,
ndi ngiitabuuja;
Mukalenge, ndi ngiitabuuja, Mukalenge, ndi
ngiitabuuja,
Bintu byònsò bidi mwà kwenzeka, Mukalenge,
ndi ngiitabuuja.

³⁰ Bu mùdibi ne bainàbànzà bônso bàbidì aba bàdi ne byùjà, kànsèrè pa umwe, nènku, mvwa ànu mufwànyine kufila lùkàsàlùkàsà kaabujaadiki kakesè aka, nànsha byòbì bikèngela bwà kukòsolojakù ndambù wa dyakula dyànyì mu cikòsò. Ànu

kumpàlà kwà kuumuka kumbèlu, bwalu bwà ndekeelu bûmvwà naabu kumpàlà kwà kuumuka, buvwa bwalu bwà butàmùke, kùvwa inábànzà kampànda dínà dyèndè n’Dyer; ki civwàdi, ngaapù mwoyi dínà dyèndè mpindyewu. Kùvwa Ngàngàbukà Dyer, mufùmíne ku Louisville. James, Ngàngàbukà James Dyer, mpilù mu byújà, ne bikwàbò, mu Louisville.

³¹ Mwanèndè wa bakàjì ùvwa wimba pyàno mu èkèleeziyà wa Open Door, mùdi Docteur Cauble mwikàle mpaasàtà; ciikàle ànu, kaa, nsunàngòngà munène, wa katankù wa kalè wa beena Yudà. Ne nuntu mwine awu ùvwa wa mu Èkèleeziyà wa Kilistò, Èkèleeziyà wa Kilistò wa cyena màngumba, nènku ùvwa mukùdimùne mucima bwà kwitabuuja èvànjeeliyò wa Èvànjeeliyò mu kaabujimà, muntu wa maalu mîmpè matàmbe. Ne wàkimba mu disangisha dyànyì pâmuvwà ndyènzela mu Louisville, ku Memorial Auditorium. Nènku wàkakèma bwà kumòna civwà cyenzèke, ne kuteeta bwà kucyàmbila tatwèndè.

³² Yèyè kwamba ne: “Cìdi ànu bintu byà mu meeji. Bantu abu bàdi bàsaama ànu bu pa kànà kakùlù.” Pa nàнку—nàнку kàvwa muswè kuCìitabuuja to.

³³ Ndekeelu wa byònsò kulekelayè kulwa mu èkèleeziyà e kasèdiibwayè kùdi nsongààlùmè mufùmíne mu semínèrè wa ba Baptistes, ki ndekeelu wa byònsò mulùme kuumukayè ku diitabuuja dyèndè. Ùvwa mulongèshùbwe bwà kwikala mwambi, ne bu mùdi ba-Baptiste bàcyènzela mùshindù awu. Ki pa nàнку bóbo . . . Ndekeelu wa byònsò e kuumukayè, kàciyì muswè kuyiisha to. Ki kumwàngalabo batàngile kwàbò ku Rockford, mu Illinois.

³⁴ Ndekeelu wa byònsò yèyè, Jeanne, kubangayè kupeta lutàtu kampànda lwà bukàjì. Wàkayayè kùdi tatwèndè bwà kudyènzeja mateeta, kwalukilayè ku Louisville bwà kudyènzeja mateeta. Nènku, bóbo bamanè kumwenza mateeta, e kusanganabò cyàkabiikilàbo ne “cyùjà cyà chocolat,” cìdi mu tujilu twà muntu mukàjì. Mu dyumusha cyòci aci, tatwèndè, mu dipanda dinène, nènku ùvwa ne cyà kwikala mupùmune tusùnsukila twà ku—cyùjà aci munda mwèndè. Nènku ndekeelu wa byònsò . . . Nènku kumwenza mateeta à ndòndò mule à ku cyamù cyà mîdimà ne kumupà manga.

³⁵ Nàнку ke pashìishe pàvwàbo . . . pààkaalukila mukàjì awu kumbèlu, kàdi wàkatùngunuka ne kupeta lutàtu.

³⁶ Bu paanyimà pà cidimu cijimà bàkalwa nendè kàbidì bwà kumwenzabo mateeta makwàbò, nènku kuumumushabò matrice wònsò. Nènku pàvwàbo munkaci mwà kwenza nàнку, tatwèndè, ne Ngàngàbukà Humes, udi umwe wa ku bangàngàbukà banène bàà ku Sud aku, kumupandabò, kàkavwa kaye ntàntà mule be, kànsèrè kàkaavwa kajìngile dila dinène. Ki kumushiyabò díbà adi mwaba awu bwà cipòòlò cikesè. Pashìishe kuteetayè kàbidì bwà kumukenketa ku cyamù

cyà mîdimà, ki kumònabò ne kabyàkenza bwalu bwîmpè nànsha bùmwe to, ki kumwalujabò ànu mu lùpitaadi bwà . . . Kabàvwa mwà kumupèèsha bwanga bwà kupàtulayè bìvwà mu mala to, ki kuteetabò bwà kumusukula ne mâyi à mu kapùngù. Kàdi aci kwenzaci ne mâyi kaàcìvwa aya kàbidì mu mala to.

³⁷ Nànku bàyendè pèndè ùvwa mwenzè ànu bu umwe wa ku bandyùdi. Nènku ki ndekeelu wa byònsò dîngà ditùkù kulwayè kuntu kwàka kwangatayè mukàndà ne kubangayè kuwùbala. (Nènku mwanàànyì wa balùme mwab'ewu ne Mwanèètù Sothmann, yèyè udi umwe wa ku balubuludi, ùdi kaaba aka mwaba kampànda.) Ki kulààlayè ànu pa bibàndilu byà èkèleeziyà, mònà's, munda mwà matùkù matwè ku àbidì, too ne . . . Mémè—mémè mvwa mupàtùke muyè mu masangisha kampànda. Mu dyalukila dyànyì mémè—mémè kuya kamutàngila. Ki kungambilayè, kwamba ne: "Mpindyewu, kî mmumanyè ne ùdi ne kànsèrè to." Yèyè kwamba ne: "Ndaaku wèwè ùkayikile nendè ne ùsambile nendè."

³⁸ Ki pa nànku dîbà dîngàmumònu, yèyè kwamba ne: "Mwanèètù Branham," yèyè kwamba ne: "bàyaanyì neitabe lwondàpu lwà kwà Nzambi," wamba ne: "bwalu ncìvwa mwà kumufikishakù ku ditàngila ùmwè wà ku mikàndà to, mpindyewu ùdi ùmbadila ku dibèji ku dibèji ditùkù dyònsò, ùmwè wà ku mikàndà."

³⁹ Ki mémè ne: "Ndi ngumvwa aci, Jeanne." Ki mémè kwamba ne: "Mpindyewu, Jeanne, twànjìbi kuyiikila tǔng ne tùmòne cìikalà Mukalenge mwà kwamba." Kakùvwa muntu mu cibambalu amu to, mungàngà mukàji ùvwa mupàtùke. Ki nànku twètù kuyiikila ndambù wa cipòòlò, nènku paanyimà pàà cipòòlò ki cikèènà-kumòna eci pwàà. Mémè . . . Yèyè ùdi ne bidimu bitwè ku makumi ànaayi, kî mmwanji kwasa mvyà to, kàdi yèyè ùkaavwa mukùlàkàje bikolè mwikàle ne mvyà. Mémè kwamba ne: "Jeanne, mpindyewu, ukààtu mubwele mu masangisha."

"Èyowà, Mwanèètù Branham."

⁴⁰ Mémè ne: "Bàvwa bakusokòkebu, ne bangambile ne ncìkwambidìbu to, kàdi udi ne kànsèrè." Ki mémè ne: "Tatwèbè ne . . . Anyì bàyeebè mmwambè ne: 'Kwàmbikù cintu nànsha cìmwè pa bwalu abu to.' Kàdi wèwè udi ne kànsèrè, Jeanne. Kàdi, mpindyewu, ndi muswè nkwambile, bwalu ukààtu mubwele mu masangisha. Cìkèènà-kumòna kacya kî nciyè panshì nànsha. Mpindyewu ndi nkwambila, Jeanne ne, ng'EMU MUDÌ MUKALENGE WAMBÀ! Wamònu anyì?" Wamònu anyì?

⁴¹ Mpindyewu, bùdì naabù mbwà kwikala mutwishìibwe menemene bwà cyòci aci, nwamònu's, bwà ne . . . bwà ne m'Mukalenge. Ki ndifwikàkaja to; udi *ucimòna*. Nwamònu anyì?

Ki pashìshe mémè kwamba ne: "Newikalè ne mwoyi. Bòbò bàdi . . . Yèyè . . ."

42 Yèyè kwamba ne: “Mwanèètù Branham, mvwa ndicinkila cintu aci kacya kwónsò eku.” Ki yèyè kwamba ne: “Bu mündi mukolèle mu nzùbu ne taatù wanyì mwikàle ngàngàbukà,” mwàkambayè, “mvwa—mvwa—mvwa mudicinkileci.” Kwambayè ne: “Nkàvwa mutùme meeji ku cintu aci ànu kwónsò eku, ki cìvwàci menemene.” Twètù e kusambila.

43 Ditùkù dyàkalonda, ditùkù diibìdì paanyimà pàà dyòdì adi, bàvwa ne cyà kumupicisha ku dimutùbula mwaba wà kuseesukilayè. Aci’s, nudi bamanyè, bàdi bàkosa dila ne bèèla kàbòmbi ku dila aku nènku díbà adi mubèèdì ùdì ànu. . . too ne mùdiye ùfwa, ndekeelu wa byónsò kànsèrè kàdi kàmushipa, bàpàtula byà mu dila bàbyèla mu kàbòmbi. Nènku bòbò bamanè kumulongolola kujikè, ne bamanè kulongolola bwà kumutèèka pa mèèsà à dipandilangana, yèyè e kuumvwa menemene cintu cyà pabwàci. Ki bòbò. . . yèyè kubiikila mungàngà mukàjì bwà kamufilayè ku—ku nkumba. Nènku, mmwenze ànu ùyaku, e kuupaye byónsò ànu bu pa ciibidilu. Nènku bà—bàyendè kàyikù mwà kucyùm vwa to cimupicile pa mutù. Nènku mu ditùkù diibìdì. . . Kabàkamujuula kuulu to. Ditùkù diibìdì, ànu mu byòbì, ànu paanyimà pàà didyà dyà mu dindà, ùmba ùkaseesuka kàbìdì. Pa nàнку ki yèyè. . .

44 Ngàngàbukà wendè kumubiikilayè. Munkaci mwà kushikunkila ne kudila, kwambayè ne: “Ncyènà ànu mwà kucyùm vwa to, nyèwù katùyi mwà kusangana cileeji cyà kànsèrè nànsha cimwè to. Nkayè.”

45 Mpindyewu, mpindyewu, bânà bèètù bàà bakàjì bàà mushinga mukolè, ncyènà ne cìndì mwà kwimanyina kaaba aka nànsha cimwè bu musadidi wa Kilistò ne kwamba cintu kampàndà cyà mafi to, bwalu ndi mufwànyine kulumbulwishiibwa ku ditùkù adi, ne kwipaciibwa, bu mwena lubombo.

46 Mpindyewu ne Díyi dyà Nzambì dibuulula, ncyàkasambidila Jeanne ne meeji matòdke kutàmba mungànusambididi amu nànsha, nwamònu’s. Twètù kuumuka ku kaamission kakesè aku, bamanyè ne disambila dyà diitabuuja dikaavwa dimana kusambila. Adi kukòsadi bwalu ànu mwaba awu. Díyi dyà Nzambì ndyambè nàнку, nwamònu’s: “Disambila dyà diitabuuja nedisungilè mubèèdì.”

47 Mpindyewu, Nzambì umweumwe wàkwondopa mwànà wa bakàjì wa Ngàngàbukà Dyer awu, Jeanne. . . Ncyènà mumanyè dìnà dyèndè mpindyewu to. Kàdi muntu awu kuupukilayè menemene Èvànjeeliyò mu kaabujimà. Diiyisha dyà ndekeelu ku èkèleeziyà awu, mwaba ewu’s ki yèyè ewu musòmbe ànu mwaba awu wènza byónsò, wàngata neetù mèèsà à Mukalenge, ne bikwàbò byónsò, mulongi wa ba-Baptistes ùvwa mulwè kùdì Mukalenge bwà dibàtiiza dyà Nyumà Mwímpè. Mpindyewu, bìdì ànu bileeja ne Nzambì ùdì ùshààla Nzambì.

48 Nènku ki ngàngàbukà, tatwèndè, muntu mulengalèngàayi, kàdi kacya kàvwa mwànji kumòna cintu kampànda cyà mùshindù awu cyenzèke nànsha.

49 Mpindyewu, Nzambi ùdi ne cikondo bwà maalu ônsò. Nènku bwà ku diitabuuja, nudi bônsò beena kwitabuuja. Míngà misangu bintu ebi bisòmbèla byènzeka bwà dyàkalenga. Nudi bamanyè's, Bible mmwambè ne: "Bidi bikwàta mudimu pàmwe bwà dyàkalenga."

50 Mpindyewu, nudi bavùluke Yobò, ne mateeta èndè ônsò awu anyi? Mpindyewu, aci kacivwa Nzambi munkaci mwà kunyooka Yobò to, kàdi civwa n'Nzambi munkaci mwà kwanyisha musadidi Wendè. Pa nàнку byônsò byàkakwata mudimu bwà dyàkalenga, nudi numòna's. Ne pashiishe Mukàndà wa Yobò wàkafùndiibwa bwà nkòngo yònsò, bu bujaadiki. Mpindyewu, Nzambi ùdi úcyenza bwà dyàkalenga.

51 Vùlukàayi ànu ne, ngàsambidì, ne mwoyi wànyì wònsò, disambila dyà diitabuuja. Paùdi ucìitabuuja, nènku mwaba awu, ke cìikalàci, ke cìikalà bwalu, shààla wèwè ànu—ànu mwindile bipeta.

52 Mpindyewu, bwà kubwela buludì mu—diyishi, (bààbúngi mbiimàne kuulu), diyishi dikesè dyà dilòòlò.

53 Nènku—nènku vùlukàayi ànu mpindyewu ne, ku—ku Ramada kwàka, nekwikalè bàmwè baakudi bimpè batàmbe ku mpungilu ewu wa ku Ramada musangu ewu, beena Kantu—ku—Byanza, pa nàнку nwènù. . .ku Ramada kwaka. Nàнку yikàlaayi batwishibwe bwà kubwela mu disangisha edi. Mwanèètù Oral Roberts neikalèku bwà dilòòlò dyà difestò adi.

54 Nènku, mpindyewu, ndikù ànu citùpà cyà Tucson, nengìmanyinè bwà Tucson. Tudi ne makwàbò kuntu kwàka, kàbidì, mu òmwè didì dilonda edi dilòòlò, pa nàнку byòbì byenzèke ne nwikale mu nyùngulukilu amu, èè, nwalwayi pèènu kuntwaku. Nènku nenwikalè ne cyà . . .kukènga pàmwe naanyi cipòòlò cikesè, bwalu ndi ne cyà kwakula ku wòwò awu. Pa nàнку nudi mwà kulwa nwènù ne mùshindù mu diibidì didì dilonda. . .dimwè dilwalwà dilòòlò ku Ramada Motel, mu Ramada Inn, ku Tucson. Nènku, mu bushùwà bwà bwalu, tudì bònsò bamanyè ne Phoenix ùdi ànu katùpà kàà buloba kàdi kanyùngùlùkile Tucson. Twètù bònsò tudì bamanyè aci, nudi numòna's, pa nàнку—pa nàнку nwalwayi bwà kumòna mùdi bantu bàà ku mukùnà bàsòmba.

55 Mpindyewu tùbuululàayaaku mu Bibles yetù mu Zekàayi 14, nshapità mwi6 ne wa 7, ndi njinga kubala bwà. . .bwà kupàtùlamù dyumvwija dikesè dyà cyena-bwalu cìndi njinga kwangata.

Nènku nebyènzekè mu ditùkù adi, ne bukènkè kabwàkwikala butòòke, anyi mifitù to:

Kàdi necìikalè ditùkù òmùwèpelè òmánya kùdì MUKALENGE, kadiyi dyà muunya, nánsha dyà butùkù to: kàdi nebyènzekè ne, mu díbà dyà dilòòlò nekwikalè bukènkè.

⁵⁶ Mpindyewu ndi njinga kupàtula mu eci ne: *Mùsànjeelà Wa Ku Ìbaamulòòlò*, bwà cyàdya- . . . bu cyena-bwalu ne: *Mùsànjeelà Wa Ku Ìbaamulòòlò*. Mu bushùwà bwà bwalu, tudi mwà kwikala ne baamisànjeelà mu bule bwà ditùkù dijimà emu, nènku kùvwà baamisànjeelà mu bule bwà ditùkù dijimà emu bàvwàYe mwakùle bwalu bwàbò, kàdi kùdì kùlwa Mukenji wà ìbaamulòòlò. Nènku tudi baswè kutàngila cyôci aci dilòòlò adi ne kwenza bu bàdì bàbwelamu mu mùshindù wà kàlaasà kàà Dyàlumingu, kwakula pa cyôci aci mu cipòòlò cikesè.

⁵⁷ Mpindyewu, twètù bònso tudi bamanyè cìvwà Zekàayi wàkula kaaba aka, bwalu wàkamba ne: “Nekùlwe ditùkù òìikalà dibadiibwe ne musinga kùdì Mukalenge, kadiyi dyà muunya anyi butùkù to; kàdi ku ìbaamulòòlò nekwikalè Bukènkè.” Mpindyewu, bu twètù bamanyè ne kadivwa muunya anyi butùkù to, divwa difwànyine kwikala ditùkù dyà—dyà—dyà mifitù, dyènzè bu ditùkù dyà maciima.

⁵⁸ Nènku twètù bònso tudi bamanyè ne dishidimuka ndibangile lwendu ku esètè ditàngile ku wesètè. Dishidimuka dyà kale menemene ditùdè naadi n’Chine. Nènku dishidimuka ndibangile lwendu kuumukila ku esètè ditàngile ku wesètè, bwalu didi dyènda dilonda díbà, nènku mpindyewu tudi baye njila mujimà too ne ku Côte Ouest. Twètù baye kupite apu, tudi twalukila cyàkàbidì ku Esètè, nwamònu’s. Pa nànkù tudi ku ndekeelu kwà njila.

⁵⁹ Tudi twitabuuja, bu Èkèleeziyà, ne Èvànjeeliyò ùkaadi ànu bu mufikè ku ndekeelu. Tudi twitabuuja ne baamisànjeelà banène munda mwà bikondo, mu matùkù à ndekeelu aa, nkàmà yàbùngì yà bidimu bishààle ebi, mbalwangane bwà bintu binène ebi; dibingishiibwa ku diitabuuja, Luther; dijidiibwa, kùdì Wesley; dibàtiiza dyà Nyumà Mwímpè, kùdì beena Mpenta. Tudi twitabuuja ne bintu abi bìdì bìfikisha mubidi mujimà kudyoyiibwa, bu mùdì cyà mubidi ne cyà nyumà.

⁶⁰ Díbà didi mwànà ùledìibwa mu mùshindù mujaalàme, cintu cyà kumpàla ncinyi? Cintu cìdì cipàtuka, mmâyi; cintu cìdì cìlonda, mmashi; ne cintu cìdì cìlonda, mmwoyi.

⁶¹ Yone wa Kumpàla 5.7 mmwambe ne: “Kùdì bàsàtù bàdì bàfila bujaadiki mu Dyulu, Taatù, Díyi, ne Nyumà Mwímpè: ne bàsàtù aba bàdì umwe.” Bòbò *bàdì* Umwe; kwèna mwà kwikala ne Taatù kùyì ne Mwànà to, kwèna mwà kwikala ne Mwànà kùyì ne Nyumà Mwímpè to. Nwamònu’s, bòbò bàdì Umwe. “Kàdi kùdì bàsàtù bàdì bàfila bujaadiki pa buloba, màyi, mashi, ne Nyumà: nènku bàdì bàpetangana mu umwe.” Kabèena umwe to, kàdi bàdì *bàpetangana* mu umwe. Nwamònu anyi?

⁶² Mpindyewu, wêwè udi mwà kulingishiibwa kùyi mujidiibwe to; udi mwà kujidiibwa kùyi ne Nyumà Mwîmpè to. Nwamònu anyi? Nyumà Mwîmpè ùdi dibwela dyà munda dyà Bwikadi bwà bukolè bwà Kilistò, mu Nyumà. Mpindyewu, tudi tumòna ne cyà mubidi cidi cileeja cimfwànyì cyà cyà nyumà, pa nànkù Èkèleeziyà ùdi mu diboba dyèndè dipwile mpindyewu: dibingishiibwa, dijidiibwa, dibatiiza dyà Nyumà Mwîmpè. Tucidi ànu tufùmìna ku dilonga Bikondo Mwandamutekète byà Èkèleeziyà, kwètù, tubileejiila mu bimfwànyì bilenga menemene.

⁶³ Nènkù, byòbi biinè, kùdikù muntu muumvwe mikàbà yà mèyi ayi pa bikondo byà èkèleeziyà anyi? Musangu wà ndekeelu ungàakazòlà bikondo abi ku mbòdi kwàka, ne Taatù wa mu Dyulu mmumanyè ne eci ncilelèlè, pangàakabikùmbajà ne mwànyì mwònsò múmvwà naamù, ku busonsodi bùvwà Nzambì mwà kumpèèsha, Mwanjèlò wa Mukalenge unùdi numòna mu fòtò (bààbùngì mbamòne fòtò awu, kí mmwòmò anyi, Bukènkè abu?), Wàkapweka dyàkàmwè mu cibambalu, kumpàlà kwà bantu batwè ku nkàmà yisàtù anyi nkàmà yinaayi, e kuyayè dyàkàmwè ku luseke lwà cimanu (bu Bukènkè kampànda mùshindù awu) kàdi e kuzòla bikondo byà èkèleeziyà abi Nkààyèndè. Twètù bònsò kwimana mwaba awu kushààla baBùtàngile, bajòjè mùvwàBo bùzòla cikondo cyàkumpàlà cyà èkèleeziyà, ciibìdi, ciisàtù, ne ciinàyi, ciitànù, ciisambòmbò, ne cyà mwandamutekète.

⁶⁴ Mpindyewu, kùdi bantu bàdi basòmbe mwab'ewu bàdi bantèmù bàà cyòci aci. Elàayi cyanza cyènù muulu ní bìdi nànkù. Bible mmwambe ne: “Mukana mwà bantèmù bàbìdi anyi bàsàtù.”

⁶⁵ Muntu yònsò musòmbe mwaba awu, wèla mbila mikolè ne bikwàbò byònsò, mèmè kwamba ne: “Mbwòbò abu! Mpindyewu, s'nuvwa bajinge kuCimòna, muntu yònsò ùdi ànu mwà kuCitàngila.” Dìbà kabambakeena mundaamuunya, kacya cyàshààla ciimàne ànu mwaba awu ku cimanu, ne kuzòla bikondo byà èkèleeziyà abi, ne cipimu cyàbi cyà Nyumà, ne pashìshe mîdimà bwà kuleeja ne Nyumà ùkaavwa mufinakaja mupàtula ne mukabwelè mu Cikondo cyà Mifitù ne mwalùkile cyàkàbìdi, ànu mùshindù ùmvwà mucizòle awu. Nènkù tudi naaci, fòtò yàci, ne hintu byònsò bizòdiibwe, bilembeleja ku cimanu. Kàdi's ki cyòci aci ànu pyòpyòpyò. Cidi ne cyà kwikala cileeja ne Nyumà wa Mukalenge ùvwa musankishiibwe ne aci civwa cikùmbàne, bwalu Wàkaalukila ne kushindika ne aci civwa cijaalàme.

⁶⁶ Nènkù tudi ne mwoyi mu Cikondo cyà Èkèleeziyà wa Laòdikiyà, cikondo cyà èkèleeziyà cibanjike cidi cyèla meeji ne kabèèna dikèngela dyà cintu nànsha cimwè to, kàdi kabàyi bamanyè ne bàdi butakà, bakèngeledi bàà luse, bampofò; kàdi kabàyi bacimanyè nànsha, nwamònu's. Mpindyewu, bònsò abu, munkaci mwà kufwànyikija.

67 Mpinyewu, dîbà òm̀wè̀dìm̀wè̀ dídì díteema ku... dípà̀tuka ku Esètè ndyòdì dîba òm̀wè̀dìm̀wè̀ dídì díbwela ku Wesètè. Mpindyewu, twǎnjààyi kwimana katancì bwà kufila nshìndameenu wa diyìsha edì. Tudi bamanyè ne dîbà, aci's d-î-b-à, ndongolwelu wa mabùlungà. Kàdì M-w-â-n-à wa Nzambì wàkapweka, mu dikenka dyà Nzambì ne Bukênkè bwà Nzambì, mu Esètè. Kàdì tukàadi ne bidimu binunu bìbìdì mpinyewu, bìbàdìibwe kùdì Mukalenge, Yèyè kwamba ne: "Necifwànyine kwikala cikondà cìkàlà kaciyi munya anyì butùkù, cyenzà ànu bu ditùkù dyà mifitu; kàdì mu dîbà dyà ìbaamulòòlò nekwikalè Bukênkè."

68 Mpindyewu, bu nwènù mwà kumòna, Nyumà Mwimpè wàkapwekela bantu bàà ku Esètè dyàmbedi. Pashiishe twètù kupeta cikondo cyà dikashààla bàà mu èkèleeziya ne tuntù tukesè twà kutwà byanza, ne tundululu tukesè twà kukòkelanganapù. Kàdì pashiishe mu cikondo cyà ìbaamulòòlò, mu citùpà cyà buloba cyà ku Wesètè, Bukênkè nebwikalèku. Nènku tudi mu cikondo aci patùdì twakula apa! Dishidimuka ndilwè bu mùdì òm̀wàlã dinène difùmina ku Esètè, dyènda dikùngwijangana ne mpèkaatù misangu yònsò pàvwàdì dyènda dilwa apu, kàdì ndikadìbyànkule ku Côte Ouest bu mùdì cimano cipùmbishi cyà díyì, e kukùlukaci cyànyimà, kàdì mwaba mutàmbe kunyanguka ùndì mumanyè nku Côte Ouest. Cintu kanà ciwùkajingi kwelela meeji aci, bàdì naaci, mpèkaatù, cinyangu, dishipa dyà dibàkà, disèlangana, Hollywood, bwinà menemene bwà ifernò! Ncyà bushùwà menemene.

69 Ndi ngiitabuujã cijila cishùwashùwàlè cyà mu Bible. Ne cyèna ngiitabuujã dibola ne cintàkanyi cibolè cidì ciimàne bu citembelu kumpàla kwà cisàmbà cyètù nànsha, cìbìkìdìibwa ne Hollywood. Ne ntu misangu yònsò ànu mbèngangana naaci. Nènku ndi ngèèla meeji ne muntu udi ne Nyumà wa Nzambì munda mwèndè awu ùvwa mwà kucilwisha, bwalu Nyumà wa Nzambì ùvwa mwà kufila bujaadiki kùdiye ne "mbìbì."

70 Mpindyewu ndi ngèèla meeji ne awu ngumwe wa ku... Tuvwa ne ciibidilu cyà kuya ku Paris bwà kupeta myòdelè yà bakàji butakà bwà kuvùula bakàji bèètù bilàmbà, mpindyewu Paris ùkaadi ùlwa munwemu bwà kwangata yètù. Nwamònu anyì? Hollywood ngudi ulombola buloba. Ne myòdelè yà butaka yitùdì naayi yà leelù ewu, mmitàmbe yà France (elàayi ànu meeji pa bwalu abu!), mwaba wà bantu bakwàciki bàà maala, balwànganyi bàà mvità, wà nsòmbelu wa masandi, kàdì nànsha nànkù Hollywood mmuwùtàmbe ànu menemene.

71 Nènku télévisiyò yètù yònsò, cintu cyònsò cidìbo bàpìcishakù kabàtu bacitaata to, ànu minèkù yà manyanù, ne cinyangu cibolè, mbidifinde mu bintu byònsò. Nènku bantu, dyabùlù... Katùvwa mwà kutùma bânà bèètù balela mu—mu sèndemà bidimu bishààle ebi nànsha, twètù beena Mpeta bàà ku cibangidilu, kàdì mpindyewu dyabùlù mmutwele kàmwè ne

mmucitèèke ànu buludi mu nzùbu yètù. Nudi numòna anyì? Pa nàнку mmubwejè ànu sèndèma buludi mu nzùbu.

⁷² Mpindyewu, nènku cidi—cidi—ncintu cyà cyènza bwôwà menemene bwà—bwà kwela meeji ne buloba mbubwélè mu cinyangu cyà mùshindù ewu, bwalu lukutukutu lwònsò alu, nudi numòna's, nènku ndudìbwinke ànu mùshindù ewu, lulwè ne dishidimuka.

⁷³ Kadi díbà dyònsò. . . Nènyiishè dimwè dyà ku matùkù àdi panshì aa, bu Mukalenge mwà kwanyisha, mu ndambù wa matùkù, pa *Dibala Dya Cìmpingà*. Nudi bamanyè's, ndi—ndi ntèkemena ne nudi mu cintu, ne pa nàнку tudi—tudi ànu tumòna cidi munkaci mwà kwenzeka. Nzambi mmukumbane mwà kwenza cintu kampànda ne Èkèleeziyà Wendè, kàbidi, díbà dyònsò, nudi numòna's, pàdi maalu aa munkaci mwà kwenzeka apa. Nènku mpindyewu tukàadi ku cikondo cyà nshùkidilu, twasàkidila Mukalenge!

⁷⁴ Cikondo ne cikondo cyònsò cìvwa ne mukenji wàci ne mùsànjeelà. Nzambi mmutàbàlèèle cyòci aci. Cyònsò. . . Nànsha mene mu bikondo byà èkèleeziyà, tudi tusangana ne cyònsò cìvwa ne mùsànjeelà, nènku mùsànjeelà yònsò wàkapiçila mu cyèndè cikondo; ki mukwàbò kubwelaye, ne mukwàbò awu kupàtuka; ne mukwàbò kubwelaye; ànu nàнку too ne ku cikondo cyà mwandamutekète cyà èkèleeziyà; mùtooto wònsò, mwanjèlò yònsò wa èkèleeziyà, mùsànjeelà yònsò.

⁷⁵ Nènku tudi tusangana ne, ku cikondo cyà èkèleeziyà cyà ndekeelu, mu Bwàkabuulwibwà 10, kùdi ne cyà kwikala mwadi wà mpungi, ne kwàkumvwika mēyi mwandamutekète ku. . . Kabàvwa babiitabile bwà kufùnda to. Kàdi àvwa matwibwe citampì paanyimà pàà Mukàndà, bitampì mwandamutekète bivwa paanyimà pàà Mukàndà. Paanyimà pàà Mukàndà mumanè kufùndiibwa, díbà adi Wòwò mmutwibwe citampì paanyimà apu ne bitampì mwandamutekète. Mpindyewu, muntu nànsha umwe kì mmumanyè cidibi to. Kàdi Yèyè wàkamba ne: “Mu matùkù èlà mwanjèlò wa mwandamutekète mpungi wa Mukenji Wendè,” awu mmwanjèlò wa pa *buloba*, mpindyewu.

⁷⁶ Bwalu ewu Mwanjèlò wàkapweka ùfùmina mu Dyulu; ne ewu ùvwa pa buloba; *mwanjèlò* ùtu “mùsànjeelà,” mùsànjeelà mutùmina cikondo.

⁷⁷ Nènku pashiishe tudi tumòna ne Yèyè wàkatèèka Wendè. . . wàkadi ne mwanzankòngòlò kumutù Kwèndè ne kujuula cyanza Cyèndè muulu ne kudicìpa kùdi Ewu udi ne mwoyi kashidi ne kashidi, ne kakwàkwikala kàbidi cikondo nànsha (pàkaakula mēyi mwandamutekète aa, mikungulu mwandamutekète yàkumvwija mēyi àyò). Ki Yèyè kubàmbila ne: “Kanùfùndi to, kàdi Citwayi citampì.” Nènku twàkasangana ne cìvwa paanyimà pàà Mukàndà.

78 “Kàdi pààjikija mwanjèlò wa mwandamutekète Mukenji wèndè, kwamba kwèndè kwà cipròfetà cyà ditùkù edi, dībà adi ki bwalu busokoka bwà Nzambi kujikabò,” muntu yònsò mmumanyè ne Bible ngudi wàmba nànkù awu. “Bwalu busokoka bwà Nzambi, cidì Nzambi aci, bwà ne Nzambi nganyi, ne byònsò bìdì bitàngila mùshindù wà kubwela mu dibatiiza ne bikwàbò, byònsò abi bìvwa ne cyà kujika ditùkù adi.”

79 Mùsànjeelà yònsò mmupetè mukenji wèndè, ne—mukenji ne mùsànjeelà wa cikondo aci. Nènku mbitàmbe kumwèka ne mùsànjeelà yònsò. . . Tudi mene basangàne mu bikondo byà èkèleeziyà (ne dilòòlò edi netwàlukilè mu Dipungila Dikùlùkulu bwà kusangana ne ncintu cimwècimwè aci) cyà ne Nzambi ùdi ùtùma mùsànjeelà wa cikondo aci kundekeelu kwà cikondo; misangu yònsò ànu kundekeelu, kî nku mbangilu nànsha. Kundekeelu!

80 Mpindyewu bu mwàkajika cikondo cyà Luther, ki pashiishe Wesley kufikayi. Nènku dībà dyàkajika dijidiibwa dyà Wesley, ki cikondo cyà Mpenta kufikaci. Nwamònu anyi? Ànu mùsànjeelà ke usòmbèla wakàngula mukenji mupyamùpyà lwà kundekeelu kwà wà kale. Mu cikondo cyònsò mmùtù aci cyenjìibwe. Tudi bamanyè ne aci mbulelèlè.

81 Eci ncyambùlùdiibwe cikondo cyònsò mu Bible. Tudi tucisangana mu Mifundu minsantu, ku mbangilu too ne ku ndekeelu, bwà ne ànu ku ndekeelu menemene kwà cikondo cyà kale ne cipyacìpyà cidì cibwela, cikondo aci cidì cijika ne cikondo cipyacìpyà cidì cibwela, Nzambi ùdi ùtùma mùsànjeelà.

82 Nènku ànu bu pa ciibidlu—pa ciibidilu, cikondo cyònsò ku dilwa dyà mùsànjeelà, citu misangu yònsò ànu dyaluja dyà ku Dìyi, kacitu cipangila nànsha. Vùlukàayi ne, Edi ndibuulula mu kaabujimà dyà Yesù Kilstò, kakwènà mwà kwikala cintu cikwàbò cisàkidiibweKù anyi cyuumùshiibweKù to. Ndibuulula mu kaabujimà dyà Yesù Kilstò. Nènku mùshindù ùmwèpelè ùtùdì mwà kwikala batwishìibwe: cintu kampànda cyòcì cijuukè munkaci mwètù cidì cibèngangana ne dibuulula edi, dībà adi ncyà mafi. Nwamònu anyi? “Kwalukila ne lùbilu lwònsò ku Dìyi!” Nènku misangu yònsò dilòmba ànu dyalukila.

83 Ne mu mwaba ònsò mu Mifundu, mwaba ònsò, Nzambi ùtu ùkwàta mudimu ne mupròfetà bwà kwaluja cikondo aci, misangu yònsò. Kakùyì pà kubi- . . . To, musangu nànsha ùmwè kàtu mwanji kupangila to, Ùsòmbèla ànu wàtùma mu—mupròfetà! Nènku mpindyewu bwà cinyi Ùdi wènza nànkù? Mbwalu Bible ùdi wàmba ne: “Nkùdì mupròfetà kùtù Dìyi dyà Nzambi dilwa,” musokolodi wa Dìyi.

84 Mpindyewu, ndi—ndi—ndi ntèkemena ne ki mbangùmvwè bibì to. Nwamònu anyi? Ncyèna ne meeji à kungumvwabo bibì to, kàdi ndi muswè kwikala ne meeji matòòke ne lulamatu ku dibiikila adi. Tudi baswè kwikala nànkù.

⁸⁵ Mpindyewu, Nzambì ùtu misangu yònsò ànu ùkwàta mudimu ne—mupròfetà, muntu kampànda. Wèwè mwangàte musùmbà wa bantu, udi upeta mmwènenu mishìilàngàne; nwamònu's, muntu ne muntu, bantu bàbìdì. Kacya kàtu mwànji kwikalakù ne bapròfetà banène bàbìdì pa buloba mu cikondo cìmwè nànsha. Ùtu wàngata umwe, pa nàнку mukwàbò ùdi mwà kwangata kaaba kèndè bwà ditùku dikwàbò, mukenji mukwàbò. Kacya kàtu ne bàbìdì nànsha, Ùdi ne umwe ku cikondo.

⁸⁶ Nènku Nzambì udi kàyì mpwilu kacya kàtu mwànji kushintulula ndongamu Wèndè nànsha, Ùdi ànu ne cyà kushààla misangu yònsò ne cyàkabangàYe naaci aci. Ki bwà cinyi tudi mwà kwikala ne dyeyemena mu cidiYe wamba aci, Yèyè kèna mwà kushintuluka to. PìikalàYe wàkasungila muntu pa cishìmikidi cyà diitabuuja dyèndè mu Nzambì, muntu udi ulonda awu neikalè ne cyà kusungidiibwa mùshindù wùmwèwùmwè awu.

⁸⁷ Pààkenza Nzambì mwaba ùvwàYe mwà kubwelela mu bwobùmwè ne cifùkùibwà Cyèndè, Adàmà wàkateeta kudisebela njila nkàayèndè, ne kwenza mabèji à mfigi bwèndè yèyè ne bwà mukàjèèndè, bwà kwenza bivwàlù. Nzambì wàkabibènga. Nènku ki Nzambì kwangata dipàngadika pa ndongamu anyi nshindameenu uvwaYe mwà kutwilangana ne muntu ne kubwela nendè mu bwobùmwè, ne cyòci aci civwa mashi meela panshi. Nènku kàtu mwànji kushintulula aci kacya.

⁸⁸ Mpindyewu, bu ba-Méthodistes kùdi ba-Baptistes, tudi mwà kulabulangana ku cyanza muntu ne mukwèndè. Kàdi pa cishìmikidi pankaci pàà ba-Méthodistes ne ba-Baptistes katwèna ne bintu byà cinsàngansàngà to, Mémè ndi ntùwila mu disungù dyà ba-Baptistes ne wèwè utùwila mu disungù dyà ba-Méthodistes, anyi aba anyi aba. Kàdi kùdi cishìmikidi cìmwèpelè mùdi beena kwitabuuja bònsò mwà kutwilangana, cidi mwinshì mwà Mashi meela panshi. Ki mwaba wutùdi tutwilangana ne tutèeka bintu byònsò ebi ku luseke. Pa nàнку katwèna mwà kubwela bònsò mu bulongolodi bùmwepelè to, katwèna mwà kwenza aci to.

⁸⁹ Malongolodi makesè aa, ngèèla meeji ne Nzambì mmubwelèmu, cintu cyònsò mu kaabujimà. Kàdi bantu... bwalu tudi bashìilàngàne. Mulùme yònsò ùdi ùmòna bishìilàngàne, muntu yònsò ùdi ùmòna bishìilàngàne, kakwèna meeji àbìdì àdi à mwomùmwè pyòpyopyò to. Kakùtu bantu bàbìdì bàdì bàà mwomùwè pyòpyopyò nànsha, mùtùbu bàmba; kakùtu mawùlu àbìdì mafwànàngàne to, katùtu tushonyi twà byàlà tubìdì twà mwomùmwè nànsha. Nwamònu's, tudi benza bashìilàngàne, nàнку awu tudi ne cyà kwikala ne tusumbu tushìilàngàne.

⁹⁰ Kàdi Nzambì ùtu misangu yònsò ànu ùkwàta mudimu ne muntu-nkààyà. Yèyè kèna ùkusungila bwalu udi Méthodiste

to; Yèyè kèna ùkusùngila bwalu wèwè udi Baptiste to; Yèyè kèna ùkusùngila ne bwalu wèwè udi mwena Mpenta to. Ùdi ùkusùngila bwalu Yèyè mmukwàte *neebè* mudimu pàà nkààyebè! Nènku udi musùngidiibwè pa cishimikidi aci, cyùdi muciiitabile aci. Nànku ki bwà cinyi, Nzambi, bwà kukwàta neebè mudimu, Yèyè kèna ùkwàta neebè mudimu mu bulongàme bwà èkèleeziyà Wendè to, Ùdi ùkwàta neebè mudimu bu muntu-nkààyà.

⁹¹ Ki bwà cinyi pàakatùmà Nzambi bapròfetà Bèndè, baamisànjeelà Bèndè bàà Dipungila, Wàkakula ne muntu umwe, ne yèyè muntu awu ùvwa ne cyà kutwàla Mukenji. Bakwàbò bàvwa buumukila kùdiyè, bènda bàtwàla Mukenji, myaba yònsò. Kàdi kùvwa ne cyà kwikala cimamwèndè wa bukalenge cimwèpelè. Nzambi ùvwa ànu naaci kwònsò eku. Ndi ne kusàkidila bwà mùdiYe naaci dilòòlò edi; n’Nyumà Mwímpè, mu bushùwà bwà bwalu, twètù bònsò tudi bamanyè nànku. Mpindyewu, kí nkasùmbù kampànda to, kàdi Nyumà Mwímpè ke Ciimamwèndè wa Bukalenge cyà Nzambi. Ki Mùsànjeelà wa Nzambi wa díbà adi.

⁹² Mpindyewu, bwalu bìdi ne, kùdi mupròfetà ki kùtù ànu misangu yònsò Díyi dilwila, yèyè mwikàle mupròfetà mulelèlà wa Díyi, Nzambi ùdi ùshindika Díyi Dyèndè kùdi mupròfetà awu.

⁹³ Mpindyewu, kùdi bapròfetà bàà mashimi bààbùngì, tutu naabò mu bikondo byònsò. Tudi twalukila mu Dipungila Dikùlùkulu, tubàmòna bàjuuka bàakula mu Dìna dyà Mukalenge, nènku cìvwa—kacìvwa cilelèlà to. Nzambi kàvwa mufwànyine kwikala naabi bwalu to. Yèyè kàtukù kacya ùshindika cintu nànsha cimwè to pa kuumusha Díyi Dyèndè Yèyè mwinè. Nànsha byà munyi, Yèyè kí mmufwànyineku kwenza maalu Èndè mu mùshindù awu to. Nwamònu anyi?

⁹⁴ Nwènù vùlukàayi ànu ne, Nzambi ùtu ùshindika ànu Díyi Dyèndè! Nènku ànu mupròfetà mulelèlà ke. . . Nènku mùshindù ùmwèpelè unùdi mwà kwamba ne mmulelèlà anyi kí mmulelèlà, ùdi ànu ku Díyi. Ki mùshindù wa kumulumbulwisha ngwòwò awu.

⁹⁵ Mpindyewu bu nwènù mwà kumòna, byènzè bu matùkù àvwà—àvwa Miiikà, bàakajuuka kùdi bapròfetà nkàmà yinaayi bàà beena Ebèlù, kumpàlà kwà Aakàbà ne Yèhoshàfàta, kwambabò ne: “EMU MMÜDÌ MUKALENGE WAMBÀ: ‘Nda kuntwaku neùtuutè dyàkalenga.’” Bilondèshile maalu mùdiwu menemene bàvwa babingè. Pashiishe ke Miiikà kubiikidiibwayè mu cyalu, mwinè awu nguvwabò banyookè bònsò bwàbò. Mpinyewu byàkamwèka bu ne. . . Nkàmà yinaayi (ncyènà nswa kwamba ne mbapròfetà bàà Baalà to) bapròfetà bàà beena Ebèlù kajuukabo ne díyi dimwè, bàmba ne: “Wèwè bànda ku Lamòtà-gilàdà, Mukalenge neàkubènèshè kàbìdi neùtuutè dyàkalenga.”

Ne bantu abu kabàvwa beena lubombo to, kakùyì mpatà to bàvwa basonsòdiibwe! Kàdi dyàbò. . .

⁹⁶ Dìbà adi bwà cinyì kwàkalwa mulùmyàna mukesè uvwa ubiikidiibwa ne—ne Miikà, uvwa mwàna wa Imlah ewu, kàdi kwalukilaye kwamba cipròfetà cibèngangana ne cyàbò? Mpindyewu, aci cyàkakèngela bukìtu, cyàkakèba ditwishiibwa. Nwamònu anyi? Kàdi mmunyi mwàkamanyaye ne ùvwa mubìngè? Bu nwènù biimàne mwaba awu, mmunyi munùvwà mwà kucìmanya? Mùshindù ùmwèpelè unùdi mwà kwenza, ngwa kwangata cìdi muntu wàmba ne kucìpàlakaja ne Dìyì. Nwamònu anyi? Mpindyewu, Miikà ùvwa menemene ànu pa Dìyì, bwalu Eliyà, mupròfetà munène ùvwa ne Dìyì dyà Mukalenge awu, wàkadi mwelè Aakàbà mulawu ne Izàbèlè ne bònsò. Nwamònu anyi? Kàdi mmunyi mùvwà Nzambi mwà kucyùnguluka ne kubènesha cintu cìvwà ne mulawu pambidi pààci aci? Nwamònu's, pa nàнку kacìvwa mwà kukùmbàna to.

⁹⁷ Mpindyewu, tudi tusangana ne Nzambi ùdi ùshindika Dìyì Dyèndè. Dìyì dyà mupròfetà, yèyè mwikàle mupròfetà, dìbà adi didi. . .yèyè ùdi wàkula bilondèshìle Dìyì. Bible mmwambè mu mwaba kampànda, wàmba ne: “Bòbò kabàyi bàakula bilondèshìle mikenji ne bapròfetà to, kakwèna Bukènkè nànsha bukesè munda mwàbò to.” Pashiishe kubiikila. . .Dìbà adi mùsànjeelà ewu ùdi ùbiikila Babiikidiibwe bwà kupàtukabo abu. Mmubìngè ku Dìyì dyà Nzambi, didi dìleeja ne mmubìngè.

Mònaayi, mònaayi ne, mpindyewu netùteelè bantu ndambù ne kutèeleja.

⁹⁸ Noà ùvwa ntèmù wa Nzambi bwà cikondo cyà ndekeelu cìvwà cidyanjìdile mvùla yà Noà. Mpindyewu, tângilàayi mùvwà mukenji wèndè ùbèngàngana ne bantu bònsò bàà kumpàlà kwà mvùla yà Noà. Mòna's, muntu awu ùvwa ùbadiibwa bu munyùngùlùke lungènyi. Mòna's, wèndè. . .Kàdi, nànsha nàнку, yèyè ùvwa bulelèlè ne Dìyì dyà Mukalenge. Mpindyewu, Nzambi ùvwa mwakùle ne Yèyè “kàvwakù mwà kutwàla mpèkaatù to,” ki Yèyè. . .pààkabangà bantu kwenza mpèkaatù, dìbà adi Nzambi kutùluka ne Noà wàkayiisha mukenji wa cikondo cyà nshìikidilu. Cìvwa ncinyì mene aci? Ànu kumpàlà menemene kwà cikondo cyà ndekeelu, ki pààkajuukà mùsànjeelà ewu. Nzambi wàkatùma mupròfetà ewu ne mukenji bwà cikondo cyà nshìikidilu. Nènku wàkasekiibwa, kupwekeshiibwa milongo, kwelulwidiibwa, kàdi kusùngilaye ànu bàà mu nzùbu mwèndè nkàayabò. Ncyà bushùwà. Muntu nànsha umwe kàvwakù mwà kumwitabuujà to. Kàdi yèyè ùvwa ne mukenji wa cikondo cyà nshìikidilu. Mpindyewu, bònsò bàvwa kabàyi biitàbùùje bààkapiiishiibwa, ne aba bààkiitabuujà mukenji bààkasùngidiibwa. Nzambi kubàpèèsha Mwoyi ne bààkasùngidiibwa, kàdi aba bààkabèngà kuWitabuujà bààkajimina.

⁹⁹ Mpindyewu, ndi mfwànyikija cintu kampànda. Mònaayi Nzambi, mudiYe mwenze misangu yisàtù eyi.

¹⁰⁰ Ne isàtù ki nombà mupwàngàne wa Nzambi. Nzambi mmupwàngàne mu isàtù, bu mùdi: “Taatù, Mwànà, ne Nyumà Mwímpè,” ne “dibingishiibwa, dijidiibwa, dibatiiza dya Nyumà Mwímpè.” Yèyè mmupwàngàne, bwalu isàtù yidi Bwendè “bupwàngàne.” *Itaanu ùdi* nombà wa “ngàsà.” Mwandamutekète ùdi. . . Nombà wa “dikuukwila,” *dikumi ne ibidi*. *Makumi ànaayi ki* nombà wa—wa “dikèngeshiibwa.” Ne *makumi àtaanu* ki “cyanga,” dikuukwila. “Mpenta” mbwena kwamba ne *makumi àtaanu*. Nènku, Mòsà wàkateeciibwa matùkù makùmi ànaayi, matùkù makùmi ànaayi Kilstò wàkateeciibwa, nudi numòna’s. Ne bimfwànyì byònsò abi. Mpindyewu, Nzambi ùdi mupwàngàne mu isàtù.

¹⁰¹ Kùdi tubùtù túsàtù. Kàmwè kàà ku tótò, mpààkabwela Noà *mu* bwàtù; musangu mwibìdì, Lotà wàkapàtuka *mu*—*mu* Sodomà. Tàngilàayi, Yesù wàkabàtèèla ne: “Ànu mwàkadìbi mu matùkù à Noà ne mu matùkù à Lotà amu, ki mwikalàbi kàbìdì ku dilwa dya Mwànà wa muntu.” Tàngilàayi! Umwe wàkabwela *mu*, mukwàbò wàkapàtuka *mu*, ne udi ulondà ùdi ùbànda *muulu*. Uh-huh. Nwamònu anyi? Uh-huh. Ùbwela *mu*, ùpàtuka *mu*, ùbànda *muulu*! Mpindyewu, ki bulongàme bwà Mukalenge mbwòbù abu. Nwamònu’s, Yesù wàkatèèla bapròfetà bàbìdì abu. “Ànu mwàkadìbi mu matùkù à Noà,” nwamònu’s, “ne ànu mwàkadìbi mu matùkù à Lotà amu,” Abraham mwikalè mupròfetà, “ànu mwàkadìbi, ke mwikalàbi kàbìdì mu dilwa dya Mwànà wa muntu.” Nwamònu’s, ùpingaja mèsù paanyimà kùdìbo.

¹⁰² Mpindyewu, Mòsà, mupròfetà mukwàbò, ku ndekeelu kwà cikondo cyà beena Èjiipitù. Tudi tujandula ne pàvwà Nzambi ne cyà kusungila cisàmbà Cyèndè, kàdi beena Èjiipitù bàvwà bàbàkèngeshe bikolè be, ne babàtèèkèle babènzeji bàà midimu, babàkòokeshi kumutù kwàbò, èyowà’s wè. Nènku pashìishe kumpàlà menemene kwà kabùtù kààbò, Nzambi, ànu bu misangu yònsò, Yèyè ùvwa ùtuma mupròfetà ne Dìyì dya Mukalenge. Vùlukàayi ne, mupròfetà ùvwa menemene ùmanyisha cìvwà Nzambi (nkàmà yà bidimu kumpàlà kwà cyòcì aci, bidimu nkàmà yinaayi ne byà mu njila kumpàlà kwà cyòcì aci) wàkadi mulayè Abraham, bwà ne dimiinu dyèndè dìvwà mwà kusòmbela mu buloba bwenyi, kàdi Yèyè ùvwa mwà kubàpàtula ne cyanza cyà bukolè. Nudi bamanye’s, ku cipuka cìvwà cilakuka kapyà pàvwà Mòsà mutuutakèene ne Nzambi, ne Yèyè kumwambila ne: “Ndi mùmvwè mikèmù yà cisàmbà Cyànyì, Ndi mumòne ntàtù yàbò, ne ngávùluku cipungidi Cyànyì.” Ùvùluka Dìyì Dyèndè!

¹⁰³ Vùlukàayi ne, Yèyè ùcìdì ànu ùvùluka Dìyì Dyèndè! Nwamònu anyi? Yèyè kàtù ùpangila to, Ùdi ne cyà kwenza cintu cìmwècìmwè aci musangu wònsò. Cìndì ngambila bintu ebi,

mbwà twamòna mwà kubilama mu meeji ènù ne kwelanganapù meeji. Nànsha nwènù bàvwà bàsaama; nudi bwúmvwè ne ngambì ne “bàvwà” bàsaama.

¹⁰⁴ Mpindyewu, mònaayi mpindyewu ne, nwènù bônso nudi ne cya kuvùluka eci, ne Nzambì kèna mwà kushintuluka to! Yèyè n’Nzambì udi kàyi ùshintuluka to. Bikondo bitu bishintuluka, bantu bàtu bàshintuluka. Nzambì kènà mpwìlu to, Yèyè kènà mwà kushintuluka to! Dyèndè. . . Yèyè ùdi ne cyà kushààla umweumwe awu, makèlèlèlè, leelù, too ne kashidi, Yèyè ùdi ne cyà kushààlakù misangu yònsò. Nènku twètù twitabuuja ne Eci n’Dìyì dyà Nzambì, tudì mwà kutèeka dyeyemena dyètù pa cintu kanà cyònsò cidìYe mwámbe aci. Nwamònu anyi?

¹⁰⁵ Mpindyewu, nudi numòna mwaba awu mùdi mukenji Wèndè wùlwa, mùdiYe ùtùma mukenji Wèndè. Yèyè kènà mwà kushintulula aci to, Yèyè ùtu misangu yònsò ànu mucyènzè. Ùdi misangu yònsò ne cyà kushààla umweumwe awu. Ki mùshindù wikalàYe misangu yònsò ùcyènza. Mpindyewu, vùlukàayi ne, ndìbà kàayi didìYe ùcyènza adi? Ànu kumpàla menemene kwà kabùtù aku, ànu ku ndekeelu kwà cikondo. Ki cikondo cidìYe ùtùma mukenji Wèndè bwà kubiikila cisàmbà Cyèndè bwà kupàtuka, (bàtu ànu misangu yònsò bàbàkòndakaja), kàdi’s ki bòbò bàlwalwà aba.

¹⁰⁶ Mpindyewu, mu matùkù à Mòsà, beena kwitabuuja bàvwà basùngidiibwe, beena bupidyà bààkabùtuka.

¹⁰⁷ Aba bààkiitabuuja mukenji wà Mòsà wà kùdi Nzambì awu, mpindyewu, kabàvwà mwà kwenza nànu bu Mòsà kàyi mushindikiibwe kùdi Nzambì nànsha ne ùjaadika ne Dìyì dyà Nzambì òvwà nendè. Cyòci aci cyàkamwenza mupròfetà. Wàkapàtuka pambèlu apu kwambayè ne: “Mààlabà, pa dìbà edi, nenùmòne *cikampànda* cyènzeka.” Mààlaba, cyènzeka. Cyumba cidìkosa. Mupròfetà kanà yònsò mulelèlè wa Nzambì udi wakula mu Dìna dyà Mukalenge ewu neàcyènzè. “Nènku nebyenzeke ne *cikampànda* necyènzekè. Ndi mbànda kùdi Pàlò, kàdi yèyè neàpapishe, neikalè ne mwoyi mupapisha. Neàmbe ne neàtùlekèlè tuye kàdi kàakucyènza nànsha.” Nènku, cyàkenzeka. Nwamònu anyi? Bwà cinyi? Dìbà adi bantu bààkamanya ne muntu ewu ùvwa mutùmiiibwe kùdi Nzambì. Nènku ki bòbò kubanga kumòna ne Nzambì ùvwa mumubènèshe, ke bòbò kumutwà mushinga ne, pààkamutwàbò mushinga, ki bintu binène kwenzekabì.

¹⁰⁸ Ne bantu bààkasekà ne bàkamwelulwilà ne kabàyi baswè kwitaba mukenji wèndè to, bààkabùtuka pàmwè ne bakwàbò bàà ku beena bupidyà abu.

¹⁰⁹ Kàdi beena kwitabuuja bààkapàtuka ne kubwela mu buloba bulaya, bààkaya mu bulombodì bwà mukenji mulaaba wà mùsànjeelà awu. Cìvwa mukenji wà dipikudiibwa, òvwà Nzambì mulaYè ne Ùvwa mwà kutwàla cisàmbà Cyèndè

mu buloba bùdì mabèèlè ne bwíci bituuta nkòkà. Nènku kwenzekabi, bwalu Nzambi ùkaavwa mumanè kwamba nànkù, ne Mòsà wàkalwa ne ùvwa mùsànjeelà mushìndikìibwe bwà ditùkù adi.

Mpindyewu, aci cidi cìtùtòòkeshilaci patòòke tòò.

¹¹⁰ Èyo, dìbà adi tudi tujandula ne Mòsà ùvwa mumanyìshìibwe menemene.

¹¹¹ Ne pashìishe ku dishintuluka dyà cikondo, cikondo cyàkalwà bwà . . . pankaci pàà mikenji ne ngàsà. Kùvwa ne cyà kulwa cikondo cìvwa Maasiyà uvwabò bàmbe awu ne cyà kulwa. Tudi tujandula ne cikondo cìvwa bantu bakònyàngàje mikenji, bayìkùngwìje mu musùmbà munène wà cintu kampànda, nènku bàvwa ne mìshindù yònsò yà—yà bilèlè byà bantu, yìvwàbo bacìmpikemù ayi. Ku dishintuluka dyà cikondo Yesù kulwayè, Mupròfetà mukwàbò, Mupròfetà-Nzambi.

Mpindyewu, wèwè udi wamba ne: “Yèyè kàvwa mupròfetà to.”

¹¹² Bible mmwambè ne ki cìvwaYe. “Mukalenge Nzambi webè neàjuulè Mupròfetà mufwànàngàne naanyi.” Yèyè ùvwa Mupròfetà-Nzambi, ku dishintuluka dyà cikondo pankaci pàà mikenji ne ngàsà, cyàkaakulàYè munda mwà bidimu byònsò ebi. Paanyimà pàà Yèyè mumanè kufila mikenji kùdì Mòsà, dìbà adi ku dishintuluka dyà cikondo, dìbà dyàkambàYe ne cìvwa mwà kwenzekiibwa, ki pashìishe kwalukilaYè ku ngàsà. Ne Wàkatùma Mupròfetà wàmba cipròfetà cyà cikondo. Mpindyewu—mpindyewu, beena kwitabuujà, Yèyè wàkabàkùngwìjajà; beena bupidyà bààkabùtuka mu ditùkù Dyèndè. Bònsò bààkaMwitabuujà bààkasùngidiibwa; bònsò bààkabèngà kwitabuujà mukenji Wèndè bààkajìmina.

¹¹³ Ki cyòci aci menemene cyàkenzekà mu matùkù à Noà; ki cyàkenzekà mu matùkù à Lotà; ki cyàkenzekà mu matùkù makwàbò, matùkù à Mòsà; ki cyòci cyàkenzeka mu matùkù à Yesù Kilistò. Bwalu bààkadyombola mukenji ne kubùtukabò, ne aba bààkiitabuujà mukenji bààkajìmina . . . anyi bààkasùngidiibwa.

¹¹⁴ Mpindyewu, mpindyewu, pashìishe kulwakù cipungu cyà èkèleeziyà. Tuvwa basòmbèle mu cikondo cyà Noà, cyà kumpalà kwà mvùlù yà Noà; twètù kubwela mu cipungu cyà mikenji; pashìishe mu cipungu cyà ngàsà, èkèleeziyà. Nènku mpindyewu cipungu cyà èkèleeziyà cidi munkaci mwà kujika. Twètù bònsò tudi bamanyè nànkù.

¹¹⁵ Nènku, pìikalà Nzambi wàkenza *cikampànda* mu cipungu aci, mu bipungu bikwàbò bibidì abi, Yèyè ùdì ne cyà kushààla umweumwe awu ne kwenza byà mwomùmwe mu eci cipungu, bwalu Yèyè ngwàkamba ne Ùvwa mwà kucyènzà. Nencìjaadìke mu tusunsa tukesè emu, ku Díyì, bwà ne Yèyè wàkamba ne Ùvwa mwà kucyènzà. Mpindyewu, Yèyè kèna mwà kushintulula

ndongamu Wendè to, Yèyè ùdi Nzambi. Mònaayi cyàkenzàYe mu bipungu abi.

116 Mpindyewu twáfiki ku cikondo cyà ndekeelu cyà cipungu cyà èkèleeziyà. Ki cìndi mbala dilòòlò edi ncyôci aci:

Nekwikalè Bukênkè mu cikondo cyà
ibaamulòòlò.

117 Tuvwa bapetè cikondo cyàbûngi cyà mifitù, kàdi nekùlwe Bukênkè. Mwànà umweumwe wakalwa ne kushintulula bipungu cikondo aci awu, ùdi ùlwa cyàkàbìdì! Aci neciikalè bwà kuumuka pa buloba batàngile mu Butumbì. Netùbwelèmu. Musangu kampànda twakabwela *mu*, musangu mukwàbò twakapàtuka *mu*, ne ewu musangu netùbandè *muulu*! Nwamònu anyi? Èyowà: kubwela, kupàtuka, kubànda. Tulwàlwa ku cikondo cyà ndekeelu. Nènku katwèna ànu tulwa cyanààna to, tukàadi bamanè kufika. Tukàadi ku cikondo cyà nshìikidilu!

118 Ncinyi cìdi Nzambi musangane mu cikondo cyà nshìikidilu eci? Nzambi ùdi ùsangana mu cikondo cyà nshìikidilu eci ànu menemene cyàkasanganàYe mu bikondo bikwàbò byà nshìikidilu, bupidyà! Yèyè utu misangu yònsò ànu ùsangana nànkù, Yèyè, pàtùYe ùlwa, Yèyè—Yèyè ùdi ùsangana bupidyà. Ùdi ùsangana ne ndongamu wàkatèèkelaYe bantu. . .

119 Kale wàwa mu cikondo cyà Noà, bu bôbò mwà kwikala ne mwoyi bilondeshile mikenji Yèndè, bàlambula milàmbù. . . Bàkapàmbukakù. PààkalwàYe, Wàkasangana eci, ciinè cintu aci cikwàta mudimu bibi.

120 Cintu cimwècimwè cyàkenzàYe pààkalwàYe pa buloba, Wàkasangana bantu ne Bàfaalèsà, ne bikwàbò, bàlonda mikenji. Ncinyi cìvwàbò munkaci mwà kwenza? Kakùyì ànu meeji matòòke nànsha makesè mu byònsò abi to, bàvwa badìbwinkemu mu mùshindù kanà wònsò wà cyena kale, nènku “Bwàbò bùvwà bubàtonde bùvwa ànu bwà kushààla beena èkèleeziyà, ki cyònsò cìvwàbò bàjinga aci.” Nènku ki cyàkasanganàYe.

121 Nènku ki cìdiYe musangàne cyàkàbìdì ncyôci aci! Ùdi ùsangana cintu cimwècimwè aci, bantu kabèena bàshintuluka to. Pa nànkù piikalàYe wàkatùma ndongamu Wendè ne bantu kubèngabò kumwitabuuja kuntwaku ne kubùtukabò, bààkamwitabuuja kushààlabò ne mwoyi, (mpindyewu, pa bàbìdì aba), bìdi ne cyà kwikala byà mwomùmwe mu cikondo eci. Bidi ne cyà kwikala byà mwomùmwe. To. . .

122 Cìtu ànu mvità misangu yònsò bwà mùsànjeelà kutàpululayè cikùlùkulu ne cipyacipyà. Cìtu ànu mvità ayi misangu yònsò, bwà—bwà mùsànjeelà kulwa bwà kutàpulula cikùlùkulu ne cipyacipyà, nànsha mene mùtù mukenji ne cyà kwikala wà mu Mifundu, mpindyewu, bwalu cyònsò cikavwa cidyanjila kwakula bwà cikwàbò kulwaci.

123 Mpindyewu, twàngatàayi, cileejilu, Yesù. Mùshindù mene ùvwàbí bikolè, bwà Yèyè kubwela ne kushintulula mukenji kuwùmusha ku mikenji kuwùtùma ku ngàsà. Nànsha nàнку Bible mmwambe ne nebyènzekè mùshindù awu ne: “Kùvwà ne cyà kulwa—Maasiyà, ne mulàmbù wà ku ditùkù ku ditùkù ùvwà ne cyà kuumushiibwa.” Nènku tudi bamanyè ne bìkavwa byamba mu cipròfetà kùdi bapròfetà. Cìvwa cintu cinène menemene bwà Yèyè kucyènza. Kàdi tudi tusangana ne Yèyè wàkacyènza. Ne ewu... Wàkacyènza bwalu Mifùndu yìvwa micyambe, ne beena kwitabuuja bàà ditùkù adi (beena kwitabuuja bàà ku dìnà) kakùyì mpatà to kàbàvwa mwà kupetangana Nendè nànsha.

124 Tàngilàayi Bàfaalèsà abu, Basàdokà, bàvwa ne bilèlè byàbò bóbò byà sungasunga ne kakùvwà muntu nànsha umwe uvwa mwà kubanyungishakù to. Aci's ki cìvwàbò bìitabuuja, baamamwàbò bàvwa bìitabuuja cyòci aci, baatwàbò bàvwa bìitabuuja cyòci aci, ne baakakwàbò balùme, baakakwàbò bakàji bàvwa bìitabuuja cyòci aci, nènku “Mòsà ngwakamba nàнку awu!” Kàdi Mòsà umweumwe wàkafila mikenji awu nyèyè Mòsà umweumwe wàkamba ne Muntu ewu ùvwà mwà kulwa, ne bààkapanga kucijingulula bwalu bàvwa babwèje Dìyì dilelèlè dyà Nzambi mu bilèlè ne bàvwa balekèle cishìmikidi cyàDì. Nènku bìvwa ne cyà kwikala ànu mùshindù awu.

125 Mònaayi ne, muntu ne muntu wàkadyànjila kwamba mukwàbò uvwa mwà kulwa awu. Yònsò wa ku baamìsànjeelà, paanyimà pàà mukenji wèndè, ùvwà ùdyànjila kwamba ne necìlwe. Mpindyewu, kàdi pa ciibidilu bantu bàtu bàngata mukenji wà ditùkù ùvwàbò naawu awu, bàwìmanyika.

126 Twànjàayi kucisùnsula, katancì ndambù, tùtàngilàayibi Luther. Pàakayiishà Luther dibingishiibwa ku diitabuuja, yèyè ùvwà mùsànjeelà, mwanjèlò wa cikondo cyà èkèleeziyà aci, ncyà bushùwà, wa Cikondo cyà Èkèleeziyà wa Sààdi. Mpindyewu, mònaayi ne, pàakayiishàye, wàkatèeka ba-Luthériens mu bulongame. Mpindyewu, pashiishe, ki Luther udi munkaci mwà kupàtuka ewu. Nènku pàakabwelà Wesley, Cikondo cyà Èkèleeziyà wa Filàdelèfiyà, ne mukenji wa dijidiibwa, mòna's, bìvwa bikolè bwà Luther kumònayè cyòci aci. Ba-Luthériens abu kabàvwa baswè kuciitabuuja to.

127 Nènku pashiishe dìbà dyàkabàfikishà Wesley bònsò bwàbò ku dishìndama bu ba-Pélérins de la Sainteté ne ba-Méthodistes Badiikàdile, ne bikwàbò, mu dijidiibwa, ke kulwakù mukenji wà beena Mpenta, mòna's, bìvwa bikolè bwà Méthodiste kwitabuujayè cyòci aci. Uh-huh, cyà bushùwà, bìvwa bikolè. Nwamònu's, cìdi... .

128 Cìkòlà ewu ùdi wàkula bwà mukwàbò, bilondèshile dyàkula dyà Mifùndu. Enòkà wàkamba bwà kabùtù kàvwà kàlwa, ku dyambwibwa dyèndè, Nzambi ùmwaluja ku nzùbu; yèyè

ùvwa ntèmù. Abraham wàkabàmbila bwà Mòsà. Nènku Mòsà wàkaakula bwà Maasiyà. Nwamònu's, bàakatunguka ne kwamba, ewu wàmba bwà mukwàbò. Maasiyà wàkaakula bwà cikondo eci, wàmba mùvwa eci ne cyà kwikala!

Wèwè udi wamba ne: “Aa, Mwanèètù Branham!”

¹²⁹ Kaa, èyowà's, Yèyè's wàkaakula's! Twǎnjàayi ànu. . . Ndi ne Mifùndu yàbùngi yìndi mufunde kaaba aka, kàdi nengooshèku dísù ku yibìdi anyi yisàtù yà ku yòyi. Twàngatàayi Maatàayi 24. Mpindyewu twàngatàayi Matàayi, nshapità wa 24, ne túbalèmu cyàkambàYe ne necyènzekè, mùshindù ùvwa “Matùnga ne cyà kulwishangana.” Kàdi, vùlukàayi ne, pashìshe ki kupwekaYe kwinshi aku e kwambaYe ne: “Ànu mwàkadìbi mu matùkù à Noà, ne mwàkadìbi mu matùkù à Lotà, ki mwikalàbi kàbìdi ku dilwa dyà Mwànà wa muntu.” Yèyè wàkadyànjlila kucyàmba, Wàkadyànjlila kwamba ne bintu ebi nebyènzekè!

¹³⁰ Wàkamba ne: “Mpindyewu, pàvwà cyònsò eci munkaci mwà kwenzeka, kàkùcìvwa kàbìdi cikondo to,” ne bikwàbò. Kàdi wàkamba ne: “Yilàayi mùfwanù wà mucì wà mfigi, pàdiwu mutekète ne wèla matàmbà, ne micì mikwàbò yònsò, dìbà adi nudi numanya ne muvù wa luuyà wùkaadi pabwìpi. Byàmwomùmwe, panùdi numòna eci nùnkù cyènzeka, nùmanyè ne cikondo cikaadi pabwìpi, ku ciibi mene.” Mpindyewu, panùdi numòna cinyi? Mucì wa mfigi, ne micì mikwàbò yònsò yìbanga kusampila, cìvwa ncimanyinu. Ne Izalèlèlà utu misangu yònsò ànu mucì wa mfigi.

¹³¹ Yowèlè mene wàkamba cipròfetà pa bwalu ebu ne: “Cyàkashiyà mukùmbi wà gazam, mukùmbi wà hazila wàkacidya e kuupwila cintu aci panshi. Kàdi Nzambì wàkalaya ne: ‘Nèngààlujululè, mùdi Mukalenge wàmba.’” Ne Yèyè neàcyènzè. Kàdi kumpàlà kwà yèyè kwalujulula cyòcì aci mu ngiikàdìlù waci wa nyumà, Èkèleeziyà wa bàà Bisàmbà byà bendè ùdi ne cyà kuumushiibwa. Yèyè kàkwikala naayi yònsò yibìdi mu cikondo cìmwècìmwè aci to. Mpindyewu kwènà mwà kwenza ne Mifùndu yìkònyangalè mùshindù awu to. Nwamònu anyi? Kàtu mwànji kwikala ne bantèmù bàbìdi mu cikondo cìmwècìmwè to, bantèmù banène, nènku kacýà Kàtu mwanji kwikala ne—Kàdyàkwikala naabò to. . . Yèyè kènà ne Èkèleeziyà yibìdi mu cikondo cìmwècìmwè to.

¹³² Mònaayi, cìdi. . . Èkèleeziyà wa bàà Bisàmbà byà bendè ùdi ne cyà kwambwibwa dyàmbedi, bwà beena Yudà, pashìshe ki ndekeelu wa Mbingu makumi mwandamutekète yà Danyèlè kwenzekaye. Bidimu bisàtù ne citùpà byàkambà Maasiyà cipròfetà abi, ne pashìshe Wàkuumushiibwa, Mfùmù, munkaci mwà lumingu lwà makumi mwandamutekète alu. Nènku, dìbà adi, kùdi mbingu yisàtù ne citùpà yicìdi mishààle kàbìdi. Nènku tudi tusangana bapròfetà bàbìdi bàà mu Bwàkabuulwibwà (Nwamònu's, Yèyè kàtu ùshintululakù kàbìdi cinkutu Cyèndè

to.), bàà Bwàkabalwibwà 11, bàpweka bàmba cipròfeta kùdi beena Yudà. Mpindyewu, Èkèleeziyà neikale mwambwibwe mu cikondo aci.

¹³³ Nènku tudi tumòna Izalèlèlà, bwà musangu wà kumpalà kùkaadi nkàmà yà bidimu, byàmba kupita pa bidimu binunu bìbìdì, mmushààle ditùnga mpindyewu; ne cilwilu cyèndè sungasunga, ne mfrangà yèndè sungasunga. Izalèlèlà ùdi mu buloba bwèndè; ditùnga dyèndè sungasunga, dibèndelà dyèndè sungasunga, ùsanganyibwa mu Matùnga Masanga. Ùdi ditùnga! Mòna's, cìdì cimwè cyà ku bimanyinu byà bitàmbe bunène bitùdiku bafwànyine kwelela meeji, mpindyewu mene, Izalèlèlà mu buloba bwèndè. Nènku Yesù wàkamba ne: "Elu lukòngò lwàmòna Izalèlèlà wàlukila mu buloba bwèndè kalwàkupita byònsò kabìyì byùlè nànsha." Nwamònu's, Yèyè wàkaakula bwà ditùkù edi.

¹³⁴ Lekèlaayi mfilè ànu mukwàbò. Mu Timòtè Mwibìdì 3, Yèyè wàkaakula bwà èkèleeziyà ku cikondo cyà nshìkidilu, wàmba ne: "Nebìikalè beena mitù mikolè, badibàndishi, banangi bàà bisànkàsanka kutàmba kwikala banangi bàà Nzambi." Angàtaayi bukwaèkèleeziyà, bwàbwa ne: "banangi bàà bisànkàsanka kutàmba kwikala banangi bàà Nzambi," bàshààla kumbèlu bwà kutàngila ndongamu wa ku tèlèviziyò kumpalà kwà kukabwela mu masangisha à milòmbò mu diisatù dilòòlò.

Wèwè udi wamba ne: "Awu's m'Baptiste."

¹³⁵ Abu's ki beena Mpenta! Bushùwà's! Èyowà's, mukalenge. Kaa! "Beena mitù mikolè, badibàndishi, banangi bàà bisànkàsanka"; bàbàteekela Dìyì ànu ku dyùlù, kabàyì bàDitàngilaku to. Uh-huh. "Banangi bàà bisànkàsanka kutàmba kwikala banangi bàà Nzambi"; kwambila bakàjì bwà kabìikadi bàbèbula nsukì yàbò to, bàdi ànu bàyìbebula nànsha nànkù. Uh-huh. "Banangi bàà bisànkàsanka kutàmba kwikala banangi bàà Nzambi, bashipi bàà bipungidi, bashiminyinyanganyi bàà maalu, kabàyì kudìkànda, bapeetudi bàà bantu baakàne. Biikàle ne. . ."

Nudi nwamba ne: "Abu's mbantu bàdi kabàyì biitabuuja diikalakù dyà Nzambi." To! To!

¹³⁶ "Biikàle ne mmwènekèlu wa difwànà dyà Nzambi, kàdi bàvila Bukolè bwàdì," Bukolè bùdì mwà kukusungila ku dibembela, dyà ndongolwelu wa mpindyewu wa buloba. ". . . Bukolè bwàdì; uumùkà kùdi bantu bàà mùshindù awu." Kucyùkikù bìdì bakwàbò bantu bàmba to, bwalu mbwèbè wèwè bu muntu-nkààya kumpalà kwà Nzambi, newikalè ne cyà kulumbulula. Cìdì mukàjì ewu wènza anyì cìdì mukàjì wàwa wènza nànsha cinyi, anyì, cìdì mulùme ewu wènza anyì cìdì mulùme wàwa wènza, anyì, cìdì muyiishi ewu wàmba anyì cìdì muyiishi wàwa wàmba; bwalu mbwèbè wèwè ne Nzambi.

“Biikàlè ne mmwènekèlu,” bàlonda bilèlè, “kàdi bàvila bukolè bwàdi; bàà nàнку awu uumùka kùdìbo.” Tudi ne mwoyi mu ditùkù adi anyi? Ncyà bushùwà ne tudimù ne mwoyi mwômù!

¹³⁷ Tàngilàayi cyàkàbìdì mu cikondo cyà ndekeelu cyà èkèleeziyà. Nyumà Mwímpè, Yesù Yèyè mwinè ne: “Mémè Yesù ngudi mutùme mwanjèlò Wanyi bwà kufila bujaadiki bwà maalu aa.” Ne Bwàkabuulwibwà, nshapità mwi3, wàkula bwà cikondo cyà èkèleeziyà eci, Yesù mwikàlè ùfila bujaadiki bwà ciikalà mwà kwenzeka mu matùkù à ndekeelu, kwambaYè ne: “Èkèleeziyà neálwe mubanji, Laòdikiyà, wa civùmvù,” ùdi ànu mwà kutùpika ndambù kunyùngùluka pàdi mùjikì wimba bwà kwela mbilà. Nwamònu anyi? Ncyà bushùwà. Kàdi bwà bujaadiki ne lwendu byàkezulà, bidi ntàntà mule naaci.

¹³⁸ Ncyènà...Ncyènà muswè kunùtapa ku mwoyi bwà cyanàànà to, kàdi mvwa mupetè cikèènà-kumòna àbìdì àdì panshì aa cyà mémè mwikàlè mu Mpalàdiizò wa Nzambi. Bùndì naabù mbwà kunwàmbila ànu Bulelèlè. Nzambi, tükwàcishèku twètù bambi bwà kwikala ne meeji matòoke mu bintu ebi ne kwamba Bulelèlè!

¹³⁹ Nwamònu anyi? “...?...mashika...” Bible mmwambe ne nebùikalè mùshindù awu, pa nàнку nebùikalè mùshindù awu. Cyòci ànu cikùmbànàngàne menemene ne Luther, cìdì cikùmbànàngàne menemene ne...mu Cikondo cyà Filàdelèfiyà ne Wesley, bìdì bikèngela kucyàmbe ne kwikalaci cipwàngàne...Ncicyàmbè, nènku neciikalè menemene mùshindù awu mu Laòdikiyà.

¹⁴⁰ “Mubanji, kàyì dijinga ne cintu nànsha címwè!” Tudi mwà kwela mìliyaalà yà ndola mu nzùbu, tudi mwà kutèeka cintu cyònsò cìdì cyònsò—cìdì cyònsò...manàyi à pa buloba, tudi mwà kwibaka maèkèleeziyà matàmbe bwímpè. Aci’s cìdì cìmpè, kakwèna cintu cibì nànsha címwè to, aci ncipwàngàne bìmpè menemene.

¹⁴¹ Kàdi ndi nteeta kwamba ne: dìbà adi pàdi Mukenji ùtwàdìja kunyùkuka ku mutù kwàbò, kabèèna neenù dijinga to. “Wèwè’s udi mubùlùke! Wèwè udi mukoleshi wa maalu! S’bìvwa bikèngela wèwè kwikala ne mwoyi kùkaadi bidimu makumi àtaanu bipite.” Nwamònu anyi? Kaa, udi mufwànyine kwela meeji nàнку ne: “Ncìvwa mwà kwikala ne mpaasàtà wà mùshindù ewu to.” Mmpaasàtà webè, bìbande bipwekè! Yezàbèlè kàvwa mwà kwitaba ne Eliyà ùvwa mpaasàtà wendè to, kàdi’s ùvwa mpaasàtà wendè bushùwà. Cyà bushùwà menemene ùvwa mpaasàtà wendè. Yèyè wàkatùmiibwa, bu cileejilu, mùsànjeelà kùdì ditùngà dyà Izàlèlèlè. Nènku leelù ewu Nyumà Mwímpè wa mushinga mukolè ne Dìyì dyà Nzambi ke Mùsànjeelà kùdì èkèleeziyà, bwà kubàlongolola ku bilèma ne kubàaluja ku Dìyì. Tudi twakula bwàDì, kàdi kanùyì

numòna muntu nànsa umwe ùnyunga. Uh-huh, nwamònu's, tudi basopàkàje bintu abi.

¹⁴² Ngaakuumwva muntu kampànda, byénzè bu mu bujaadiki, wàmba ne: “‘Mubàndishaayi,’ mmunyi munùdi numubàndisha?” Nènku, kaa, kwenza ànu tusùmbu tukesè! Muntu kampànda wàkamba ne: “‘Tàbalàayi ne sambilàayi,’ aci cìdi cyùmvwija ne kushààla mutàbàle dísù òmwè paùdi usambila, utàngila ne dikwàbò. ‘Tàbalàayi ne sambilaayi.’” (Mòna's, *tàbalàayi* mbwena kwamba ne “tàbalàayi bwà dilwa dyà Mukalenge,” sambilaayi.) Nwamònu's, cìdi ànu kutwìsha cintu katungu.

¹⁴³ Ki bwà cinyi, mu cyòci aci, citùdi twenza ncinyi? Tudi tudijuudila kaacilèlè kèètù kakesè (nènku dìbà adi byòbi...) nànsa byòbi byenza kùdi Nzambi anyi to. Nènku tudi tupàtuka, cintu cyàkumpàla nudi bamanyè's, tudi ne kasumbu kakesè kènda kàtùlonda, ne tubuumusha ku mubidi munène wà èkèleeziyà. Mmwòmò. Pamutù pàà kulwa ne kusambila ne kufila dyàndamuna ku bwalu abu, ne kulekela mubidi ùtùngunuka, tudi twenza bintu abi nànsa byòbi bikumbàne anyi to. Nwènù ne Bulelèlè, dìbà adi shààlaayi ne Bulelèlè. Aci's ncyà bushùwà menmene. Kàdi cìikalè ànu Bulelèlè bwà mu Bible dyàmbedi! Mònaayi, ku... cìkondo cyà Laòdikiyà eci.

¹⁴⁴ Ne baprófetà, uh, Nyumà Mwímpè mwikàle wàkwila mu Pòlò, uvwa Maasiyà awu. Kàvwa Pòlò to, ùvwa n'Kilistò! “Nzambi, mu bikondo byà kale ne mu mishindù mishilèshilàngàne wàkaakwila ne baataatù kùdi baprófetà, mu ditùkù dyà ndekeelu edi kùdi Yesù Kilistò,” Ebèlù 1, mònaayi ne, Nyumà Mwímpè, Kilistò, Èvànjeeliyò mushindàmèène pa Kilistò, Dìyi dishindàmèène pa Kilistò. Nènku Yèyè mushindàmèène pa Kilistò, ne mushindikiib-... Nzambi neàDishindike ne m'Bulelèlè.

¹⁴⁵ Ki bwà cinyi nwènù beena Mpenta nudi nupeta Nyumà Mwímpè mu diitabuuja dyà ba-Méthodi... pa kuumusha dijidiibwa dyà ba-Méthodistes, bwalu nuvwa bashindàmèène menemene pa Dìyi.

¹⁴⁶ Kì bwà cinyi nwènù ba-Méthodistes nwakajidiibwa pàvwà ba-Lutheriens kabàyi biitabùùje cyòci aci, nwènù nuvwa pa Dìyi.

¹⁴⁷ Ke mùshindù awu unwàkasungìdiibwa nwènù ba-Lutheriens, nwàkabingishiibwa, bwalu mùsànjeelà wenù wàkayiisha dibingishiibwa, ne kutontolola èkèleeziyà wa Kàtòlikè uvwa cintu cilaluke ku byònsò. Bàvwa biitabuuja bòbò ànu mu èkèleeziyà; nwènù bààbendè nwàkaalukila ku Bible, nwàkangata bulelèlè bwà mu Bible abu ne kushààla bakwàtekù.

¹⁴⁸ Ki pashiishe kulwaku Wesley mwikàle ne bulelèlè bukwàbò, ne kushààla mukwàtekù; pashiishe kulwakù Mpenta mwikale ne bulelèlè bukwàbò, ne kushààlayè mukwàtekù. dìbà adi panwikalà mwà kukwàtaku ne kumòna ne mbujaalàme, bwà

cinyi kubènga kwangata cintu cyònsò cìvwà cijaadikiibwe ne ncijaalame aci? Ciitabùùjaayi cyònsò nkòng!

¹⁴⁹ Mpindyewu, patùdì tumòna baamìsanjeelà aba, tudi bamanyè dîbà adì's. Tudi tumòna Kilistò, Nzambì-Mupròfetà munène munkacì mwà kudyànjila kwamba bintu ebi bwà kwenzekabì mu matùkù à ndekeelu. Cìdi cyènza cinyi? Cibweja cikondo cyà byà pa madimi. Cìdi cibweja cikondo cìdi byà pa madimi ne cyà kunowibwa, biikalàku mu matùkù à ndekeelu awu. Nudi nucimòna anyi?

¹⁵⁰ Mpindyewu bintu ebi nebiikalèku mu matùkù à ndekeelu. Tudi bamanyè mùshindù wà bikùnyìibwà bitùdì tukèba. Tudi munkacì mwà kukèba èkèleeziyà ùvwà kale wàwa ne Bukènkè, muumùkeKù, muyè mu dibàlakana dyà maalù à pa buloba, àdì ònsò malengeja (mmwòmò anyi?), buumùkekù, babweje bidimba byà mùshindù kampànda, ne bintu kanà byònsò, ne kubìbiikila ne beena Mpenta, bàbàtiiza cintu kanà cyònsò.

¹⁵¹ Mâyì kaàtu àsungila muntu to. Bidi bikèngela Mashi à Yesù Kìlistò. Kakwèna Mwoyi nànsha mukèsè mu màyi to. Mwoyi wùdì wùlwila mu kabulu kàà Mashi; bikèngela dijidiibwa bwà kukezula mwoyi awu, bwà kushipa dijinga dyà mpèkaatù; pashìshe Nyumà Mwimpè ùdi ùbwela mu mpànza mikezula ayi ne ùyiteeka ku luseke mu mudimu, bwà mudimu. Cyoshelu cìvwà cijidila mpànza, kàdi . . . dyujiibwa ki dìdì dìyiteeka ku mudimu. Yìvwa yitèekiibwa ku luseke *bwà* mudimu, mpindyewu yìdì ne cyà kutèekiibwa mu mudimu. Ne Nyumà Mwimpè ngudi ùtèeka èkèleeziyà mu mudimu. Mvwà pa ciibidilu munange kasambu kakesè aku:

Bàvwa badisangìshe mu cibambalu cyà kuulu,
Bònsò bàsambìla mu Dìna Dyèndè,
Bàakabàtijiibwa ne Nyumà Mwimpè,
Ke bukolè bwà mudimu kulwabò;

Èyowà. Ne cìdi cishààle cìdi cyàmba ne:

CyàkabènzèlèYe ditùkù adi aci
Yèyè ùdi mwà kukwenzelacì byà mwomùmwe.
(Bushùwà's.)

¹⁵² Byà pa madimi; bapròfetà; twàkiimanyina apu pa Kilistò. Mpindyewu tudi twalukila kakesè ndambu.

¹⁵³ Yeshàayi, mupròfetà, mwàkafilàye bujaadiki, kwambaye cipròfetà cyà cikondo cyà nshìikidilu. Wàkamba ne: “Mubidi mujimà newikalè mùlè tètè ne mpùtà mibolè, mèèsà wònsò neikalè mùlè tètè ne bilùshi!” Mòna's, balùme ne bakàjì leelù ewu, badi bàngata mèèsà à Mukalenge, biikale basòmbè ne bakàjì bàbìdì anyi bàsàtù, anyi balùme bàbìdì anyi bàsàtù, (bushùwà) mìshindù yònsò yà . . . dinwà dyà mfwankà, ne bintu byònsò abi; kubwela mu èkèleeziyà, kwangata mèèsà à Mukalenge!

154 Mpindyewu, ndi mwà kupwekelela ndambù kupita apu, kàdi nengindile ànu katanci, pàmwápa kí ndíbà dyàci to. Mvwa mudyumvwe munyùkùshiibwe ndambù pa címvwà ne cyà kwamba. Kàdi ndi. . . Nudi mwà kubadila pankaci pàà milongo. Nudi bamanyè cidi Bible wàmba, cidi bintu bikùmbane bìdi kabìyi bikùmbàne's.

155 Bintu byònsò bitùdi tumòna munkaci mwà kwenzeka díbà adi ebi, ne ditùnga. . . maalu à mamanya àdi àmba ne bìdi. . . kukaadi bidimu binaayi anyi bitaanu ne: “Nkushàale tusunsa túsàtù bwà mundankùlù kukùlamù.” Izalèèlà ùdi mu buloba bwèndè. Èkèleeziyà ùdi mu Làòdikiyà. Kaa, ekèlekèle! Citùdi bindile ncinyi? Mbwalu kaayi ebu?

156 Tudi bindile Bukènkè bwà ìbaamulòòlò. Kaa, ndi ndikonka's, bu Bwòbù mwà kulwa, ní tudi bafwànyine kuBùjingulula anyi? Anyi ní mBufwànyine kutùpicila pa mitù yètù bu mwàkenzàbì mu bikondo bikwàbò? Kàbààkacimanya to too ne mwà kayàci kule menemene.

157 Nudi nuvùluka ne, batèndeledi abo bóbò mene ke bààkashipà bapròfetà bàvwàbo bàbàtùmina. Yesù ngudi mwambè nànkù. Yèyè kwamba ne: “Nwènù beena lubombo nwè!” Yèyè ne: “Nudi nulengeja nkità yà bapròfetà, kàdi's baatatwènù ke bààkabèèlàmu ne pashìishe kwibaka nkità yàbò.”

158 Tàngilàayi èkèleeziyà wa Kàtòlikè wa cyena Loomò, wàkalengeja lukità lwà Patrick Munsantu, kulengeja lukità lwà—lwà Jeanne d'Arc. Bààkashibeya mukàji awu, ne kumwoshabò bu mwena mupongo, bwalu yèyè ùvwa wa nyumà, bwalu ùvwa ùmòna bìkèèná-kumòna. Bààkamoshila pa cyoshelu, bu mwena mupongo. Bidimu nkàmà yìbìdì pashìishe e kumbulabò mibidi yà bansaserdòsè e kuyimanshabo mu musùlu, bu cibawu, pàakamanyàbo ne yèyè ùvwa musadidi wa Kilistò. Kàdi, mu ditùkù adi, kabàvwa bamanyè ne yèyè ùvwa nganyi to, pàvwà èkèleeziyà ùpicilamù apu.

159 Nènku neCìpicile pa mitù yà bantu ne kabàdyàkuCìjingulula nànsha.

160 Yesù, kabàvwa bamanyè ne Yèyè ùvwa Mwànà wa Nzambi to too ne mùvwàYe mufwè mujiikiibwe ne mubiike cyàkàbìdi. Peetèlò kààkabàfùndakù mu Ditùkù dyà Mpenta anyi? “Nwènù bantu beena byanza byà cikisu nwè nudi bakwàte Mukalenge wa Mwoyi, e kuMushipa, kuMushebeaya!”

161 Kaa, cimanyinu cikünze cidi cipodya cyà dilwa Dyèndè ncipwèkè! Amen! Tudi ku ndekeelu. Amen. Mudilu mukünze ùdi ùpodya awu ùdi myaba yònsò, myaba yònsò ne: “Ikàbòde,” mufùndapù. Cikondo ncijikè. Cikondo ncimanè kujika!

162 Maalu à mamanya mmafikè ku ndekeelu. Ncyà bushùwà. Mbapàtùle cintu kampànda mpindyewu cidibo mwà kutùdishà

naaci buloba bujimà, muntu ne muntu ùdi munkaci mwà kuciina mwinendè. Bàdi ku cikondo cyà nshìikidilu.

¹⁶³ Dishidimuka, ndifikè mu cipidi cyà ne bantu . . . kalonda kàà ntanku kàdi kènda kapingana cyànyimà. Bantu kabèena bènza maalu bu bantu bashidimùke to. Nudikù mwà kudifwànyikijila muntu wètù ewu ùjinga kwikala mùyàpàndi, ne mimfwemfwe yèndè milembèlèlè nùnkù *ewu*, ne mupanu mupwekèlèlè mu cimònu, wènda ùya ùpicila mu lupangu lwà tùlaasà mùshindù awu? Meeji à pa buloba àdi ne cyà kulwa paanyimà pàà aa, piikalàbi ne kùdi makwàbò kàbìdi à ku wòwò, kupàtuka ne bongsongàakàji bàà mvùla dikumi ne yinaayi, kuya naayi mu mùsèsù.

¹⁶⁴ Leelù ewu, mu cilààla-benyi cyànyì, mùvwa mulààle maamù kampànda, kàyì ne bilàmbà búngì bukùmbàne pambidi bwà bifwànyine kujika naabi nànsha mùshikù wà cingoma to, ne bàyèndè pèndè mulààle mùshindù wà mwomùmwe awu, ne cipeepèlè cikolè cyà mashika aci. Bèèla meeji ne mubidi wàbò mmulenga bikolè bìkèngela kuwùleejabò. Kanwènaayikù nufika ku dyumvwa ne ndyabulu anyi? Ncyà bushuwà. Kubàvùùla bilàmbà byàbò abi, ànu mutombòke ke utu wenza nànkù. Legònà wàkenza nànkù bwalu ùvwa mupàle. Mònaayi! Ne tudi ne cyòcì aci, kàdi bàdi bàcibìikila ne “mòdelè” ùdibo bàbìikila ne “cyena leelù.” Twètù tudi tucibìikila ne “Dyabùlù!” Ndi ne Bible bwà kujaadika ne ndyabùlù. Ndikwàciibwa dyà kùdi dyabùlù, dikwàciibwa dyà kùdi démon (ki ndicincimikiibwa to). Dikwàciibwa, mmukupyè’s! Ncyà bushuwà. Udi ànu ubàmbila aci anyi? Bàdi bàkukàtula. Kabèena naaCi bwalu to! To, mukalenge. Bàdi ne wabò mmwènuu wa sungasunga, bwalu ku nzùbu yàbò wà kulamina bitàlù kùtùbo bàya aku kabàtu bàbitàndishaku nànsha. Dijuulangana dyà masandi ku mvwadilu didi dyènjiiibwa mu bilongelu ne mu maèkèleeziyà, ne baampaasàtà bàdi ne bwòwà bwà kubitàndisha, bàdi bàbitàndisha ku mpùkàpùkà.

¹⁶⁵ Ngakuumvwa mwambi kampànda ditùkù adi, wàmba ne: “Pààkapàtulàbo bintàkanyà byà bleu byà kulaaba ku mèsù ebi, ne—ne kapèntà kakùnze kàà ku mishikù, mbenze buloba butàmbe bwìmpè be.” Mwambi wa Èvànjeeliyò, mu cyambilu, ùvwa mwà kwenza dìyì bu nànkù awu, bìdi bimukèngela enzè lwendu lwà ku Kàlvariyò. Cyà bushuwà. Ncyà bushuwà menemene, apu’s mpàdi Bible ùcipiisha!

¹⁶⁶ Nènku musùmbà kampànda wà beena Mpenta wàkambila mwanèètù wa bakàji kampànda wàkalwa mwaba awu, ùdila mwadi, bwalu ùvwa ne nsukì yèndè mipingaja paanyimà, mwikale ne nsukì mile, bàmba ne: “Ndundu webè wa diselèfù awu mmufwànyine kupweka mipùyà.” Kwambabò ne: “Udi ne cyà kukòsa nsukì ayi, bwalu Bible mmwambe ne ùvwa ne . . . mu Yeshàayi, nshapità mwi5, ùvwa ne ndundu yà màshinyi bu ngondo.” Mpindyewu, mmunyi mùdi Bible mwà kwamba ne

“mukàjì enzè cintu cibi,” kí mmukùmbànyìne bwà kusòmba nendè to díbà dídiye ùkòsa nsuki yèndè, ùdi ùjaadika ne ùdi ùpwekesha mutù wèndè milongo, ne pashìishe nsuki mile . . . ? . . . Mmunyi mùdì mwà kufíkisha Bible ku dyamba cintu cyà mùshindù awu? Èè, mbwalu kaayi bùdì kùdì bakàjì bèètù bàà cyena Mpenta aba’s? Nudi batàmbe kutàngìla téléviziyò be! Nudi batàmbe kumòna byà pa buloba be, ne byà mu Díyì dyà Nzambì kabyèna binùsànkisha to. Mpindyewu, Bible mmwambè nànkù. Kì cìdì Bible mwambè ncyòci aci. Kì mmémè to, mpindyewu, aci’s m’Bible awu!

167 Kaa, dijuulangana dyà masandi ku mvwadilu! Inàbànzà kampànda ùvwa mungambìle àbìdì aa, mvwa ngàakula bwà bàdì bàlwàta tùpùtula aba, yèyè kwamba ne: “Mémè—mémè wabèndè ntu ndwàta mìpanù.”

168 Mémè kwamba ne: “Aci’s ncitàmble bubì.” Wèwè . . . Bible ngudi mwambè nànkù. Yèyè kènà mwà kushintuluka to.

169 Wèwè udi wamba ne: “Awu m’Baptiste.” Kì beena Mpenta mbòbò abu. *Nwènu* mbàndì ngàmbìla’s. Ncyà bushùwà. Aci’s ncìlèlèlà.

170 Kàdì bwalu bùdì bìshì’s? Bwalu bùdì bìshì? Muntu kampànda mmumùshe mikàlu mwaba kampànda. Muiyishi mununu mulunda wanyì ùvwa ne ciibidilu cyà kwamba ne:

Tudi buumùshe mikàlu, tudi buumùshe mikàlu,

Tudi badyè cibàngà ne mpèkaatù.

Tudi buumùshe mikàlu, mìkòòkò mmipàtùke

Kàdì mmunyi mùvwà mbùjì mífike ku dibwela?

171 Bwalu bùdì bìshì? Panùdì nuumusha mikàlu, mikàlu yà Díyì dyà Nzambì! Vùlukàayi ne, cìvwa ndongamu wa Nzambì bwà kukolesha Èkèleeziyà Wèndè ku Díyì Dyèndè, ku cibangidilu.

172 Nènku pàakalukakajà Evà meeji kwambayè ne: “Èè, mpindyewu, kí mbyà meeji anyì, bwà mémè kwenda bìmpè ànu mùdìbò bènda emu anyì. . . ?” Aa! Aci cyàkenza bwalu.

173 Kì mùtùci cìcyenza misangu yònsò. Kì bwà cinyì bàakamukàndika bwà kwikalayè muiyishi. Nwamònu’s, cìdì ànu dyumusha dyà mikàlu adì’s. Kì mwaba ùdì (èkèleeziyà) miji yà mashìnda mijuukile ngwòwò awu, mu Mpenta, nènku aci ke miji yà mashìnda. Kakwènakù Mufùndù bwà bwalu abu to. Nwamònu anyì? Mpindyewu, cyùdì wenza ncinyì díbà adì? Udi ubwela mu cimvundù cimwècìmwè cyùvwà usanganyìbwa kale wàwa mu Edènà. Mònaayi ne, mpindyewu, díbà adì patwàfika ku Díyì, wèwè udi wamba bwà Dyòdì adì. . .

174 Kakwènà muntu nànsha umwe udi mwà kukàndàmeena Cyòci aci to! Ndi ngèèla kadyòmbò kùdì muntu kanà yònsò udi mwà kucyàmba. Mvwa muiyishe pa *Dimiinu dyà Nyòka*,

bantu bààbùngì menemene bààkabinduluka bwà bwalu abu. Ntu mulòmba bwà muntu kampànda kulwaye kuntwisha nyimà panshi pa bwalu abu. Ncyènà mumupetè.

¹⁷⁵ Ku Chicago matùkù mashààle aa, nuvwa bapetè mikàbà yà mēyì, bààkeela meeji ne bàvwa bambàkùle mu cintu kampànda. Bàvwa bakùngwije Nsangilu Munène wa Bambi bàà mu Chicago, Mwanèètù (Ncinyì aci?) Tommy Hicks, Mwanèètù Carlson ùvwakù. Nènku malòòlò àbìdì kumpàla kwà cyòcì aci, Mukalenge kuntàbulujayè bufùkù, kwamba ne: “Nda ùkiimànyìne ku didìdiishi dyàdya.” Mémè kuya, nènku cipeepèlè cìkolè cìvwa munkacì mwà kutuuta. Yèyè kwamba ne: “Mpindyewu, mbakwèlè buteyi.” Yèyè kwamba ne: “Ku didyà dyà mu dindà edi, kwikadi ne bwòwà to. Tùngùnuka, Mémè nengìikalè neebè.” Mpindyewu, eci cìdì mu Dìna dyà Mukalenge. Nudì mwà kubàkonka bwà kujandula. Cìdì pa mikàbà yà mēyì, cìdyànjlila kwamba kumpàla: Yèyè ne: “Mpindyewu, kùcìnyì bwà kuya to, kàdì ndàaku wìmane,” yèyè kwamba ne: “Nèngìikalè neebè.”

¹⁷⁶ Ki ditùkù dyàkalondà mémè kutwilangana ne Mwanèètù Carlson, mutàngidi wa dyàpà dyà kuntwaku, ne Tommy Hicks. E kungambilaYè ne mvwa ne cyà kutwilangana naabò ne tuvwa ne cyà kuya mu mwaba ùdì ùbìkidiibwa ne “Town and Country” bwà didyà dyà mu dindà. Mémè kusòmba mwaba awu ànu menemene. Mémè kwamba ne: “Mwanèètù Hicks, wèwè udi docteur en divinité kàdì tuyàaya katwilangana ne musùmbà munène wà bambi mwaba ewu, nsangilu wabò wa mu Chicago, cyùdì kùyì mwà kuya kaakula pa kaaba kàànyì ncinyì? Mémè’s nkàdikù mukwenzèle bintu byàbùngì.” Mvwa ànu munkacì mwà kumuteeta.

Yèyè ne: “Kaa, ncyènà mufwànyìne kwenza aci to, Mwanèètù Branham.”

¹⁷⁷ Mémè ne: “Èè, bwà cinyì kùyìkù mwà kutùngunuka?” Mémè ne: “Mémè’s mvwa mukwenzèle cintu kanà cyònsò, mpindyewu bwà cinyì kwenakù ànu wenza cyòcì aci bwànyì mémè?”

¹⁷⁸ Yèyè ne: “Kaa, ncyènà mufwànyìne kucyènza to, Mwanèètù Branham. Kabàvwa bafwànyìne kundekela ncyènza to.”

Mwanèètù Carlson kwambayè ne: “To, kì mbafwànyìne kwitaba to.”

¹⁷⁹ Mémè ne: “S’nudi bamanyè ne mbwà cinyì.” Mémè ne: “Lekèlaayi nzwambilè cintu kampànda, mbwalu nwènù, bùbìdì bwènù, nudi bamanyè ne bàdì ne lukonko lwà butèyi lundongolwela.” Ki mémè kwamba ne: “Nwènù mbàdì naalù.” Mpindyewu, eci cìdì pa mukàbà wà mēyì. Panwikalà dijinga ne mukàbà wà mēyì awu, tudì mwà kwikala nawù. Kàbìdì nudi bamanyè bantu bònsò aba. Ki mémè kwamba ne: “Makèèlèlè dilòòlò awu, mvwa mumòne cikèènà-kumòna cyà mutùvwà mwà kusòmba kaaba aka mu dindà emu ne mùvwà Tommy

mufwànyine kucibènga.” Mémè ne: “Mpindyewu tàngilàayi, nudi. . . nudi bafute bwà cibambalu cyà cilààla-beenyi cyàcyà.”

“Èyowà.”

“Mfranga micifucila.”

“Èyowà,” Mwanèètù Carlson.

¹⁸⁰ “Kàdi kanwàkucilama to. Aci’s ng’EMU MMÛDÌ MUKALENGE WÀMBA!”

“Bwà cinyi?”

¹⁸¹ “Nenùye mu mwaba kampànda mukwàbò. Cyòci aci nei—cyòci aci ncibambalu cyà mâyi à matàmbà; netubwelè mu cibambalu cyà cifikùlùke. Mémè nengìikale mu ditumba; Docteur Mead neikalè musòmbe ku dyàbalùmè dyànyì; ne mwambi mununu wa bafiike awu ne mukàjèndè nebiikalè basòmbèlè lwà ku dyàbakàjì eku,” ànu mùshindù awu ki wikalàbi. Ki mémè kwamba ne: “Tàngilàayi mpindyewu, lwàyi ànu kulwa. Nudi bamòne Nzambì wondopa babèèdì, muMònaayi mu mvità musangu ewu’s!” Mémè kwamba ne: “Yèyè mmunène, mubàkèmeshi.” Mémè kwamba ne: “Tàngilàayi nwènù ànu nkonko nùmòne mùdìbo bashààla badyè kabùmba mbàngà.”

Nènku patwàkafika kuntwaku mu dindà amu. . .

¹⁸² Panwikalà dijinga ne mukàbà wà méyi. . . Jim, udi nawù, kwènà muwùtwàlè anyi? Ànu mwab’ewu, ànu mwab’ewu, nudi mwà kupeta mukàbà wà méyi nwènù nawù dijinga, mu masangisha.

¹⁸³ Mémè ne: “Cinùdì nufwìla naanyì ncinyi? Ndi neenù cilumbu kaayi balùmyàna?”

¹⁸⁴ Mwanèètù Carlson kwambayè ne: “Èè, Mwanèètù Branham mmungambilè kùkaadi matùkù àbìdì bwà ne netwikalè ne. . .” Nènku kabààkapeta nzùbu awu to, bààkashibeya cipungidi aci. Kabàvwa mwà kubàlekela bàngata nzùbu awu bwalu cisùmbu cinène cyà misambu cìvwa cimwangàte ne kabàvwa bamanyè ne bàkaavwa bamufidile citùpà cyà mfranga to, ki pashìishe bòbò kushipeya dyumvwangana dyà ne Beena kantu-ku-Byanza adi. Pàmwàpa nuvwa buumvwe mukenji pa bwalu abu, Mwanèètù Williams mwab’ewu, ne mwab’ewu, kàbìdì. Nènku—nènku—nènku ki kwambayè ne: “Mwanèètù Branham ùvwa mungambilè menemene mwaba ùvwa muntu yònsò ne cyà kwikala musòmbèlè, ne kungambilayè pyòpyopyò cìvwa ne cyà kwenzeka.” Yèyè ne: “Cintu cìmwèpelè,” yèyè ne, “ndi. . . bààbùngì bàà kutùdì bàdi mwà kubènga kupetangana ne Mwanèètù Branham pa Mukenji wèndè, kàdi,” mwàkambayè, “netwikalè ne cyà kwitaba cintu cìmwè, yèyè kènà ne bwòwà bwà kuCyàmba to,” nànkù—nànkù dìbà adi mwàkambayè ne: “kènà naaCì bwòwà to.” Yèyè kwamba ne: “Mpindyewu, ki bwalu mbwòbù ebu’s, Mwanèètù Branham.”

185 Mémè kwamba ne: “Mpindyewu, kumpàlà kwà twètù kubanga, ndi muswè bwà muntu kampànda, pa cintu kampànda cìndi mwambe, bwà àngatè Bible awu ne ìmanè ku luseke lwànyì eku.” Kàdi’s ki kushàalabò musùmbà wa bantu bàà matàma bu byàtá banùtù kacya kanùyìku bânji kuumvwa. Mémè kwamba ne: “Dìbà adi, panwikalà kanùyì mwà kucitwa mpàndà to, umùshaayi mukòlò wènù mu wànyì! Èyowà. Bàna bèètù, ndi kaaba aka bwà kwelangana neenù dibòkò, kàdi butùdi naabu mbwà kwalukila ku byenzenedi byà mu Bible.”

186 Yèyè ne: “Bwà cinyi kwèna—bwà cinyi kwènàkù mwà kulekela bakàji abu kwàbò kwà tàlàlà? Kaa, èyowà, wèwè udi mwen. . . bantu bàdi bìtabuuja ne wèwè udi mwena—mwena lùmònù wa Nzambi.”

Mémè ne: “Kacya ncitukù mwambè nàнку to.”

187 Yèyè ne: “Kàdi bantu bàdi bìtabuuja nàнку.” Yèyè ne: “Bwà cinyi kwèna—bwà cinyi kwènàkù mwà kulekela bakàji abu kwàbò kwà tàlàlà?” Yèyè ne: “Ne kulekela kubàmbila bwà mùshindù ùvwàbo ne cyà kwikala bàvwàla ne bàkòsesha nsukì yàbò ne bintu bivwàbo ne cyà kwikala bàlaaba. Mbwà cinyi kwènàkù mwà kubàlekela ku macì tàlàlà? Bwà cinyi kwènàkù ubàlongesha mùshindù wà kupeta mapà ne—ne kwenza cintu kampànda bwà butùmbi bwà Nzambi?”

188 Mémè kwamba ne: “Nànsha bòbò mene bàmba mmunyi mùndi mwà kubàlongesha makumi makolè pàdibo kabàyi bamanyè nànsha mwà kuyiila ABC wabò?” Ncyà bushùwà. Bidi binùkèngela bwà kwalukila ku cishìmikidi bwà kutwàdijidilakù.

Nzambi, ikàlàku neetù luse mpindyewu. Èyowà’s, mukalenge.

189 S’ki twètù aba, cikondo cyà nshìikidilu! Bukènkè bukùnze bwinàme, bùpòdya! Dilwa dyà Mukalenge didi pabwìpi. Èyowà’s, mukalenge. Tèèlejàayi! Mukenji wà cikondo cyà nshìikidilu ùdi ùpetangana ne ngiikàdilù yà cikondo cyà nshìikidilu. Mwaba ùdìbo bapàtùkile, Mukenji ùdi ne cyà kubààlujamù. Misangu yònsò, Mukenji wà cikondo cyà nshìikidilu ùdi ùtwilangana ne ngiikàdilù yà cikondo cyà ku nshìikidilu. Ku mbangilu too ne ku ndekeelu kwà Mifùndu. Neciikale ne cyà kucyènza ewu musangu, dibiikila bwà kwalukila ki Dìyì dyà ku muji. Kaa, ekèlekè! Bu mwàkenzà baamisànjeelà bakwàbò mu dyàbò ditùkù, ke mwikala Mukenji ewu mùshindù ùmwèumwè awu. Mbatùlayèci! Nzambi mmucilayè munda mwà Dìyì Dyèndè! Maalàki 4, mmwambe ne necyènzekè: “Ne kwalujulula Diitabuuja dyà bàna ku dyà baataatù.” Mmucilayè, ne tudi ne mwoyi mu ditùkù adi!

190 Kaa, ki mùtùbi misangu yònsò, cikondo cyònsò, musùmbà wà balombodi ngùtù ùbweja bantu mu cibwejàkàji. Kí ncisàmbà nangananga to; mbalombodi bàtù bàbàbweja mu cibwejàkàji. Mpindyewu twànji. . .

Wêwè udi wamba ne: “Kaa, Mwanèètù Branham!”

¹⁹¹ Èè, mpindyewu, indilaayi kakesè mpindyewu, tudi ne cyà kucìpetelà Mifùndu. Piikalàci kaciyi Mufùndu to, dìbà adi kì ncìmpè to. Ku mèyi àbò à lungènyi, ku bulombodi bwàbò bùdì kabùyì busonsòdìibwe abu, mèyi à lungènyi lwà pa buloba, bàdì. . . Mòna’s, kùdì bàmwè bàà ku beena lungenyi lutwè bàdì mwà kutwàngaja cyòcì aci pàmwè, kàdì nudi nwela meeji ne Sàtaanà kènà ne meeji matwè ku cyòcì aci anyi, yèyè pèndè? Yèyè, èè, kàakaseemenakù kùdì Yesù Kìlistò e kuMupèèsha kabingilà, kuMutèèlela too ne Mifùndu anyi? Wàkenza nànkù! Yèyè ùdì ne meeji matwè mu cyòcì aci. Kàdì Yesù kàakakòkangana nendè nànsha, Wàkamba ne: “Bààkafùnda, kàbìdì ne! Nkàtùkìlà Mémè apa, Sàtaanà.” Èyowà, bulombodi kabùyì busonsòdìibwe.

¹⁹² Tàngilàayi Koolà, mu matùkù àvwà Nzambì mutùme Mòsà ne mukenji, kàdì Koolà ne Daatànà bààkela meeji, kubàndabò kùdì Mòsà, bàmba ne: “Mpindyewu, ànjì indilà kakesè, udi udyèla pèèbè ku mùsongà be! Udi wela meeji ne wèwè nkààyebe ke cyalu cyà kujijila mbenga; ke mutù mupùngilà makunyi, ànu wèwè nkààyebe ki kwàjiki’s. Ndi nkumanyisha ne kùdì bângà bantu bàdì pààbò, bàà cijila!” Mòsà kàakamba ne kabàvwa bàà cijila nànsha. Kàdì yèyè ùvwa ne mudimu mumutuma naawù, ùvwa ne cyà kuùkùmbaja. Ki kulongololabò musùmbà wà kulwa kulwisha naawù Mòsà.

¹⁹³ Ki Nzambì kumwambila ne: “Ndàaku wìmanè dyàmwàmwà dyà ciibi.” Bantu abu bàvwa ne mbàbùlà mu cyanza cyàbò, ne nudi bamanyè cìvwà mbàbùlà awu mufwànyine kwikala mwenzè’s. Nzambì kàdì kukàngula buloba e kubàmina bònsò. Bààbwalu abu bìikàle ne mudilu wà ku cyoshelu, munda mwà mbàbùlà ayi. Biikàle ne kapyà mu mbàbùlà, bìmwèka kwìsù ànu mùtùbi, kupangabò kujingulula mukenji.

¹⁹⁴ Nzambì kwambayè ne: “Ndi mukutùme wèwè, Mòsà, kuntu kwàka bwà kwenza eci. Lwilà naabò lwà kunweku.”

¹⁹⁵ Nwamònu’s, bààkapanga kucijingulula. Mòsà ùvwa “mutàmbe kubàkoleshila maalu” Mubàtàngìle mu mpàla. Bu mùvwà Eliyà, kùdì Cilongelu cyà Babròfètà ne: “mmutàmbe kukolesha maalu,” mushààle ne Dìyì.

¹⁹⁶ Ki munùvwà nwènù beena Mpenta, ne cyà kutàpuluka ne bakwàbò bònsò bàà pa buloba, bakolèshe maalu ne Dìyì. Mpindyewu kanwikadi nwabùtukila mu cintu mene munwàkapàtukà amu, nudi munkacì mwà kulaluka! Kanwikadi nwakòsa lwongo lwènù ku Kàlvaryò nànsha. Kwàtaayi ku Dìyì dyà Nzambì, bwalu “Pa lubwebwe elu Nèngùibakìlèpu Èkèleeziyà Wanyì,” shààlaayi naaDì.

¹⁹⁷ Mpindyewu, Daatànà ne bakwàbò abu bààkeela meeji ne bàvwa. . . kùvwa mwà kwikala bantu bakwàbò. Nwamònu’s, ki meeji à buntu àvwà àteeta kufunyika mmwènenu yàbò mu ndongamu wa Nzambì. Aci cyambilu bulengaci’s. Meeji à buntu

âteeta bwà kufunyika yàbò mmwènenu mu Dìyì dyà Nzambi. Kabyàkukùmbànakù nànsha! Kabyàkukùmbànakù to. Kacya kabùtukù bikùmbàne ne kabyàdyàkukùmbàna to kashidi kààbì.

¹⁹⁸ Tàngilàayi Yesù pàvwàYe mwimàne mwaba awu, wàmba ne: “Nganyì wa kunùdì aku udi mwà kuMpiisha bwà mpèkaatù? Nganyì mwinè wa kunùdì aku udi mwà kuleeja ne Ncyènà mwenze menemene cìvwà Mifùndu myambe ne Mwua mufwànyine kwenza? Ndi ngamba ne Ndi m’Maasiyà. Ne Mémè ncìyi ngenza byenzedi byà Taatù Wanyì to, dìbà adi kanùdìdingi, kuNgiitabuujà to. Kàdi mémè ngenza byenzedi ne nwènù kanùyì mwà kuNgiitabuujà to, itàbùùjaayi byenzedi bìndì Mémè ngenza, bìdì bìMfidila bujaadiki.” Mwômò menemene. Kabàvwa mwà kucìtabuuja to, bàvwa baswè yàbò njila yà sungasunga.

¹⁹⁹ Kabàvwa pàmwàpa baswè kwenza nàнку ne kwikala mu ntùpàkànyì nànsha. Kì mbaswè kwenza nàнку to...Ncyèna ngiitabuujà ne muntu mmuswè kwenza aci to. Ndi nsangana bantu balenga mu èkèleeziyà minène yà cyena màngumba ayì. Ntu nsanganamù bantu balenga. Kàdi mbyenze ànu bu mwàkambà mulumbulwidyanganyì ku tudyòmbà, pàmvwà ngènda ndwa mwab’ewu ne: “Cintu cìdì cìkèmesha ncyà ne, mmunyi mùdì balombodi bàà bitèndeledi mwà kwimana mu cyambilu, ne kumòna bikondo ebi bilwa, kàdi kabàyi bàlekela bwakàne bwàbò bùbìnduluka, bwà mpèkaatù yà bàà pa buloba’s!” Kàdi pàdì mwakwidyanganyì mwà kujuukila kuulu ne kwamba cyòci aci! “Kàdi mmunyi mùdì beena kwitabuujà mwà kutùula mfranga yàbò yònsò ku mpangu ne bisuku byà kulaminyina nyama, ne bikwàbò, kàdi kabàyiku bàtwa ndongamu yà baamissionnaires mpàndà, bwà kutwàdila bàà pa buloba Èvànjeeliyò.”

²⁰⁰ Piinè apu mpàdì baamissionnaires ne nzala, kabàyi ne bisàbatà ku makàsà kwàbò... Àlèluuyàh. Kakùyì dingumba dyà kubàtwa mpàndà, bwà, ditwà dyàbò ku cyà Dìyì dyà Nzambi. Kakùyì cintu nànsha cìmwè cyà cìbàtwa mpàndà to. Nudi nubàsangana biikàle ne cintu cyà cìbàtwa mpàndà kuntwaku, pashìshe cyà nsongo cidìbo naaci ncinyì? Mushikì munène wà twitabàayi. Missionnaire mulelèlè, mushùwashùwàlè, udi bimanyinu bilonda, ùkaadi wa ùtèkemena mukàjì kampànda musukwidyanganyì wa bilàmbà bwà kumulamina tuundambù twà bicyele byà mfranga. Mònaayi ne, ki cyòci aci’s.

²⁰¹ Bàdì mwà kwikala kabàyi baswè kucyènza to... Èè, kàdi mbwalu kaayi naabù’s? Mmpofo. Yesù ngudi mwambè nàнку. Vùlukàayi ne, vùlukàayi ne, Yesù wàkamba cintu cimwècimwè aci. Ne bìdì bimwèka bu ne, leelù ewu... .

²⁰² Mpindyewu tèèlejàayi, ndi ntèkemena ne ncyènà ndyùlangana to. Pàdì ushìndika bulelèlè kampànda kùmvukù ne—kùmvukù ne ndi ndyùlangana to. Ndi nteeta ànu bwà... .

Ndi—ndi munangè...Nènku wèwè kùyi...Ndi—ndi ne lukunukunu bwà Èkèleeziyà. Eci, pàmwàpa bàdi èkèleeziyà wa Assemblée de Dieu, anyi ní ncinyi cyònsò cidiku aci, anyi—anyi ncyèna—ncyèna mumanyè ne ncinyi to. Ncinyi...Kabyèna ne cidibi bishintulula kùndi mèmè to. Ng'èkèleeziyà wa Nzambi. Kì cyòci aci, ngèèla meeji, ng'èkèleeziyà wa Nzambi. Èè, mpindyewu, bìvwa bikèngela bwà twètù bònsò kwikala nàнку, kî ng'èkèleeziyà wa dingumba wa Nzambi to, kàdi bikèngela twikalè beena Kilistò mu mwoyi. Èkèleeziyà wa Nzambi mmusòmbèle mu bimanu, kî ndínà, ne bikwàbò to.

²⁰³ Mpindyewu, leelù ewu mbyàbùngì be pa bwalu ebu, bwà ne cikaadi ne musinga ku byònsò kùdi bantu mbuumambàlà. Mpindyewu, tàngilàayi ne ba-Baptistes bàdi bènza ditàbuluja. Kaa, bàvwa ne òmwè. Bàvwa ne cìfidi cyà mu cidimu cyà 44 ne: “Mukwàbò mùllyo wà pamutù mu cidimu cyà 44.” Mayiisha à Billy Graham àdi àtùngunuka. Mòna's, ncyà bushùwà, mènzè cintu cinène. Ba-Méthodistes, ba-Baptistes, ba-Presbytériens, cìvwa ncintu cinène, kàdi citùdi bapetè ncinyi?

²⁰⁴ Yesù wàkambila Bàfaalèsà ne: “Nwènù bampopo balombodi bàà bampopo. Nudi nukòsolola mbù bwà kukùdimwisha muntu umwe mucìma, kàdi ùdi ùlwa ùshààla mwànà wa ifernò misangu yìbìdi kutàmba pàakatwàdijàye.” Nènku kì citùdi bapetè leelù ewu ncyòci aci.

²⁰⁵ Billy Graham, pàngààkabwelà mu didyà dyèndè dyà mu dindà mu Louisville, mu Kentucky, e kulwaye kuntwaku, ne bukitù bwònsò bwà mùvwà mutangidiki, kwàmba ne: “Ndi nya...Pòlò wàkamba ne...Kì cilejilu ncyèci.” Wàmba ne: “Pòlò ùvwa ùvwela mu cimenga kampànda ne ùkùdimwisha muntu umwe mucìma, dyà wàlukila paanyimà pàà cidimu cijimà ùsangana makumi àsàtù pa umwèpelè awu.” Yèyè ne: “Mèmè nyààya mu cimenga mpeta bantu binunu bisàtù bàkùdimuna mucìma, kàdi ngààlukila cidimu cìmwè pashìishe kàdi ncìyi mwà kupeta nànsha makumi àsàtù to.” Kwambayè ne: “Mbwalu kaayi bwinè abu's?” Kàdi mèmè kukàcila ngenzèlù wa mutangidiki awu. E kujulaye munu wèndè muulu mwaba awu, mutàngije mu bantu batwè ku nkàmà yìsàtù basòmbè mwaba awu, kwamba ne: “S'nnwènù musùmbà wà bayiishi beena lulèngù aba.” Yèyè ne: “Nudi nusòmba mu bìrò ne makàsà ènù matenteka pa mèèsà, kàdi kubìikidila muntu ku tèlefonè, kàdi kumulòmba bwà kulwayè bwà—bwà kushààla wa mu èkèleeziyà wenù. Nuvwa ne cyà kuya kamusàmba.”

²⁰⁶ Mèmè kusòmba mwaba awu, mèmè kudyàmbidila ne: “(Éyi Nzambi!) Nudi bamanye's, Mutangadiki Billy, wèwè's udi muntu munène. Mèmè ndi—ndi mupangi. Kàdi swàkù nkukonkèku cintu kampànda.” Mvwa njinga bwà ngìkalakù mukènzakàne mwàmbè eci; kàdi ndi—ndi—ndi nkàcila mwanèètù awu, ngèèla meeji ne mmusadidi wa Nzambi. Kàdi mvwa ànu muswè bwà kwikala mwambe eci ne: “Dibà adi, Billy, mmuyiishi

wa mûshindù kaayi uvwa Pólò nendè bwà kulondayè wèndè uvwayè mukùdimwishe mucìma umwe awu?” Cyàkenzekà ncinyi? Pólò kàvwa ùmulekela ànu wèla cyanza muulu cyanààna bwà kwangata dipàngadika to, ùvwa ùkamufikisha too ne ku dibàtiiza dyà Nyumà Mwímpè, kulàkwisha musùùkà wèndè ne kapyà, nàнку kàvwakù mwà kushààla mupùwe to.

²⁰⁷ Ki lutàtu lùdiku leelù ewu ndwòlò alu, mbuumambala. Èyowà. [Katùpà kàà mukàbà wà mèyi munda mutupù—Muf.] . . . bidimba, buumambalà bunène, tùlaasà tunène twà cilongelu cyà mu Dyàlumingu, kufuta mushinga kampànda bwà muntu kampànda udi mwà kwitabuujija ne kufikisha muntu mukwàbò ku dipàtukayè mu èkèleeziyà mukwàbò kuntu kwàka nàka, udi ne bantu bapite búngi awu. Nudi bamanyè’s, aci’s mBùùfaalèsà! Ne pashiishe kwenza ditàmbisha dinène bwà bwalu abu ne: “Tuvwa babàcimùne dyàlumingu dishààle.” Pìikalàbi ne nudi bafike mu mûshindù wà ne nudi nuvwija èkèleeziyà wa Nzambi ditembangana dyà lùbilu, nàнку dîbà dyàkùmbanyì dyà kukànga biibi kuya pambèlù.

²⁰⁸ Èkèleeziyà wa Nzambi ncintu cìdi ne mwoyi cyà Nzambi pa buloba, cileea Jesù Kilstò. Ndi mumanyè ne Eci kî nciitámbe kunangiwbato, kanwèna mwà kwindila nàнку to. Citùdi twindila nkwikala bajaalàme.

²⁰⁹ Kwenza diditambisha dinène bwà bwalu abu. . . Kàdi, nuvwakù bamanyè’s, mitooyi minène ayi kayàkenzelakù mupròfetà Eliyà bwalu to. Yèyè wàkuumvwa kapyà ne mwìshì bipita, ne makùbàkùbà ne mikenyi yà mvùla, ne mashi ne maanyi, ne bikwàbò byònsò kàbìdi, kabyàkamutàcishaku to. Nudi bamanyè’s, Àmèrikè ùsòmbela ùkèba misangu yònsò cintu kampànda cyà cinène ciikàle cyènza mutooyi wàbúngi munda mwàci. Kàdi Nzambi ùtu “kaàDíyi kakesè kapòlòbèle” kàtu kàkòka mupròfetà.

²¹⁰ Nudi bamanyè’s, ditempu musangu kampànda divwa diya mu budimi, ne dyènda ditùmpika, dyènza mutooyi wàbúngi dîbà divwàdi diyà ku budimi adi. Kàdi pàvwàdi dyàlukila, divwà dipìcila pa bibúngùbúngù bìmwebìmwè abi kàdi kadiyi dyènza mutooyi wàbúngi nànsha, divwà dyàmbùle bujitu bwà bintu bimpè. Nwamònu anyi? Èyowà.

²¹¹ Kàdi tudi biimikile dilabula dyètù pa musumbà wa mutooyi. Mmunyi mutùdiku mwà kwenza nàнку? Mmunyi mutùdiku mwà kwenza bintu byà mûshindù awu? Kaa, ekèlekèle! Ne pashiishe kufunyikamù dibàlakana dyà mu Hollywood adi, kubàndisha bakàji ku cyambilu, bà bwalu abu bavwàle bilàmbà bitàmba kubàlamata ne byà bisalula balùme masandi, bàja maja mu nyumà. Ncyènà mumanyè ne nnyumà wa mûshindù kaayi mwinè awu to!

²¹² Ncyènà ne meeji à kudyulangana mpindyewu to, ndi—ndi—ndi. . . Ndi—ndi munùngè. Mèmè nciyi munùngè to, dîbà

adi Nzambi neàndumbùlwishè pangìikalà ne kiipàcìlà kakwàbò kashiilàngàne ne kwòkò aku. Nwamònu anyi?

213 Kàdi's nudi buumvwè aci, nwamònu's. Kàdi's ki mwaba ùdi beena Mpenta balalùkile awu. "Tudi ne byàbùngi kutàmba bìvwà naabi mwànèètù udi mu disangu wàwa." Kaa! "Tudi ne byàbùngi bitàmbe byà beena Assemblées, bwalu twètù tudi ba-Unitaires, anyi tudi ba-Trinitaires, ne tudi baa..." kaa, *cikampànda*, *cikansanga*, anyi *cikankènga*, byònsò—myòdelè mishiilàngàne yidìbo naayi ayi, nudi numòna's. Kaa, mwanèètù, aci kacỳèna cyùmvwija ne cidi ne musinga *mupite* kùdi Nzambi to. Ùdi ùkwàta mudimu ne muntu-nkààya. Cyà bushùwà.

214 Mònaayi ne, mitooyi mikolè, kàdi kayàkakòka ntèmà yà mupròfetà nànsha. Mupròfetà kàkacỳuka mitooyi mikolè ayi to. Kàdi pààkatèèlejaye kaaDiyi kakesè kapòlòbèle aku, wàkamanya ne aci cìvwa Diyì, e kudibwikilayè kwìsù ke kulwayè wènda ùpàtuka.

215 Nudi bamanyè's, dìbà didi mwà kukòka màyi àbùngi mu tusunsa dikumi ne tùtaanu, kakùyì mutooyi nànsha wà kànà to, kàdi twètù... mutooyi mupite bùng-...tudi twètù twenza mutooyi wàbùngi mu kukòka litres yinaayi yà màyi kupita mùdi dìbà dyènta pàdidi dikòka ntuku mùliyò mujimà. Ncya bushùwà. Twètù tudi tukèba misangu yònsò cintu kampànda cidi ne "hurrah," mikolè ne yàbùngi ne mutooyi wàbùngi munda mwàci. Kàdi dìbà dikaadibi bikèngela kwangata Diyì, ki dìbà didi cintu aci cìmwàneshiibwa. Nwamònu anyi? Bàdi bàlwa, bàmba ne: "Èè, Nzambi àbèneshiibwè, ndi nnwàmbila..."

216 Mvwa mutwilàngàne ne muntu kampànda mwab'ewu àbìdi adi pànshì aa... Ncỳèna ngàmbe eci bwà kunyangakaja cijila to, bwà luse mfwilaayiku luse pangìikala ngèèla meeji ne bìdi... ncìvwija cyà cìnyangakaja cijila. Mvwa mu masangisha kampànda à mu ntentà, mwambi, mwambi wa cyena Mpenta kutwàlayè mukàjèndè kuntwaku bwà kwimbayè pyàno. Kàdi pààkandeejaye mukàjèndè, ne meeji wònsò matòoke, mvwa mwàmbè kudìshìnda. Mukàji awu ùvwa ne nsuki mìpi yètù yà menemene eyi, myenza mvwàngalà, kàbìdi ùvwa ne tukànù twà ku maci tunène twà menemene, ne tùpèntà twàbùngi ku mishiku, ní mbintàkanya kaayi abi, nzàdi yà ku minu milaaba yinà. Ùmwèka bu uvwa... Bìvwa byènta bwòwà bwà kucitàngila; nzàdi, minène, minène mile bu yà kabemba, mùshindù ewu. Ne mmwenekelu wa ùsalulangana masandi; ne kankanzu kipi, kakesè kàà katùpà pambidi, kakàvwa nànsha mwà kumufikila mu binù byèndè emu to yèyè musòmbe pànshì nànsha. Èè, mèmè kwimana mwaba awu ndambù, ki mèmè kwamba ne: "Mwanèètù, ndi mwà kukutàpa ku mwoyi bu mèmè mwà kwamba cintu kampànda anyi?"

217 Yèyè ne: "Mòna's, cyà bushùwà kwènà mwà kuntàpa ku mwoyi to." Muntu mwimpè, kàbìdi ùvwa ùmwèka bu mukàji

mwîmpè.

Mémè kwamba ne: “Udi wamba ne mukàjèèbè ewu mmunsantu anyi?”

Yèyè ne: “Èyowà.”

218 Mémè kwamba ne: “Mfwilèku luse bwà cyakwidi eci, kàdi ùdi ùmwèka bu ne ‘kí mmunsantu to’ kùndi mémè,” Mémè kwamba ne, udi mumanyè’s, “anyi cintu kampànda cyà mùshindù awu.” Mémè ne . . .

219 Yèyè ne: “Udi uswa kwamba cinyi, Mwanètù Branham?” “Kaa,” mwàkambàye, “udi wa mu mmwenenu wa cyena kale.”

220 Mémè ne: “Mémè ndi wa mu mmwenenu wa Mifundu. Ncyà bushùwà, mmwenenu wa Mifundu.” Ncyènà ngiitabuuja ne munsantu ùtu wènza maalu mùshindù awu to, ncyèna ànu mwà kucyènza to, pàdi Bible ucipiùsha. Nwamònu anyi?

221 Mmwómò, ke mùdibi bìmwèka, cikondo cyònsò, cintu cyònsò citùdi tutèeleja pa bwalu abu, “mbangate mapàngadika makumi ànaayi,” “mapàngadika makumi ànaayi ne ànaayi,” “tuvwa ne mapàngadika nkàmà yisàtù.” Èè, aci’s nditonda. *Ditonda* didi “mabwe.” Ncyà bushùwà, bwalu Peetèlò, pa ditonda dyèndè, wàkabiùkidiibwa ne “dibwe, dibwe dikesè.” Peetèlò, ditonda dyèndè. Mpindyewu, mabwe àdi ànu mîmpè, kàdi mbwîmpè kaayi anyi mmushinga kaayi ùdi naawu dibwe ku nzùbu piikalàku kakùyì mwibaki mulelèlè wa mabwe mwaba awu mwikàle ne cyamù cisonga cyà Dìyì bwà kubàsonga ne kubàvwija bânà bàà Nzambì? Nwamònu anyi? Ditonda ndîmpè ku cinyi?

222 Kí bwalu kaayi udi walukila kùyì mwà kusangana bantu makumi àsàtù pa bantu binunu makumi àsàtù to. Wèwè udi ubùnguluja ànu mabwe ùpàtula mu lupwishi, ne uàpàtwile patòòke kuntwaku, kàdi kaèna ànu mánji kwikala makùmbàne bwà ntempèlo nànsha. Àdi ne cyà kusongiibwa, kupimiibwa ku Dìyì dya Nzambì, kutèèkiibwamù, kulamakajiibwa kaaba kàmwè, miibakila pa cishimikidi cyà Dilongesha dya bàpostòlò, Yesù Kilistò Dibwe dya mu ditumba. Kì kwambaYè ne: “Ewu udi ungiitabuuja Mémè, byenzedi bìNdì ngènza yèyè neàbyènzè pèndè.” Ncyà bushuwà.

223 Mmunyì mutùdiku mwà kwikala Èkèleeziyà patùdi tupeetulangana muntu ne mukwèndè? Yèyè wàkamba ne: “Ku eci ke kwàmányina bantu bònsò ne nudi bayiidi Bàànyì, mpanwikalà ne dinanga muntu bwà mukwèndè.” Piinè patùdi tuumushisha bantu mu èkèleeziyà yàbù bwà kulwabò mu yètù ne tukòsoloka apu, bwà dibènga kupetangana dya cyèna màngumba. . . Ncyènà ngèyekela bantu aci to, ndi ncyèyekela dìngumba. Ncyà bushuwà. Kì mbantu nangananga to. Nwamònu anyi? Kaa, mbibi be, nànsha nànkù mémè. . .

224 Bidi bikèngela bwà wèwè kwikala ne cyamu cisonga eci, Dìyì dyà Nzambi, bwà kubàsonga kubàshiya bàna bàà ku Nzùbu. Kaa, ekèlekèlè! Disambila dyànyì didi ne: “Nzambi, lwijakaja ne Maalàkì 4. Tùpèèshèku Mukenji mu matùkù à ndekeelu. Tùpèèshèku muntu kampànda, tùmakù cintu kampànda bwà kusùngila èkèleeziyà wa Mpenta ewu.”

225 Mmùsànjeelà wa mùshindù kaayì uvwa Nzambi mwà kutùtùmina bwà matùkù à ndekeelu aa? Ndi nnwàmbila eci, mwanèètù wa balùme, mwanèètù wa bakàjì, bu mwanèènù ne musadidi nèènù udi mwindile bwà cikondo aci kulwaci, mmufwànyìne kwikala mùsànjeelà wa mùshindù ùmwèùmwe awu! Neikalè mwà kwaluja èkèleeziyà ku Dìyì. Nzambi, tùteekàayi cishimikidi bwà cyòci aci kumpàla kwà kufikaci mwab’ewu. Kumpàla kwà kulwayè twànjàayibi kwasa cishimikidi ne kwikala mabwe, masonga, pabwípì bwà kwimana ku lusekè lwèndè pàdì Nzambi ùmutùma, bwalu wàkalaya ne Ùvwa ne cyà kwenza nàнку.

226 Mpindyewu, ndi mumanyè ne, ndi ngumvwa aci cingalukidila. Nènku, vùlukàayi ne, ne kaadipà kakesè ndi mwà kubàkula dijingulula dyà nyumà, nwamònu’s. Mpindyewu, nudi nuumvwa cintu aci’s, pangàmbi Maalàkì 4. Kàdi lekèlaayi nnwàmbilèku cintu kampànda. Wèwè wambì ne: “Yesù wàkamba ne: ‘Bu wèwè mwà kucyàkidila, ewu ng’Eliyà mwena bwalu bwàkaakulabo awu.’”

227 Kàdi bu nwènù mwà kumòna cyàkambaYe mu—mu—mu Maatàayi Munsantu, nshapità wa 11 ku mvensà mwi6 ne: “Bu nwènù mwà kucyàkidila, ewu ke yèyè wàkaakulabo awu, ne bambe ne: ‘Ndi ntùma mùsànjeelà Wanyì kumpàla Kwànyì.’” Awu ùvwa Maalàkì 3, kì m’Maalàkì 4 nànsha.

228 Bwalu, mu Maalàkì 4, Wàkamba ne: “Kumpàla kwà ditùkù edi kulwadi, buloba bùvwa ne cyà kwoshiibwa ne bantu bàvwa ne cyà kwendelapù; bwoshiibwa bu nsonà.” Ncyà bushùwà. Ùvwa wàkula dìbà adi bwà mùsànjeelà kumpàla Kwèndè, uvwa Eliyà, udi wamba . . .

229 Ncyènà—ncyènà ngùitabuuja bintàkanyi byònsò bìdì byènda binyunguluka ebi pa bwalu bwà cinkutu cyà Eliyà ne bintàkanyi byònsò abi to. Mémè. . . Bwònsò bàà mu matalà aba bàdi ne cyà kulwa, mu bushùwà bwà bwalu, bwà kusalula cintu cishùwashùwàlè pàdici cilwa. Kàdi, lekèlaayi nnwàmbilèku, nekùjuukè mùsànjeelà ku ndekeelu kwà cikondo cyà beana Mpenta eci bwà kwoya cintu aci. Necìikalè muntu. Kì nkasumbù to, kì ndingumba to; kàdi muntu. Bitu nàнку misangu yònsò, ne Nzambi kèna mwà kushintulula ndongamu Wendè to, Yèyè ùdi Nzambi wa Cyendèlèlè.

230 Vùlukàayi ne, piikalàbi ne mùsànjeelà awu (Yone) ùvwa mùsànjeelà wa Maalàkì 4, nàнку Mifundu mmipangile, bwalu

Mmyâmbè ne: “Nebifwànyine. . .buloba nebwòshiibwe bu mùdì nsonà, ne baakàne nebèndelè pa butù bwà been lwonji.” Pa nànkù tùCìbalààyi, kàdi tùmònè ni kî mmwômù. Nwamònu anyì? Kàdi Yesù kààkambakù aci to, Wàkatèèla Maalàki 3 ne: “Nèntumè mùsànjeelà Wanyì kumpàla Kwànyì, bwà kuNdongolwela njila.” Ncyà bushùwà menemene.

²³¹ Mpindyewu, kàdi vùlukààyi ne, ewu mukwàbò ùvwa ne cyà kwalujulula diitabuuja dyà bânà kùdì baataatù, kwalujulula diitabuuja dya bânà ku Diitabuuja dyà baataatù, Bible wa ku cibangidilu.

²³² Ki cyàkenzà Mòsà menemene ncyôci aci. Ki cyàkenzà Yesù menemene ncyôci aci. Kî cyàkenza mùsànjeelà yònsò menemene ku mbangilu too ne ku ndekeelu kwà Bible, ku cikondo cyà ndekeelu cyà cipungu aci, bààkaalujulula mukenji. Bantu, kupicila ku malongolodi ne bikwàbò, mbabwejàkàje bintu byònsò ne bikwàbò, mu matùkù awu.

²³³ Mbenzè cintu cimwècimwè aci leelù ewu! Pa nànkù tudi bindile mùsànjeelà. (Nzambi, mutùmaaku!) Nudi nwela meeji ne netumwakidile anyì? To, mukalenge! Yéyè neikalè “muntu wa cimfiikààmùndà ne mukoleshi wa maalu,” cyà bushùwà menemene, kàdi Nzambi neàmujaaðikè. Mwena kwitabuuja mulelèlè, mudyanjila kulongolwela Mwoyi wà Cyendèlèèlè awu, Yesù wàkamba ne: “Bònsò bàdì Taatù muMpèèshe nebàlwe, ne muntu nànsha umwe kèna mwà kulwa pàdì Taatù Wanyì kàyì mumukòke to. Ne bònsò bàdì Taatù” (cikondo cipite) “muMpèèshe, nebàlwe.” Ncyà bushùwà, bàvwa. . .

²³⁴ Ncyènà ngiitabuuja mu dilongesha edi dyà ba-Baptistes dyà—dyà dikùbiibwa dyà Cyendèlèèlè adi to. Ndi ndiitabuuja mu mùshindù kampànda, kàdi ndi ngiitabuuja ne nudi mu dikùbiibwa dībā dyònsò dinùdì mu Èkèleeziyà adi. Kàdi panùdì nupàtuka mu. . . nupàtuka mwinshì mwà Mashi à Yesù Kilistò, kanwèna mu dikùbiibwa to. Ndi mu dikùbiibwa ku mvùla ntàntà yònsò ùndì munda emu.

²³⁵ Nènku paùdì mubàtijiibwe mu Nyumà Mwímpè ne *wamba* mùdì ne Nyumà Mwímpè, kàdi pashiishe uvila Dìyì dyà Nzambi? *Wamba* ne udi mwiitabùjè ne mupeè Nyumà Mwímpè, kàdi pashiishe uvila ne Dìyì kî ndilelèlè anyì? Dībā adi mmunyi mùdì aci mwà kwikala Nyumà Mwímpè pàdibi ne n’Yéyè wakafùnda Bible ewu? Nyumà Mwímpè uvila Dìyì Dyèndè Yéyè mwinè, wamba ne: “Mémè—mémè mvwa mupiile, wèwè udi mubingè”? To, aci kî n’Nzambi to. To, mukalenge.

²³⁶ Mwelè wa mvità mutwè! Mukalenge, tütùmìnekù Mukenji munène, ki citùdì bindile ncyôci aci. Pashiishe, mu bushùwà bwà bwalu, pààlwàye bwà kutèèka mabwe ne kuàsonga bwà nzùbu awu, ciikalà mwà kwenzeka ncinyì? Bààbùngì bàà kùdìbo kabààkutwàla diteeta dyà Dìyì nànsha. Nebànangè bulongolodi bwàbò kutàmba mùdìbo banange Dìyì dyà Nzambi, nànsha

mùvwà Dìyì adi dishindikiibwe kùdi muntu awu. Yèyè neikalè mupròfetà wíkala mwà kulwa mu Dìnà dyà Mukalenge, ne yèyè neikalè umwèpelè wíkala mwà kulwa pa buloba awu. Mémè ndi ncìitabuuja.

Kaa, bantu bônso bàdi bamba ne: “Neciikalè kasumbù kàà bantu.”

²³⁷ Ndi muswè bwà muntu kampànda àndèjè mu Bible mwaba wikalàci kasumbù kàà bantu; Nzambi ùvwa mwà kunyakaja Dìyì Dyèndè Yèyè mwinè, Yèyè kèna mwà kwenza aci to. To, mukalenge. Yèyè wàkalaya cyôci eci. Neciikalè muntu ùmwèpelè. Ne pashishe nekwikalè bakwàbò pàmwè nendè, mu bushùwà bwà bwalu, binunu ne binunu, beena kwitabuuja bàà Èkèleeziyà mujimà nebìikalè nendè, myaba yónsò.

²³⁸ Ànu mwàkadibi mu matùkù à Noà, kakwàkwikalakù bààbúngì bààsùngidiibwa to, bwalu Yesù wàkamba ne: “Ànu mwàkadibi mu matùkù à Noà.” Nudi bamanyè aci anyi? “Ànu mwàkadibi mu matùkù à Lotà,” (bàbadikaayi) “ki mwikalàbi.”

²³⁹ “Maulu ne buloba nebìjiminè, kàdi Dìyì Dyànyì kadyàkujiminakù to.” Nwamònu cìndi njinga kwamba anyi? Kaa, mwanèètù, mbitàmbe ne bwímpè bwà twètù kubalulula mutùdi bènde, díbà didi difwànyine kwikala dimane kuya kutàmba mùshindù utùdi twela meeji. Mbifwànyine kwenzeka ne tudi mwà kubiika dínà ditùkù ne kusangana ne tudi bapangìle cintu kampànda. Dimukàayi! Tàbalàayi, sambilaayi, konkòtònònaayi, kèbaayi, kanùlekedì Cìnùpicila pa mutu to. Nènku, vùlukàayi ne, pàdi Dìyì dyà Nzambi ñiyiishiibwa, Nzambi mmwenzèjiiibwe ku Dìyì adi ne neàDishindike.

²⁴⁰ Nudi bamanyè cyàkambàye kuntu kwàka, cyàkenzekà mu matùkù à Lotà anyi? Wàkamba ne: “Ànu mwàkadibi mu matùkù à Lotà.” Ncinyì cyàkenzekà kuntwaku bangabanga ne kapyà kumatakù? Ncinyì cìdi cifwànyine kwenzeka kàbìdì kumpàlà kwà kapyà kumatakù, mmukenji wà mùshindù kaayi ùdi Èkèleeziyà mufwànyine kupeta? Kì n’Sodomà mpindyewu to, Èkèleeziyà musungula. Kwàtaayi ànu bàsàtù abu: kùdi beena Sodomà; ne kùvwa Lotà ne musumbà wèndè, èkèleeziyà wa kwisùkwisù; kùvwa Abraham, Musungula. Bùsàtù bwàbò bààkapeta mukenji, èyowà, kùdi baamisànjeelà bashiilàngàne. Tàngilàayi ne ngwa mùshindù kaayi wàkaya kùdi Èkèleeziyà musungula, cyàkenzelàYe Abraham. Yesù wàkamba ne: “Ke mwikalàbi nàнку ku dilwa dyà Mwànà wa muntu.” Mpindyewu, katwèna mwà kuvila aci to, ki cyàkambà Yesù menemene ncyôci aci. Pa nàнку, mu bushùwà bwà bwalu neciikalè mùshindù awu.

²⁴¹ Mpindyewu, bààbúngì. . . pààkalwà Yesù ne kutwàla diteeta ne kwamba ne: “Kenkètaayi Mifùndu, bwalu munda mwàyì mmunùdi nwela meeji ne nudi ne Mwoyi wà Cyendèlèlèlè, kàdi yôyi ki yidi yìMfidila bujaadiki,” bàvwa mwà kutwàla diteeta adi anyi? To. Nènku muntu kanà yónsò ewu mmumanyè ne, ditonda

dyónsò dyà mabwe didi kadiyi mwà kutwàla diteeta dyà Diyì bàdi bàdiimansha ku diyala. Ndyèlè mitanta, didi dizòlolola mâyi, kadyèna mwà kutwàla diteeta nànsha. Kaa, balùmyànà, pashiishe kwediibwadi ku diyala's! Nzambi misangu yónsò ùsòmbèla ùbala ngiikàdilù pamutù pàà búngì.

²⁴² Nkààdi njikija. Mfwilaayikù luse mündi munùlamè dîbà dyónsò edi, ncívwa ne kiipàcilà kàà kwenza cyòci eci to. Ndekèlaayikù ànu ka—kasunsa, túbidi, ndeeje kaabwalu kàà ndekeelu aka, pashiishe nengìmanyikè ànu mu kasunsa kàmwè. Ndi ntèkemena ne ndi—ndi—ndi mwambè cintu kampàndà cyà kunùkwàcisha naaci, nwamònu's, bwà kunùfikisha ku dilonga. Nwamònu anyi?

²⁴³ Nzambi misangu yónsò ùtù ùbala misangu yónsò ngiikàdilù, kí mbúngì to. Kàdi leelù ewu twètù tudi twenza cyanza mwandamuna. Tudi tubala bidimba, mvwàdilu mwîmpè, bafuci bîmpè, pamutù pàà ngiikàdilù. Uh-huh.

²⁴⁴ Eliyèzà wàkakùpa kunyaka, kumpàlà kwà kupetayè ngiikàdilù. Ncyà bushùwà. Nganyi uvwayè mufwànyi kupeta? Kàdi wàkeeyemena Nzambi. Ngiikàdilù bwà cinyi? Ngiikàdilù bwà Izàkà, mukàji-musèla, udi Èkèleeziyà mwikàle cimfwànyi cyendè awu. Nudi bamanyè aci. Adi's dívwa dimiinu dyà mu mubidi dyà Abraham; edi n'Dimiinu dyà bukalenge dyà Abraham. Èè, piikalà Eliyèzà, mùsànjeela munkaci mwà kukèba mukàji-musèla ne ùteeta bwà kupeta ngiikàdilù, piikalàbi ne muntu awu mmulwè, mùsànjeelà wa ditùkù dyà ndekeelu, ùteeta bwà kupetela Kilistò Mukàji-musèla, kààkukèba buumambàlà bwà cyena dîngumba to. Neàkebe ngiikàdilù udi ne budiswila.

²⁴⁵ Tàngilàayi! Ngiikàdilù mwîmpè cyàkumpàla, pashiishe kumulogolola bwà kutwilanganayè ne Izàkà. Paanyimà pàà yèyè mumanè kupeta ngiikàdilù, pashiishe kumupùwisha mukùngùlù mule bwà kutèeleja mukenji wèndè bwà Izàkà.

²⁴⁶ Ki mùsànjeelà wa matùkù à ndekeelu, Bukènkè bwà ìbaamulòlò, ngwà kwanji kupeta dyàmbedi Èkèleeziyà awu (mpenyi piitabuujàbo Mukenji awu?), kumukèba. Nudikù mwà kubala cîndi ngàmba aci anyi? Kukeba mwaba ùdi Èkèleeziyà awu ùsanganyiiwà ùdi mene mwà kukulekela ubwela, udi kàyi mwà kukukàngila ciibi mumpàla. Nènku dîbà adi paùdi wenza cyòci aci, dîbà adi udi mupetè ngiikàdilù. Mpindyewu bu yèyè mwà kushààla mupùwe mukùngùlù mule bwà kumwambila mùshindù ùdi Mukàji-musèla ne cyà kulwàta! Úvwa ne cyà kulwàta bilàmbà. Kushààla mupùwe's! Ní ùvwa mwà kupeta. . .

²⁴⁷ Tàngilàayi Rebekah mutekète awu munkaci mwà kutèeleja diyì dyónsò, mwoyi wèndè mukesè awu wùvwa munkaci mwà kutuuta. Mùkàji awu. . . Yèyè—yèyè ùvwa munkaci mwà kumwambila. Mpindyewu, udi mukùpe munyakè wamba ne: “Nkwèpi kungààyà?” too ne pangààpetà ngiikàdilù. Pashiishe pàndi mpeta ngiikàdilù, dîbà adi kumupùwisha mukùngùlù

mukumbàne bwà kumulongolola bwà kuya katuutakeena nendè. Kaa, ekèlekèle, nciitu kaayi cyà citwa ku mwoyi's wè! (Mvwa njinga ngiikalakù ne ndambù mukwabo wa díbà ku ntankù kwàka's.) Kumulongolola; kushààla mupùwe bwà kutèèleja mukenji wendè bwà bwalu bwèndè. Eliyèzà kàvwa wàkula bwèndè yèyè to, kàdi ùvwa wàkula bwà ewu uvwa mumutùme. Nènku ùvwa ne mapà bwà kujaadika ne ùvwa mutùmìibwe kùdiye. Amen! Ùvwa muswè kumulwàcisha bintu ebi. S'nudi bamanyè mwàkamulongololàye.

248 Bu mémè mwà kumufikishaku ku dyowa màyi kwìsù kwèndè aku's! Nwamònu anyi? Nudi bamanye's, ndi—ndi ànu ndyùm vwa munyùkùshìibwe pa cyòci aci, pa nàнку mbitàmbe bwimpè mémè kushààla mupùwe. Nànsha nàнку, ndi mwambe byàbùngì, nudi bamanyè cìndì ngàmba. Èyo, tèèlejàayi, shààlaayi ànu bapùwe ví.

249 Mònaayi, mùsànjeelà wa cikondo cyà nshìikidilu, mudimu wèndè newikalè wà kulongolola bansantu, kulongolola Mukàjì-musèla bwà Mubàki. Aci ke ciikalà wèndè Mukenji. Mpindyewu nudi baswè kuyiila ABC bwà nwamòna mwà kulonga makumi makolè pashìishe anyi? Pàdi bitampì bikwàbò bìdi paanyimà ebi ne cyà kukàngudiibwa nebibuuludiibwè ànu kùdìbo. Ncyà bushùwà. Kuyiila ABC dyàmbedi. ABC ncinnyi's? "Misangu yònsò Kwitabuuja ànu Kilistò," (kí ntwitabàayi webè to), Kilistò. Nwamònu anyi? Kwitabuuja cìdìYe wàmba aci, kí ncidì muntu mukwàbò wàmba to.

250 Cyòci ciikàle cibèngàngana, muntu yèyè ùkwambila ne: "Mbìmpè bwà nwènù kukòsa nsukì yènù, nwènù bakàjì," s'nudi bamanye ne ùdi ùshima. Bible ùdi wàmba ne mbibi. Yèyè wàmba ne: "Udi mwà kwikalà mulami kàdi mucikàle ànu ne bakàjì bànaayi anyi bàtaanu," ùdi ùshima. Aci's ncibèngàngàne ne Dìyi. Nwamònu anyi? Bintu bikwàbò byònsò bitùdi twamba ebi, kubifikisha ku Dìyi ne kumòna ní n'Dìyi bulelèlè anyi.

251 Kwaluja èkèleeziyà ku Dìyi. Mpindyewu, ncinnyi cìdi mùsànjeelà ewu wa Maalàkì 4 ne cyà kwenza? Kwalujulula Diitabuuja dyà ku cibangidilu, Diitabuuja dyà dibìikà dyà ku lufù. Apu, bàakamòna Yesù paanyimà pàà Yèyè mumanè kubìika ku bafwè, kuMumònabò ùkwàta mudimu munkaci mwàbò.

252 Bàvwa bantu bàà mèyi makesè. Bàvwa bàpàtuka ne bàyiisha Dìyi. Kaa, bàvwa bàyiisha ntàntà mule, Pòlò wàkayiisha bufùkù bujimà musangu kampànda. Nwamònu anyi? Muntu wàkakùlùka kuulu kwà nzùbu, e kufwàye. Wàkatèèka mubidi wèndè pambidi pèndè, kumwaluja cyàkàbìdi ku mwoyi, nwamònu's. Nwamònu anyi? Nwamònu's, kutùngunukayè ne kuyiisha.

253 Mpindyewu, mònaayi ne bàvwa bantu bashìilàngàne ne cìdi ba Ph., L.L., Q.U.S.T., ne cyònsò cinwàswà kuciinyika

aci, cidiku leelù ewu aci. Ncinyi aci? Nkutàpulula mùsànjeelà ne... Mukenji, èyowà's, wà mùsànjeelà, newtùtùpulule beena kwitabuuja ne beena bupidyà. Bàmwè bà ku bôbò nebàDìtwè mu nyimà, ne bakwàbò kabàakucyenza to. Bàmwè bàà ku ba-Luthériens... Bàmwè bàà ku beena Kàtòlikè bàkatwà Luther mu nyimà, bàmwè kabààkamutwa mu nyimà to. Bàmwè ku ba-Luthériens bàakatwà ba-Méthodistes mu nyimà, banga kabàakabàtwa mu nyimà to. Bàmwè bàakatwà beena Mpenta mu nyimà, kàdi bakwàbò kabàakabàtwa mu nyimà to. Bàmwè nebàtwe Bukênkè bwà ibamulòlò mu nyimà, bakwàbò kabàakubùtwa mu nyimà to.

²⁵⁴ Mmunyì munwàmányà ne m'Bukênkè bwà ibamulòlò anyi kí mbwòbò? Buteetaayi ne Dìyì (kí ng'anu Dìyì *dimwè* to, Dìyì *dyònsò* ditèèka kaaba kàmwè), kumòna ne ndilelèlà anyi kí ndilelèlà. Kaa, ncinyi cidìmu? Dìbà adi piikalà Mukenji ùtwàla dishindika dyà Nzambì wènta civwàYe mwambe ne Ùvwa mwà kwenza aci, ne citwà Dìyì mu nyimà, dìbà adi Dìyì ndishindikiibwe bu misangu mikwàbò ne mwàkenza bipròfetà bikwàbò.

²⁵⁵ Mònaayi ne pàdì Mukenji... pàdì... Mònaayi ne pàdì Mukenji mubèngiibwe kùdì bantu, ne mùsànjeelà ùmwèka bu mucimùnyiiibwe menemene, kàyi mwà kupeta ciibi ckwàbò, kàyi mwà kupeta mwaba.

²⁵⁶ Bu mùvwà Mukalenge wetù. Vùlukàayi ne, pàvwàYe... Kaa, pàvwàYe wòndopa babèèdì, Mupròfetà wa citende awu: "Kaa, ekèlekè! Yèyè m'Muntu munène!" "Wetwàwu, Laabi, udi bishi?" Kadi dīngà ditùkù Yèyè kusòmba e kubanga kubàmbila Bulelèlà. Wàkapeta dyanyisha dyà èkèleeziyà, cisàmbà. Binunu kuMulondabi. Ùvwa ne bambi makumi mwandamutekète baMunyùgùlùkile, pa kuumusha bàà dikumi ne bàbìdì abu. Kàdi òmwè edi paanyimà pàà Yèyè mumanè kwandamuna dyàmpà dishàale... anyi mwandamùne... muvudije màmpà, bwà kujaadika ne Yèyè ùvwa Nzambì, bwalu ànu Nzambì ngwàkalòkesha dyàmpà mu Dyulu. Èyowà. Nwamònu anyi? Wàkavudija màmpà. Ne dyàkàmwè paanyimà pàà cyòci aci... Wàkendela pa màyi, wàkenza bishimà, ne kwenza bintu byàkenzàYe abi, bwà kujaadika ne ùvwà n'Yèyè.

²⁵⁷ Nènku pashiishe, Yèyè mumanè kwenza nàнку, Wàkasòmbà panshì ne kutwàdija kwambila bantu maalu muumisha ncyoncyoncyo. Bantu kumwelabò nyimà. Ki makumi mwandamutekète kwambabò ne: "Uh! Nganyì udi mwà kuumvwa Cyòci eci? Aci's ncyakwidi cicolè be. Udi usùsulula citùwà bushùwà menemene twela meeji ne civwa cintu kampànda. Mpindyewu, Wèwè udi nganyì bwà kutwàmbila twètù bintu byà mùshindù ewu?" Nènku bàakakwàta njila kuya.

²⁵⁸ Pashiishe Yesù kukùdimukaye kùdì kasùmbù Kèndè kakesè,

bu mu matùkù à Noà, bu mu matùkù à Sodomà, kwamba ne: “Kanwèna baswè kuya, nwènú pèènú anyi?”

²⁵⁹ Pashiishe Peetèlò kwambayè mèyì manène awu ne: “Mukalenge, kutùdì bafwànyìne kuya penyi?” (Nzambì, tùkwàcìshèku.)

²⁶⁰ Mònaayi ne pàdì Mukenji mudyombòdìibwe ne mùsànjeela ùmwèka mucimùnyìibwe, ki dìbà ditù Nzambì ùbwela mu cyalu, Mukenji wèndè mmumanè kujika.

²⁶¹ Noà, (nkaadi njikija mpindyewu), Noà wàkayiishila mu ciibi cyà bwátù bwèndè munda mwà bidimu lukàmà ne makumi àbìdì, too ne, ndekeelu wa byònsò kubangabò kumuseka bàmwelulwila, Noà wàkabwela mu bwátù ùdyàmbidila ne...nebiikale ànu bimpè. Nzambì kukànga ciibi. Ki bantu kushààlabò bàjèmbeleela mwaba awu bwà kumòna cyènzekà. Matùkù mwandamutekète musòmba muntwamu mukùpe munyakè, kàdi mu ditùkù dyà mwandamutekète mvùla e kulwayè. Uh-huh.

²⁶² Mòsà, ùvwa yèyè mu cinyi? Mu njila wa mudimu menemene, munkaci mwà kulombola cisàmbà. Mbù Mukünze wàkabwela mu njila wèndè. Ùvwa ku ndekeelu kwà njila wèndè. Ki dìbà mene adi dyàkalwà Nzambì ne cipeepèlè cyà ku Esètè e kupandulula mbù, ku ndekeelu wa njila.

²⁶³ Ùvwa n’Danyèlè, uvwa mwimàne pa mukenji wèndè ne: “Ncyàkudìkooyisha ne buloba bwà mfùmù ewu to.” Mushààle ne lulamatu kùdì Nzambì, ùvwa ànu ku ndekeelu menemene kwà njila wèndè, bivwa bìmwèka ànu bu ne ndekeelu wa cikondo cyèndè ùvwa mukùmbàne, bàkamwela mu bwìnà bwà ntambwe. Nzambì kumata mu cyalu.

²⁶⁴ Nènku mu dindà kampànda, lwà mu Baabùlòònà menemene amu... Amen! Ndi mwà kutàngila mu Dyulu, ndi mwà kumòna Nkwasa wa—wa butùmbi, Banjèlò biimàne banyùngùlùke. Kupwekesha mèsù mu Baabùlòònà emu, ndi mwà kumòna cikùtù cyà—cyà kapyà. Ndi mwà kumòna bàna bàsàtù biimanè mwaba awu, bàmba ne: “Nzambì wetù ùdì ne bukolè bwà kutùsungila.” Nwamònu anyi? “Kàdi twètù katwèna twinamina cimfwànyì cyèbè to, bwalu mbibèngàngàne ne Dìyì.” Nwamònu anyi? “Tudi biimàne kaaba aka.”

²⁶⁵ “Mbimpè,” mwàkambà mfùmù, “bàndaayi ne bibàndilu, nudi nwoshiibwa.” Kùvwa muntu munène wa civumà, ku ndekeelu kwà difùmà edi, s’ki bóbò bàdì bènda bàbanda bibàndilu aba, ku cidya ku cidya, luyà lwenda lùkola ànu kukola.

²⁶⁶ Ndi mwà kumòna Mwanjèlò mwimàne mwaba awu, umwe, ku luseke lwà Nkwasa wa butùmbi, kukwàtaye mwelè wà mvità ne kuwùpàtùlayè, wàmba ne: “Taatù, tàngila panshì pàpa, cìdì cìpitakana! Ndekèlè mpwekè, mmèmè Ngabùdyèlè, ndi nshintulula cyalu.”

267 “Alùjà mwelè wèbè mu cimànga, Ngabùdyèlè. Ndi mutàngile bwalu abu.”

268 Ki mukwàbò ùlwàlwa ewu, wàmba ne: “Taatu, mmème Absinthe, ndi mubùtudi wa ne màyi. Mu cikondo civwà cidyanjidile mvulà yà Noà, bantu bààkenza mpèkaatu ne kutàcisha cisambà Cyèbè, ne mémè—mémè kuvwija buloba bujimà dibùlungù dyà màyi. Ndi nkùpula Baabùlòonà pa kartà kàa buloba mu dindà emu. Ndekèlè nye.”

269 “Ndi mumanyè ne uvwa mwà kucyènza, Absinthe, udi Mwanjèlò wa lulamatu. Nwamònu anyi? Kàdi, Ncyèna mwà kukulekela uya to, ewu mudimu ngwànyì Mémè. Ndi ndiyiila Nkààyanì.”

“Wèwè. . . Udi mubàmòne anyi?”

270 “Mvwa mubàtàngile butùkù bònsò ebu. Mvwa mùmvwe disambila dyàbò dyà milòmbu. Mémè kumòna ditwà dyàbò dyà Dìyì Dyànyì mu nyimà. Nèngùikalè mwaba awu pa dìbà.” Kaa, ekèlekèlè! Ndi mwà kuMumòna ùjuukila kuulu ne bilàmba Byèndè byà bumfùmù abi biMujingile, mùshindù awu, wàmba ne: “Lwàku apa, wèwè Lupeepèlè lwà ku Esètè, ku Nord, ku Sud, ne ku Wesètè. Bwelàayi mwinshi mwà cipeepèlè cyà mvulà cyàcyà Mémè nemandè pamutu pèènu apu bu dikalu dyà mvitá mu dindà emu. Ndi mpweka mu Baabùlòonà, Ndi nya kashintulula cyalu.” Kaa, mwanèètù, Yèyè ùvwa mwaba awu ànu pa dìbà!

271 Dìsù dyèndè nditàngile mushààmushà ne ndi mumanyè ne Yèyè mmutàngile. Úcidi ànu mutàngile dilòlò edi, mmuntàngile, Yèyè mmukutàngile. Yèyè mmutàngile bwà kumòna ne netwimanè anyi katwàkwimana, ne ndipàngadikà kaayi ditwàngatà, bwà ne netùshaalè ne lulamatu ku Dìyì anyi netùmukèKu. Dìbà ndiyè kutàmba mùshindù unùdì nwela meeji.

272 Yakòbò, mu dyalukila dyèndè, musonsòdiibwe bwà kwalukila kwàbò, mwanàbò ùvwa ùlwa kutuutakeena nendè. Kaa, kàdi butùkù kampànda wàkalwangana ne Nzambì. Ùvwa ne bwòwà bwà kutuutakeena ne mwanààbò, kàdi pàakacyàbò kàcivwà ne bwòwà to, mùlòpò wènda ùtebuka. “Ncyèna dijinga ne Esawù anyi cilwilu cyèndè to, anyi nànsha cimwè,” Nzambì wàkabwela mu cyalu. Nwamònu’s, Yèyè ùtu wènzà mu mùshindù wa pabwàwù.

273 Yesù, mubèngùibwe, paanyimà pàa mumanè kwikala Mwànà wa Nzambì mùshìndikiibwe, yèyè kwamba ne: “Mémè nciyì ngènzà byenzedi byà Taatu Wanyì to, kanùNgiitàbùùjì to.” Yèyè ùvwa Bukènkè bwà ditùkù (Yèyè ùcidi ànu Bukènkè!), wàkabwela mu cyalu. Nèku bantu, ntàntà yònsò uvwaYè mwà. . . dyàmpà ne mishipa ne màmpà, bàvwa bènda bàMulonda. Kàdi pààkabangàYe kubàmbila Bulelèlè bwà Dìyì, aci’s cyàkabàtápulula, bàvwa ne bilèlè byàbò bìvwàbo

bakwàtakù. Bìvwa bìbèngangana, nànsha nànkù nudi bamanyè ne Yéyè ùvwa ànu ne Mifùndu menemene. Kàdi mèsù mafofomija à bàà pa buloba kaàvwakù mwà kuCimòna to; nànsha mpindiyewu mene kabèèna mwà kucimòna, nànsha mu cikondo kanà cyònsò kabààkacimòna to, ndi nswa kwamba ne, mu kaabujimà. Cyàkenzekà ncinyi? Byàkamwèka bu ne Ùvwa mucimùnyìbwe.

²⁷⁴ Nudi numòna's, kwambwila ku cikondo mene aci, dinangiibwa Dyèndè adi dyàkaMushiya. Dìbà kaayi? Dìbà dyàkabangaYè kubàmbila Dìyì. PàvwàYe mwà kuya kangata— ne kwenza masangisha à dyondopa ne tùmpanyè, bantu bònsò bàvwa bàMukèba ne: “Éyì Laabì, lwilà kunweku's!” ne: “Laabì, lwilà kunweku's!” Kàdi pààkabangà Dilongesha Dyèndè; “Kaa, Dilongesha Dyèbè adi didi dītácisha bantu bèètù.” Kaa, Nzambi wanyì! “Kaa, ncyènà kàbidì mwà kwikala Neebè mu èkèleeziyà wanyì to, Laabì, bwalu, mòna's, Udi ubweja cimvundù mu bantu bèètù, Dilongesha Dyèbè didi dibèngangana bikolè ne citùdì twitabuuja.” Ki ndishintùlùke to. Nwamònu anyi? Ki ndishintùlùke to. Èyowà. “Katwèna mwà kuKwakidila to, Laabì!” Kàdi Pèndè mushìndikìibwe, mujaadikìibwe kùdi Mifùndu yà ne Yéyè Ùvwa nganyì, nànsha nànkù kabàvwa ànu mwà kuCìitabuuja to.

²⁷⁵ Ndekeelu wa byònsò Wàkaya too ne ku cikondo cyà ndekeelu, pàvwà Satààna wèla meeji ne: “NgààMubàkudi,” wàkaMupoopela pa nkùrusè. Wènda ùpweka, ùpweka, ùpweka, ùpweka, too ne mwàkèlààbo meeji ndekeelu wa byònsò ne bàMupeci, kuMwelabò mu lukità. Kàdi ki dìbà dyàkabwelà Nzambi mu cyalu ndyòdì adi. KubikaYè e kupàtuka mu lukità! Bwà cinyi?

²⁷⁶ Cintu cìmwècìmwè aci, Pòlò, wàkamba ne: “Bònsò. . . Demà wàkùndekela. Bantu bònsò mbandekèle bwà Dìyì.” Ncyènà ngèèla meeji ne Demà wàkaya mu maa bar ne mu bintu kampànda to. Kàdi Demà ùvwa muswè kuya, Demà ùvwa muntu mubanji. Nènku ùvwa muswè kuya ne musumbà wà bantu bàà luumù, ki pa nànkù kuyaye mwaba wàkayà bakwàbò bònsò awu. Ke dìbà adi Pòlò kwambayè ne: “Bantu bònsò mbandekèle.” Bwà cinyi? Mudimu Wendè wà bwambi, ùvwa ulwa ku dibwe dyà mùsongà, ùpweka mutàngile ku ndekeelu.

²⁷⁷ Dijinga dyèndè divwa dyà kwikala mufwile diitaba bwalu ùvwa mushebeye Etienne, wàkafla bujaadiki bwà lufù lwèndè ne wàkalwìtaba. Ùvwa muswè kufwà. Pàvwà... Agàbò, mupròfetà mumanyike awu, mwimàne ku luseke lwèndè ùmwàmbila bwà kàyì ku Yelusàlèmà to, wàkamba ne: “Ndi mumanyè ne kabivwa bikèngela kuya to. Kàdi ncyènà ànu muswè bwà kuya to, ku Yelusàlèmà bwà kaswikiibwa nkànu pàtupù nànsha, kàdi ndi mudìlongòlòlè bwà kuya kafwà bwà Mukalenge Yesù.” Cìvwa ncinyi aci? Ùvwa ùtwa citampì ku mudimu wèndè wà bwambi.

278 Éyi Èkèleeziyà wa Nzambì udi ne mwoyi, tudi bafwànyine kwakula bufùkù bujimà. Mmunyi mutwàtwà citampì ku wètù Mukenji? Mmunyi mutwàcyénzà? Nzambì, tükwàcishèku bwà kwangata Dìyi edi, kwimana ne bukìtù. Enzàku bwà mèmè kufwà ku Dìyi; kwikala ne mwoyi ku Dìyi, kufwà ku Dìyi. Tangàlajà Bukènkè, bwalu nekwikalè Bukènkè ku ibaaumulòlò. Tudi mu dībà adi, nwènù balundà bàanyi. TùCitàbùùjaayi, patùdì twinyika mitù yètù apa.

279 Dyàmbedi, ndi nnùlòmba luse bwà kunùlama dībà dyònsò edi, ànu pèpì menemene ne mèbà àbìdì, dībà dijimà ne tusunsa makùmi ànaayi ne tùtaanu, Ndi ngèèla meeji ne, mmwòmò menemene. Ndi ntèkemena ne cintu nànsha cimwè kì ncinùtāpe ku mwoyi to. Katwènakù bwà kwenzelangana bibi to. Bwà ne, pìikalà aci mu wetù—pìikalà aci mu mwoyi wètù ne mu musùukà, dībà adi tudi bapìile, twètù biinè, patwikalà twètù bambi twamba ànu bintu abi, bānà bèètù bàdì mwab'ewu, bantu bàdì bùle tètè ne Nyumà Mwimpè aba. Nwamònu anyi?

280 Pàngààkasungidiibwà ne mèmè kwambila mpaasàtà wanyi wa ba-Baptistes ne mwya mupetè Nyumà Mwimpè, ne bintu byònsò ebi, ebi. . . ne Mwanjèlò wa Mukalenge mmungambile cyà kwenza, kwambayè ne: “Wèwè udi ne cyà kwikala mupete cilòòtālòòtā, Billy.”

Mèmè ne: “Docteur Davis, mèmè ndi mumòna Mwanjèlò.”

281 Yèyè ne: “Kaa, macimbu's wè!” Yèyè ne: “Aci's—aci's ncyà dyabùlù.” Nwamònu anyi? Kaa, ekèlekèle, mùshindù mwinè wàkantàpàci ku mwoyi's wè! Yèyè ne: “Wèwè ewu ukayiisha bamfùmù ne bakòkeshi bàà bukolè anyi?”

Mèmè ne: “Ki cyàkambàYe ncyòci aci.”

Yèyè ne: “Ne kàlaasà kàà mwandamutekète kaùdì mulonge aku anyi?”

Mèmè ne: “Ki cyàkambàYe ncyòci aci.”

282 Yèyè ne: “Udi wela meeji ne nganyi watèèleja? Upàtuka wenda uyiisha dyondopa dyà kùdì Nzambì mu ditùkù dyà bwena edi, dìdiku lukèbukebu lwònsò lwà manga malenga ne bintu byònsò ebi anyi?”

Mèmè ne: “Ncyènà ncyùka bùngì bwònsò bwà baaGoliyàtà bàdì biimàne mwaba awu nànsha.”

Yèyè ne: “Udi wela meeji ne nganyi wàkutèèleja?”

283 Mèmè kwamba ne: “Pìikalà Nzambì ngudi untùma, nekwikalè muntu kampànda wantèèleja.”

284 Ncivwa mumanyè bwà bwalu bwènù ciine cikondo aci to. Nènku pàndwilè kunùdì, bìvwa ànu bu mùdì kulwàta gant ku cyanza amu, mèmè kukùmbànangana neenù pyòpyopyò. Ndi munùangè. Ndi munùangè. Ndi munange bampaasàtà naanyi. Nudi nwela meeji ne ba-Presbytériens, ba-Méthodistes, anyi ba-

Luthériens, bàwba bafwànyine kukàngula èkèleeziyà wabò ewu bu mùdì mwanèètù ewu mwenze dilòòlò edi nùnkù, bwà twètù kusòmba mwab'ewu ne kuyiisha mukenji wà mùshindù ewu anyi? To, mukalenge, nànsha kakesè. Aba mbantu bàà bukitù bàdì biitabuuja Bulelèlè. Mpindyewu twàyì Dìyì munyimà pàmwè naabò, nwamònu's, shààlaayi kule ne bintu byà pa buloba.

²⁸⁵ Bàna bèètù bàà bakàjì, lekèlaayi nsukì yènù yileepè. Lwàtaayi nkanzu yènù pambidi, milenga ne mikezùke. Bundu bwènù. Kùpulaàayi tupenta twònsò tùdì mumpàlà mwènù atu. Nwamònu anyi? Nudì ne Mifùndu yàbùngì yà kulaba tupenta kwisù kupita yà kukòsa nsukì yènù. Ncyà bushùwà. Kanwènji nànkù to. Kanwènji nànkù to. Bible mmwàmbè ne bidi cintu cyà bundù bwà mukàjì kwenzayè nànkù. Nsukì mbutùmbì bwèndè. Mpindyewu wèwè udi wamba ne: “Aci's ncintu cikesè.” Abi's mbìmpè, tuumushàayi tuntu tukesè atu mu njila nènku pashiishe tudì mwà kwakula bwà bintu binène. Tùbangàayi mùshindù mwakàne.

²⁸⁶ Mpindyewu, bàna bèètù. Kaa, ekèlekèlè! Lekèlaayi ngàmbeke cintu cimwèpelè kùdì balùme. Mukalenge, mwanèètù wa balùme, wèwè mwà kulekela mukàjèèbè wènza cintu bu nànkù awu, ndi nkumvwila bundù, cìkòlà wamba mùdì muntu mùjìibwe ne Nyumà. Bundù bwèbè, wèwè ùdì ùlekela mukàjèèbè ùya mu mùsèèsù.

²⁸⁷ Ne nkanzu webè awu ùjuulangana masandi ne bintu byònsò abi mùshindù awu, kàdì udikù mumanyè ne Bible mmwàmbè ne, Yèsù wàkamba ne: “Ewu yònsò ùkàtàngidi mukàjì bwà kumwalakana mmwendè nendè masandi anyi?”

²⁸⁸ Wèwè udi wamba ne: “Mpindyewu anjì indila kakesè, mwanèètù wa balùme, ncyènà mwenzè bwalu.” Ndi ngiitabuuja pàanyi ne kwenà mwenze bwalu to, mwanèètù wa bakàjì, kwenà mwenze bwalu to mu cyenzedi cyà mu mubidi emu. Kàdì wèwè mudileeje ne ngènzàmpèkààtù kukutàngilayè, pèèbè mudizànjike mùshindù awu, nganyì udi mupìile? Wèwè ngudi mupìile, bwà kudileeja kwèbè. Dìbà adì mu ditùkù dyà Cilumbulwidi, dìbà dyàlumbulula ngènzàmpèkààtù awu bwà masandi, nganyì uvwayè mwendè nendè masandi awu mu mwoyi wèndè? Wèwè! Bwà cinyi? Bwalu udi mudizànjike. Mpindyewu, aci's cidi ànu Bulelèlè.

²⁸⁹ Kwenàku, kwenàku, mwanèètù wa bakàjì, bwà luse, mu Dìnà dyà Yèsù, ndikù mwà kukulòmba bu mwanèènù wa balùme, mwà kutèeka lwendu lwèbè mu bulongàme anyi?

²⁹⁰ Mwanèètù wa balùme bundù bwèbè bwà kulombola nzùbu webè mùshindù awu, longòlòla lwendu lwèbè. Ndi—ndi ne ditèkemena ditàmbe bwìmpè dyà kunùdì bu muntu. Nwamònu anyi?

291 Bampaasàtà bàdì bàlekela bantu abu bàbwela, bàshààla balami ne bintu bikwàbò byònsò ne midimu yà mùshindù awu, biikale ne bakàjì bàbìdì anyì bàsàtù ne mwoyi, ne bikwàbò, kwènakù ne bundù anyì, wèwè mwambi? Kanwènaayikù nudyumvwa bundù bwà bintu abi anyì? Ne kubàbwejamù bu bidimba pàdibo bènda masandi, ne bànwà mfwankà, ne bènda byònsò, kàdì kabàyi nànsha bàbùtèèja mu cyambilu nànsha. Bundù bwèbè! Ndi—ndi—ndi nkusambidila, mwanèètù.

292 Nzambi ànùbènèshè. Twasàkidilaayi bwà lutùùlù lwenù bwà kuntwàlà kwènù. Mpindyewu, ndi ndikonka . . .

293 Bukènkè bwà dilòòlò mbulwè. Bukènkè bwà dilòòlò bùdì kaaba aka, kwalukila ku Dìyì.

294 Mpindyewu, ne mitù yènù miinyika, myoyi yènù miinyika, dyèlaayi lukonko elu ne: “Ndi nkùmbanangana ne Dìyì edi anyì? Ndi nkùmbanangana anyì?”

295 Disambila dyànyì dìdì ne: kuumukila ku cibumbà cyà ku cyambilu eku: “Èyi Nzambi, kòsa ku mèmè eku cintu cyònsò cidì kaciyì bu Wèwè. Èyi Nzambi, cyuumushe kùndi eku.” Tudi mwab’ewu ku ndekeelu kwà njila.

296 Èyo, udikù mufwànyine kwikala ne meeji matòòke à mùshindù awu bwà kwela byanza muulu ne kwamba ne: “Nzambi, kòsa ku mèmè eku cintu cyònsò cidì kaciyì bu Wèwè. Nsongeku, Mukalenga, mfwimbàku ne ùnsòngè”? Mukalenge ànùbènèshe.

297 Kwòkù muntu udi kàyì mujaalàme to, kàdì mwikalè ngènzàmpèkààtù ne mulalùke dilòòlò edi, ne kacya kàyikù mwitàbe Kilistò bu Musùngidi, anyì muntu mutwè cìmpingà anyì cintu kampànda to, kàdì muswè bwà kwalukila, udi mubiikidiibwe bwà kulwa ne kwimana mwab’ewu ku cyoshelu. Bu nwénù mwà kwitabuuja ne Nzambi mmufwànyine kuumvwa masambila ànyì bwà babèèdì, ndi ngiitabuuja ne mMufwànyine kungumvwa. Nènku nwénù ne mèmè popàmwè bu mutùdì tutèeka diitabuuja dyètù pa Mulàmbù, Yesù Kelistò, Mwànà wa Nzambi, ne tulàmbula disambila, ndi ngiitabuuja ne Nzambi neàtèèlejè. Nudi babilikidiibwe bwà kulwa ne kwimana bwà disambila.

298 Mpindyewu, Taatù wetù wa mu Dyulu, tudi tuKupèèsha batèèleji aba, mèyi aa makòsòlòke à muleebulebu, Mukalenge. Too ne bààbùngì mbacyòke ne bazengèle ne bayè pambèlu, pàmwàpa bàmwè mbodyumwè bibì ndambù, nènku, Mukalenge, mèmè—mèmè ncyèna ànu mumanyè ne nganyì udi mu batèèleji aba dîbà dyònsò nànsha. Nènku, paanyimà pàà byònsò, Taatù, N’Dìyì Dyèbè ne Wèwè udi mumanyè mwoyi wànyì. Pa nànkù . . . ne mèmè ndi . . . Dyàkabi dyànyì mèmè ncìyi ncyènza to. Nènku ndi—ndi ne cyà kucyènza, Mukalenge. Pa nànkù ndi ndòmba mpindyewu bwà ne bantu bàdì ne luumvu lwà Dìyì batèèleje bitòòke too, kàbìdì ndi mutwishiiibwe ne aba

ba Ûdi mubiikile ku Mwoyi nebuumvwè, aci kî ncintu nànsha cimwè pa buloba to kàdì mwoyi mûle téntè ne dinanga bwà Nzambi ne Èkèleeziyà Wendè úndi ndòmbela bintu ebi.

²⁹⁹ Taatù pàmwè ne cyanza cyònsò mwab'ewu ncyediibwe muulu bwà ditengudiibwa, bwà kukòshiibwa byònsò byà pamutù bìdi kabiyi byà kwòkò aku to. Nzambi, tükwàcìshèku twètù bònsò. Ndi mwimàne ànu pàmwè naabò, Mukalenge. Ndi umwe wabò, ndi mwindile dilwa dyà ditùkù dyà disànka dyà Bukalenge bwà bidimu cinunu byà disànka adi piikalà mpèkaatù ne bundù ne cyà kubùtudiibwa bwà kashidi. Nènku, Taatù, patùcidì pa buloba ebu apa tudi bamanyè ne tudi tukòkeshiibwa kùdì bintu ebi, tudi twenza bilèma, tudi twenza mpèkaatù, tucidì ànu munkaci mwà lwendu, nànsha mwinè mutùdì katùyì tujinga kucyènza amu. Ànu mwàkambà Bible ne: “Kanùtekeci to panùdì batàndìshìibwe.” Kàdì ndi ndòmba, Taatù, bwà ditàndisha dyà Dìyì dinkosòlòle bikolè ànu mùdidi mwà kukòsolola muntu kanà yònsò ewu. Nènku ndi ndòmba, Taatù, bwà bàcyùmvwè mùshindù awu.

³⁰⁰ Ndi ndòmba bwà Ûbàbènèshèku mpindyewu. Ne swàkù bwà eci, bu mutwàlòmbi kumpàlà amu, Mukalenge, bamanyè ne batàngidile citwàlòmbi aci, bwalu katwèna baswè kulòmba bibi to, katwèna baswè kulòmba cintu kampànda cidì ànu bwà kuvudija ànu méyì to, bwalu tudi munkaci mwà kuyiikilangana Neebè.

³⁰¹ Ndi nKulòmba bwà ùbèneshèku mwanèètù mutekète ewu udi munkàngwìle ciibi bwà mèmè kubwelamù dilòlò edi. Ndi ndòmba bwà Ûbèneshèku èkèleeziyà wendè ne swàkù bwà yònsò wa ku bidimba byèndè, Mukalenge, ànu. . . Swàkù bwà eci cìikale cimunyi, mwaba ùdì mapà à Nzambi munkaci mwà kupòngoloka ne bintu byònsò byènda mu mùshindù munefùke.

³⁰² Bèneshàku mwambi yònsò udi musòmbe kaaba aka ewu, ne èkèleeziyà yàbò. Ne swàkù kwikale dinyùkishiibwa dinène, anyi mutooyi mu mucì wà mùrier, wà Nyumà wa Nzambi ùkòsolola mu Phoenix emu, ne ùtwàla maèkèleeziyà ku bwobumwè ne ku—ne ku ditàbuluja dinène, bwà bambi bàpangile ne mwà kuyiisha, bwà Butùmbi bwà Nzambi; kàdì dîbà dyàdisanga bansantu pàmwè kumpàlà kwà dîbà mu mapingaja, kwela kwà mbilà ne masambila ne majaadiki ne mayiisha, ciikàle ànu dipòngoloka dyà Nyumà, dîbà diikalà cimenga cijimà cikòkùibwe bwà kulwa, ne kutèeleja. Enzàku nànu mpindyewu.

³⁰³ Ondopaku babèèdì munkaci mwètù, Mukalenge. Ubàpèku disùngidiibwa dyà kùdì Nzambi, Taatù, ku Dìnà dyà Yesù Kilistò.

³⁰⁴ Mpindyewu ne mitù yètù miinyika, kwòkò kwikàle muntu kanà yònsò udi ujinga kwimana ànu ku nyùngulwilu wa cyoshelu eku mpindyewu, nènku patùdì ne mitù yètù miinyika apa, nènku netwimbilèku mu matàma kasambu kakesè, kàà—kàà—

kàà kîmpè, kasambu kàà Èvànjelìyò kàà kale. Nènku tudi baswè kukimbila mu matàma. Nènku pàtùdì tukimba apu, kwòkò kwikàle muntu udi uringa bwà twètù kumusambidila, bwà di—dilabula dyà ndòndò, bwà kupeta Nyumà Mwîmpè, anyi udi musungidiibwe kàdi kùyì mwánjì kujidiibwa to, anyi ní ncinyi cyònsò, netwikalè ne disànkà dyà kwenza cyòci aci patùdì twimbila mu matàma kasambu kakesè aka apa, *Ndi MuMunangè*. Nènku pawikalà muMunange cyà bushùwà, tùneemekàayi Díyì Dyèndè mpindyewu.

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndù
Ku mucì wà Kalvariyò.

³⁰⁵ Pàdibo bènda bàlwa apu, ndi muswè bwà muntu ne muntu àngatè kaaba kèndè kaaba aka mpindyewu. Èyo, mwanèètù wa bakàjì.

. . . muMunangè, ndi muMunangè
Bwalu Yèyè . . .

Lwàku mpindyewu, ku cyoshelu eku, wèwè udi muswè kulwa mpindyewu awu.

. . . mêmè
Ne wàkampetela lupàndù
Ku wà Kàlvariyò . . .

³⁰⁶ Bwà cinyi bàmwè bàà ku nwénù bàna bèètù bàà bakàjì bàdì ne nsukì mîpì kanwénakù mwà kulwa kudicipa kùdì Nzambì? Nudi baswè nnubadileci mu Bible anyi? Mbîmpè. Kwénàkù ulwa, wamba ne: “Mukalenge, ndi muswè kwikala mwakàne mu bintu byònsò, ne ndi muswè kutwàdija bîmpè. Nènku ndi muswè kwikila mu njila mwîmpè ne kushàalamù. Nengènzè mulayi kÚdì dilòlò edi, Mukalenge. Nenyilekèle yileepa kuumukila ku mpindyewu?”

³⁰⁷ Bible mmwambe ne bìdì bundù bwà mulùme kwikalaye ne nsukì mile, ùdì ùmwèka bu mukàjì. Nzambì mmwènzè bipungidi bibìdì, eci ne Adàmà ne cikwàbò ne Evà. Wàkabàvwàdika bishiiilàngàne. Bòbò mbashiiilàngàne, ànu menemene. Bàtu misangu yònsò ànu bashiiilàngàne. Kùdì bipungidi bibìdì mu Bible mwònsò. Mvwa muswè kuyiisha pa cipungidi pàbìdì aci dilòlò kampànda, misangu mikwàbò, kunùleeja dishiiilàngàna didiku. Kaa, ekèlekèle, mbyà dikèma. Bìdì too ne mu bwalu bwà dibàkà dyènù ne difwà dyàdì, bu nwikalapù bamanyè bulelèlè pa cyòci aci, nùku ncikòse bwalu bwònsò. Ncyà bushùwà. Èyo, mpindyewu kàbìdì, patùdì batwìshiiibwe mpindyewu apa. Lwàku, kwénàku muswè kulwa anyi?

Ndi muMunange . . .

Udi dijinga ne Nyumà Mwîmpè anyi? Bànda kunweku, imàna pabwìpi apa.

Bwalu Yēyè wàkannanga kumpàla
Ne . . .

Udi muswè lwendu lwà lulamàkàne Nendè anyi? Lwàkù, enza mucipu, ne wimanè ku luseke Lwèndè ne ùlamè mucipu awu. Kabyàkukwenzela bîmpè nànsha kakesè bwà kwenza mucipu pawikala kùyi muwùlamè nànsha.

Pa . . .

Udi mwà kulwa kwenza mucipu wèbè. Nzambi ùdi ne cyà kuwùwuja. Wèwè shààla mukwàte ànu ku mucipu wèbè.

³⁰⁸ Mpindyewu ndi ndòmba bambi naanyi ní nudiku mwà kulwa mpindyewu mu nyungulukilu emu, kwimana banyùngùlùkile bantu bàà mushinga mukolè aba patùdi tusambila mwab'ewu apa, kwakula ne umwe ne umwe wabò, kukonka majinga àbò mpindyewu patùdi mwab'ewu apa.

³⁰⁹ Muntu yònsò ìkalè ne kaneemu ne mwèndè mwònsò. Mpindyewu, Nzambi neànùtwè mushinga, cikolà nwènù ikàlaayi ànu ne kaneemu too ne pènjiiwbà disambila edi. Nudi mwà kulwila ànu kunweku mpindyewu, lwà mwab'ewu, mu nyungulukilu emu, kumpàla eku ne paanyimà pàà bantu bàdi biimàne mwab'ewu bwà disambila aba.

Ku mucì wà Kàlvariyò.

³¹⁰ Mpindyewu kàbìdi, pàdìku bambi bakùngwile nseke yònsò apa.

Ndi muMunange, ndi . . .

Ndi njinga kumòna aci, bambi bàà malongolodi mashilèshilàngàne, bònsò mu umwe mpindyewu; aci's mmwinshì mwà Mashi.

Bwalu Yēyè wàkannanga kumpàla
Ne wàkampetela lupàndù
Ku mucì wà Kàlvariyò. (Ekèlekèle!)

³¹¹ Mpindyewu bàndaayi, bânà bèètù bàà balùme, ànu kùdi wèbè muntu ùdi mwimàne ku luseke lwèndè awu, mutentèkèle cyanza ne mukonke cidiye ùjinga kùdi Nzambi. Eci's ncikondo cilenga be? Nudi bamanyè's, pàndì mmòna eci, tângilàayi kunweku, bambi bàà maèkéleeziyà mashilàngàne, mbimàne banyùngùlùke bònsò pàmwè. Bânà bèètù bàà bakàjì bàvwà pa tulààlu twà babèèdi mbajuuke, bapàtùke, bayè. Mukalenge àtumbè. Ne kusàkidila kwàbùngì bwà bwalu abu, biimàne mu Dìnà dyà Mukalenge.

³¹² Mpindyewu, batèeleji mpindyewu, muntu yònsò inyikà mutù wèbè. Yònsò wa kunùdi mpindyewu, mu mwoyi wèbè, akulà ànu ne Nzambi mùdi mufwànyine kwakula naanyi amu; bu mùdi mufwànyine kulwa kùndì kwamba ne: "Mwanèètù Branham, ndi—ndi . . ." Wèwè mwenzè cintu kampàndà cyà cibi, wamba ne: "Mfwilèku luse, Mwanèètù Branham. Ndi—

ndi mwenze cikampànda, udikù mwà kumfwila luse bwà bwalu abu anyi? Nenkwenzele mulayi, Mwanèètù Branham ne, ncyàdyàkukwenzela bibi to.” Mpindyewu shintùlùlà ànu dìnà dyànyì, unguumùsha mèmè, ùteekè Mukalenge webè Yesù Kilstò.

³¹³ Nènku wèwè dijinga ne dyondopa, byenze bu wèwè mwà kulwa kwamba ne: “Mwanèètù Branham, ndi—ndi mupange mupangilamù, Ncyèna mudyè didyà dyà dilòlò edi to, nènku, èyo, ndi mumanyè ne bu wèwè ne ndola umwe uvwa mufwànyine kumumpèèsha.” Mpindyewu, nwamònu’s, kabyèna bikèngela bwà wèwè kwambila Nzambi ne: “ Bu Wèwè ne bukolè bwà dyondopa to.” Yèyè ùdi naabù, nwamònu’s. Uvwa mwà kwikala mucìngambile mèmè ne: “*Ni* udi naabù.” Kàdi kùdi Yèyè kwèna ne cyà kwamba ne: “*Ni* udi ne.” Yèyè ùdi naabù! Nwamònu anyi? Pa nànkù wèwè udi wamba, bu ne: “Mwanèètù Branham, udikù mwà kumpèèshà ndola umwe anyi? Mèmè—mèmè—mèmè ndi dijinga ne cintu kampànda cyà kudyà.” Mòna’s, mu bushùwà bwà bwalu ndi mufwànyine kukupèèsha, udi mumanyè nànkù. Bu ne mwva naayi mwva kukupèèshayi, dībà kanà dyònsò. Mwva mwà kwikala ne mwoyi mubì be bu ncìyì mukupèèshayi to. Nènku mèmè, mwikàle mwena cikisu, ngènzàmpèèkààtù, kàdi mufwànyine kwikala muntu wa mwoyi mulenga kùdi muntu kampànda bu wèwè awu, Nzambi Yèyè mmufwànyine kwikala cinyi?

³¹⁴ “Panwikalà nwènù bantu babì bamanyè mwà kufila mapà mîmpè, mmunyi mwàtàm̀bà Taatù wenù wa mu Dyulu kufila Nyumà, kùdi aba bàdi bàMulòmba.” “Bu nwènù mwà kulòmba mushipa, Yèyè ùdi mwà kunùpèèsha nyòka anyi? Nwènù balòmbè dyàmpà, Ùdi mwà kunùpèèsha dībwe anyi?” Nànsha byà kumòna lufù!

³¹⁵ Mòna’s, bu wèwè ànu mwà kuMulòmba mu mùshindù awu, ne diitabuuja, mwikàle witabuuja ne, neucìpetè kùdiYè ne lùkàsà misangu miliyò kutàm̀ba mùdi mwà kupeta ní ncinyì cyònsò kùndi mèmè. Ne udi mumanyè ne ndi mwà kukwambulwisha, ndi mufwànyine kwenza cintu cìndi mwà kufùdishà. Yònsò wa ku bânà bèètù aba mmufwànyine kucyènza, tudi bafwànyine kukalakasa dyeyà dyònsò didi mu cibòmbi cyètù bwà kukwambulwisha. Tudi bafwànyine kwenza cintu kanà cyònsò citùdi bafwànyine kwenza aci. Kàdi eci ncintu cyùdi ne cyà kwitabuuja ku diitabuuja.

³¹⁶ Mpindyewu itàbùùje ne neucìpetè patwàsambila, ne wèwè usambilà, ne batèèleji bàsambila, Nènku ndi ngiitabuuja ne Nzambi neàpwekè ne neàtwe disambila dyètù musinga. Nènku mu kasunsa mene kaùdi umvwa ne wàCìpeci aku, ne Nzambi ùdi wàndamuna disambila dyèbè adi, dībà adi udi mwenze cipungidi ne: “Mukalenge, mwva mwenze bibi, ncyàdyàkucyènza kàbìdi to. Nengèlè cyanza cyànyì muulu, nKulaya ne ncyàdyàkucyènza to,” Nzambi neàkukwàcile pa dīyì dyèbè. Nènku wèwè ciitàbùùje

ānu mūshindū awu ne bwalu nebūtuukè. Pashiishe elā byanza byèbè muulu ne ùMusàkidilè ne: “Mukalenge, ngénjì mucipù wànyì. Ne ndi mumanye ne m’Byèbè Wèwè, ne Wèwè ngwàkalaya bwà kwandamuna, ne Kwèna mwà kupangila to.”

³¹⁷ Taatù wa mu Dyulu, twètù, basadidi Bèèbè, tudi biimane ne cisumbù eci cidi cilwè kumpàla eku cikèngela mabènesha Èbè ne ntèmà Yèbè pa díbà edi. Taatù, bàdi bitàdì byà bucimunyi byà Mukenji, Bukènkè bwà cikondo cyà dilòlò. Bààbúngì bàà kùdìbo, Mukalenge, bàdi munkaci mwà kutonda. Bāmwè bàà kùdìbo bàdi mu dikèngela dyà bām̀bà ne kufwà. Ndi ndòm̀ba, Nzambi, bwà ne mu Dìna dyà Yesù bwà Wèwè kwipacikù umwe wa kùdìbo nànsha, bwalu Wèwè ne Ùlamè Dìyì Dyèbè. Ndi nkuvùlwija Dìyì Dyèbè, Mukalenge, bu mwàkènzà Peetèlo ne bayiidi pàakasambilàbo mu Byenzedi 4, bàakamba ne: “Mukalenge, vùlukà Dìyì! Bwà cinyi bampàngaanù bàdi bàfuuna ne bantu bèèla meeji à cyanààna?”

³¹⁸ Mpindyewu, Taatù, tudi tulwa ne Dìyì Dyèbè. Wèwè wàkamba ne: “Ewu udi ungiitabuuja Mèmè ùdi ne Mwoyi wà kashidi. Ewu udi ulwa kùndì Mèmè ncyàkumwipatakù to. Ewu udi umvwa Mèyì Àànyì ne witabuuja Ewu udi muNtùme ùdi ne Mwoyi wà Cyendèlèlè, ne kàakupicila ku Cilumbulwidi to kadi mmumanè kuumuka ku lufu muyè ku Mwoyi.”


³¹⁹ Kaa, tùmányiṣha milòmbò yètù kùdì Nzambi, ne Yèyè neàtwandàmùnè. Ùdi ne bintu bibòdyòdyòke. . . “Ewu wàtonda mpèkaatù yèndè neàpetè difwidiibwa dyà luse. Ewu udi usokoka mpèkaatù wèndè kààdyàkulubuluka to.” Ne tudi tutonda bilèma byètù. Ndi ntonda bilèma byà cisàmbà. Ndi ntonda bilema byànyì mèmè mwìnè. Ndi ndòm̀ba luse. Ndi ndòm̀ba dyondopiibwa. Ndi ndòm̀ba ngàsà. Ndi ndòm̀ba bwà Wèwè kupòngolola Nyumà Mwìmpè, Mukalenge, mpindyewu mene pa bantu bàdi bindile aba, bwà myoyi yàbò kushintulukayì kushààla dibwe didì Nzambi ùfumba adi, ne yàfumbiibwa mu cimfwànyì cyà Mwànà wa Nzambi, bwà Nyumà wakaMufùlùlula awu, bwà ikalè mwà kubwela mu mibidi yàbò ne kubavwija bānà bàà balùme ne bàà bakàjì bàà Nzambi. Enzàku nānku, Mukalenge.

³²⁰ Tudi twitabuuja ne Wèwè udi kaaba aka. Tudi twitabuuja ne Wèwè neùtwe Dìyì Dyèbè mushinga. Tudi twitabuuja ne neùtwe diditàcisha dyà Dìyì mushinga. Mpindyewu tumaakù mabènesha aa pa bantu aba pàdìbo bindile Bwikadi Bwèbè bwà kubàsamba ku cyoshelu eku apa. Mu Dìna dyà Yesù.

³²¹ Mpindyewu, pawikalè wèwè witabuuja, ne witabuuja ne udi mupetè, elā cianza muulu kùdì Nzambi. Pawikalà ucìitaba bu disambila dyà diitabuuja ne mucipù wèbè paùdi mutàngile mpindyewu kùdì Nzambi apa, elā byanza byèbè muulu.

³²² Nènku batèèleji imànyinaayi kuulu. Bantu bònsò, juukilaayi kuulu, bàdi baswè kwenza mucipù kùdì Nzambi, mpindyewu

ambàayi ne: “Ndi nCìitabuuja. Ndi nCìitaba. Ndi nCìitabuuja.”

³²³ Mpindyewu elàayi byanza byènù muulu ne nùMupèèshè butùmbi ne byònsò nebijikè. Butùmbi kùdi Nzambi! Twasàkidila, Mukalenge Yesù, bwà bwimpè Bwèbè ne luse Lwèbè, ne bwà byònsò byùdi Wèwè mutwènzèle abi, Mukalenge. Tudi tuKupèèshila butùmbi kùdi Yesù Kilistò. 

63-0116 Mùsànjeelà Wa Ku Ìbaamulòlò
Pentecostal Church Of God
Mesa, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org